

Муассислар:
**Ўзбекистон Ёзувчилар уюшмаси,
“Камолот” ёшлар ижтимоий ҳаракати**

1982 йилдан чиқа бошлаган.

Жамоатчилик кенгashi раиси:
Абдулла ОРИПОВ

Жамоатчилик кенгashi:
Қахрамон ҚУРОНБОЕВ
Азамат УМАРОВ
Аҳмад ОТАБОЕВ
Абдуваҳоб НУРМАТОВ
Феруза МУҲАММАДЖОННОВА
Шуҳрат СИРОЖИДДИНОВ

Бош мухаррир:
Нодир ЖОНУЗОҚ

Бош мухаррир ўринбосари:
Нурилла ЧОРИ

Масъул котиб:
Ориф ТОЛИБ

Масъул мухаррир:
Элёр МУРОД

Мухаррир:
Фиёсиддин ҮНАРОВ

Таҳрир ҳайъати:
Муҳаммад АЛИ
Иқбол МИРЗО
Сирожиддин САЙИЙД
Ўрзобой АБДУРАҲМОНОВ
Фарруҳ ЖАББОРОВ

Бадиий мухаррirlар:
Акбарали МАМАСОЛИЕВ
Рахматжон ЮНУСОВ

Фотограф:
Рустам НАЗАРМАТ

Манзилимиз:
Тошкент шаҳри,

Ўзбекистон шоҳхӯчаси, 16-“а” уй.
E-mail: yoshlilik-jurnali@mail.uz

Тел/факс: (0371) 227-0-227,
245-5-793, 245-0-552

Навбатчи мухаррир: О. Мадвалиев
Босишига 26.07.2016 йилда руҳсат берилди.
Көғоз формати 60x84 1/8.

Нашриёт хисоб тобоги 8.7. Индекс 822.
ISSN 0207-9137. Журнал 2007 йил 4 майда
Ўзбекистон Матбуот ва аҳборот агентлиги
томонидан № 0253 рақами билан рўйхатга олинган.
Журналдан кўчириб босилганда
“YOSHLIK”дан олинди” деб изоҳланishi шарт.
“SILVER STAR PRINT” МЧЖ босмахонасида чот этилди.
Буюртма № 57. Адади 2800 дона.
Тошкент шаҳри, Учтепа тумани, 22-мавзе, 17-уй.

Катта мактаб

Ижтимоий фанлар соҳасида баҳсли мавзулар, саволлар кўп. Шулардан бири шахс ва давр муносабатига тааллуқли. Яъни: оламшумул тарихий воқеаларни ким ёки нима белгилайди – шу жараёнларни бошқарган шахсларми ёки уларни юзага чиқарган ижтимоий-сиёсий муҳитми? Ҳар икки қаравшинг ўз тарафдорлари бор: улар бор билимини ишга солиб, турли тарихий фактларни мисол келтириб, ўзига маъқул фикрни исботлашга тиришадилар. Назаримизда, бу масалада фақат бир томонлама ҳукм чиқармаслик керак. Негаки, булоқ шахслар, чиндан ҳам, улкан тарихий эврилишлар палласида майдонга чиқади ва айнан уларнинг характеристи, салоҳияти, инсоний фазилатлари ўша эврилишларнинг натижасини, сифатини белгилайди.

Бу фикр талқини учун Ватанимиз тарихидан маълум мисолларни келтиришимиз мумкин. Узоққа бормаймиз. Она юртимиз тақдиррида ниҳоятда улкан, шунчаки ифодалаш қийин бўлган сўнгти йигирма беш-уттиз йилни олайлик. Дунёга довруқ солиб турган қизил империянинг путурдан кетиши, озодлик ҳиссисининг кучайиши, сиёсий-ижтимоий, иқтисодий-маънавий муаммоларнинг портпайдиган даражада йиғилиши ва бу қалтис жараёндан оқилона, оғир-босиқулик ва айни пайтда қатъият билан чиқиб кетиш йўлини топган Улуғ Йўлбошчининг тарих саҳнасида пайдо бўлиши ҳамда юртини обод, хотиржам мамлакатта айлантириши.. Бор-йўғи бир жумлага сиғаёттган ана шу таърифда Ватанимизнинг мashaққатли, аммо шарафга бурканган чорак асрлик тарихи, сизу бизнинг салкам ўттиз йиллик ҳаётимиз мужассам.

“Биз кечирган ҳаёт осон ўтгани йўқ. Биз олдин ўтмаган катта мактабни ўтдик... Халиқимизда “Ер билан осмонча фарқ бор” деган гап бор. Ўйлайманки, бу ҳақда гапирганда ана шу иборани ишлатсан, айни ўринли бўлади...” – бу ҳаётий хулоса ўша улуғвор ўзгаришлар бошида турган Шахс, Ўзбекистоннинг Биринчи Президенти Ислом Каримовга тегишлидир.

Тарихда ном қолдирган давлат раҳбарлари кўп. Лекин уларнинг ҳаммаси ҳам эл-юрт ҳурматини, севгисини қозонган, деб айтольмаймиз. Халқини булоқ мақсадлар сари бошлаган, улуғ foялар йўлида илҳомлантира олган ва керак пайти халқига кўксини қалқон қилган Юртбошигина ана шундай баҳтга мусассар бўла олади. Бу ҳақиқатни Биринчи Президентимиз ўз ҳаёти, фаолияти билан яна бир карра бутун дунё жамоатчилигига исботлаб берди.

Бизни бу ёруғ кунларга етаклаб келган доно Раҳнамодан айрилиш хисси юракларимизни ўртади. Аммо шу оғир дамларда яна бир ҳақиқат намоён бўлди: Ислом Каримов foялари туфайли нафақат мамлакатимиз обод бўлиби, айни пайтда ички дунёмиз ҳам бир маромга келиб, халқ сифатида шаклланибмиз! Бу ҳолат қийин лаҳзаларда ўзимизни йўқотиб қўймасдан жипслашганимизда, қайғуни баб-баравар юрагу елкамизга олганимизда, дўстларимизнинг хайриҳоҳлигига миннатдор нигоҳ ила қараб, душман қўнгилларга бир тану бир жон бўлиб жавоб қайтарганимизда яққол кўринди. Ва яна, Йўлбошчи белгилаб берган йўлда азму шижаот билан давом этаётганимизда, Ватанимизни янада обод кўриш истаги билан яшаётганимизда намоён бўляпти.

Ўтган йигирма беш йил мустақил Ўзбекистон тарихининг олтин ҳарфларда ёзилган гўзал дебочаси бўлса, олдимизда шу қутлуг асарни залворли мазмун-моҳият билан безатиш вазифаси турибди. Бунинг учун, шубҳасиз, ҳар биримиз янада кўпроқ фидойилик кўрсатишими, жон куйдиришимиз лозим бўлади. Ана шунда Ватан олдидағи фарзандлик бурчимизни ҳалол ўтаган ва, шаксиз, бизни улуғ йўлга бошлаган Юртбошининг руҳини шод қилган бўламиз.

МУНДАРИЖА

22



37


8



50



27



№ 9 (304), 2016 й.

МУНОСАБАТ

- 8** Ислоҳотларниң мустаҳкам асоси
НАЗМ
Абдулла ШЕР Шому саҳарларда юртимни кездим
- 13** Адиба УМИРОВА Кўнглингман – кўз юмиб кета олмаган...
- 34** Шоди ОТАМУРОД Багрим бутун эди – чалинмасди най
- 46** НАСР Жамила ЭРГАШЕВА
- 16** Учрашув Шодмон ОТАБЕК
- 27** Аравакаш ТАДҚИҚОТ
- 22** Абдуғани СУЛАЙМОН Замон руҳи, ҳаёт фалсафаси
- 40** Беҳзод ФАЗЛИДДИН Вақт инсонсиз ҳеч нарса!
- 37** ҚҮЛЁЗМА Назар ШУКУР
- 36** Куз варақалари НИГОҲ
- 37** Ўзи бир чинор эди САБОҚ
- 45** Чарли ЧАПЛИН Ҳамма гап самимиятда
- 48** ЭЛ ҲАЗИНАСИДАН Абдунаби БОЙҚЎЗИЕВ Тилим, онамнинг тили!..
- 50** Тозагул Алланазарова Майдаканд
- 52** ТАВСИЯ
- 52** Мутолаа завқи ҚАЛДИРГОЧ
- 58** Моҳинур ҚОДИРОВА Қишлоғимнинг нафис ифорин туйдим
- 59** ЖАРАЁН Алишер ПАРДАЕВ
- 59** Болалари ўлдузларни кўзлаган юрт ҲАЖВИЯ
- 62** Акбар РУСТАМОВ
- 64** Мулойимхунук АНА ШУНАҚА

Буюк матонат



Соҳибқирон Амир Темур бобомизнинг “Яратганинг менинг бирлан қила-дурғон улуғвор ишлари бор” деган буюк ҳикматлари келган.

Гап мазмунига қараганда, улуғ бобокалонимиз ушбу ўлмас ҳикматни айни куч-кудратга тўлган ёвқур наққиронлик чоғлари, бўлажак фатху зафарларию музaffer юришларини юрак-юракдан ҳис этиб, бу ёруғ оламда Тангри таоло томонидан ўзларига буюрилган Буюк Бурч ва Буюк Мавқени бутун буюклигию бетимсоллиги, тамоми улуғворлиги ва маҳобати билан кўз олдига келтирган ҳолда кенг ва

нотисанд дунёга нарра шер мисоли боқиб туриб айтган бўлсалар керак.

Темур бобо бир жилмайса – етти иқлимда байрам бўлган, олампаноҳ бир қаҳр қилса агар – етти мамлакат ларзага тушган, дейишади. Ривоятдай туюлса-да, ҳар ҳолда, бу нақллар халқда келган, халқ оғзида ҳанузга қадар яшаб келаётгани бежиз бўлмаса керак.

Оқсаной пештоқларида нақш қилинган битиклардан бирида “Подшоҳларнинг сўзлари – сўзларнинг подшоҳидир” дейилади. Бу безавол ҳикмат ҳам Темур бобомизга тегишли. Ўзлари ёздирган, ўзларининг муборак назарлари тушган...

XIX-XX асрларга келиб, ўзбек халқи ўз бошидан кечирган, жон-жонию сүяк-сүягидан ўтказган икки мустабид тузум – биринчиси ўта қаттол ва муттаҳам, иккинчиси – зулму золимликда биринчисидан қолишмайдиган фирром ва зўравон, ғаддор ва номард даврларни ўз ичига олган 130 йиллик истибод замонларини кун ва соатларга бўлиб чиқса агар, 47 минг 482 кун билан чексиз-чексиз, дилгир-дилгир туганмас интихосиз соатлар пайдо бўлади.

47 минг 482 кундан иборат хорлик ва зорлик.

47 минг 482 кунни ўз ичига олган қарамлик ва мутелик.

Халқ учун 130 йиллик зулмкор махлук, оғзию бурунларидан ўт-олов туркаб, жон талвасасида пишқириб, чинқириб турган икки бошли баҳайбат аждаҳога кўрқмай чанг соладиган, рўйи рост панжа урадиган ҳақиқий шердил, арслонюрак Раҳнамога, халқнинг ўз ибораси билан айтганда, ҳеч нарсадан ҳайиқмайдиган шеримард Йўлбошчига тарихий эҳтиёж пишиб этилган эди.

Бино бўлган кунидан бошлаб бутун фаолияти бошдан-оёқ халқнинг маънавий томирларини қирқиб қуритишдан иборат бўлган нобакор шўро тузуми, дунё назарида, олам аҳли олдида шармисор бўлиб қолаётган, ёлғон ва сохталиги ўзига ҳам билиниб қолган коммунистик мафкура таназзулга юз тутган қалтис ва сертаҳлика, хавф-хатарга тўлуғ алғов-далғов бир замонда халоскор шамшир янглиғ ярқ этиб бир Буюк Хитоб янгради:

“...Биз энди бундай яшолмаймиз ва бундай яшашга замоннинг ўзи йўл қўймайди!..”

Жафокаш ўзбек халқи бу нажоткор хитобни 130 йил муттасил – 47 минг 482 кун кечаю кундуз қон бўлиб кутди.

Мустақиллик аслида шу Буюк шиҷоатдан, 1989 йилнинг 24 июнида Ватан ва халқ тақдирини елкага олиб айтилган шу Буюк матонатдан бошланган эди.

Орадан ҳеч қанча вақт ўтмай, 1991 йилнинг 31 августида – Президент Ислом Каримов Ўзбекистон мустақиллигини эълон қилгандан сўнг ўн-ўн беш кун ўтар-ўтмай, 1991 йилнинг 14 сентябрдаги сонида “Известия” газетаси “Ажратилган вагон” (“Отцепленный вагон”) сарлавҳали пичинг ва иddaolар тўла гиж-гижловчи мақоласи билан илк ҳужумларни бошлаб берди. У

ғаддор ва фитнакор мақола шундай иddaоли сўзлар билан бошланар эди: “Янгиланаётган федерациянинг бутуннитифоқ темир йўлларида рўй бераётган ҳалокатли ҳолатлар оқибатида 31 август куни ССР деган поезд таркибидан яна бир вагон узилиб, ажратилиб олинди: Ўзбекистон ўзининг давлат мустақиллигини эълон қилди”.

Бир йилдан кейин “Век” (“Аср”) газетаси муҳбирининг саволларига жавоб бераркан, марказий матбуотда кетма-кет чоп этилаётган, мақоладан кўра кўпроқ мағзувага, талвасага ўҳшайдиган шундай чиқишиларни назарда тутиб Ўзбекистон Президенти Ислом Каримов гапнинг пўсткалласини айтиб қўяқолган эди: “Ахир, фақатгина бу ерда, Ўзбекистонда бир миллион олти юз минг рус, икки миллион юз минг русизабон аҳоли бор, нега сиз улар ҳақида ўйламайсиз? Сизлар факат уларни “Мачитлар фонидаги руслар” кўринишидаги мақола ва кўрсатувларнинг билан гиж-гижлависизлар, холос. Ўзаро хавфсизлик шартномаси шаклидаги ҳужжатни таклиф қилишганида эса, сизлар жавоб тополмай қоласизлар...”.

Ёдингизда сақланг: бу гаплар 1992 йилнинг октябрида айтилган эди. Орада бутун бошли асрлар, минг йилликлар алмашиниб кетди. Биз ҳозир XXI асрнинг иккинчи ўнйиллигини якунлашга қараб бормоқдамиз. Икки аср – йигирма беш йил. Истиқлолнинг чорак аспи ичидан биз икки асрлик орзу-армонларимизнинг рўёбини кўрдик. Минг йилликлар тақдирини бор-йўғи йигирма беш йилнинг ўзида ҳал қилгандай бўлдик. Буюк халоскоримиз, Буюк Меъморимиз, Ўзбекистоннинг Биринчи Президенти Ислом Каримовнинг нечоғлик ҳақ экани ойма-ой, йилма-йил тобора равнақ топтиб бораётган, оламга ўз қадду бастини озод номоён эта олган озод ва обод Ўзбекистонимиз тимсолида кўриниб турибди.

Йигирма беш йилни кунма-кун кўпайтириб чиқса агар, 9 минг 125 кун ҳосил бўлар экан. Ўн минг ҳам эмас, бор йўғи 9125 кун! Оллоҳ билгувчидир. Нихони ҳам, пинҳони ҳам Худойимнинг Ўзига аён.

...Бутун халқимиз ўзининг буюк фарзанди, матонатли Йўлбошчиси Ислом Каримовга мотам тутган мусибатли, оғир ва синовли кунларда Ўзбекистон телевидениеси кўп тарихий ва тақрорланмас лавҳалар қаторида Биринчи

Президентимизнинг минбарда туриб айтган бир гаплари билан қиёфаларини қайта-қайта кўрсатиб турди. Ватан ва халқ тақдиди, келажаги ҳақида гапирав экан, Президентнинг ҳар гал “Оллоҳ умр берса...” деган ибора билан мин-

барни тарк этишларию нимжилмайиш билан қараган сиймолари экранда бот-бот тўхталиб кўрсатиб турилди. Шубҳасиз, бу нурли сиймо қалбларимизда мангу яшайди.



Дунё равон, дунё равон,
дунё равон йўлида,
Бир қўлида қурол, яна
кабутар бир қўлида.
Ярми бузгун, ярми қузгун,
ярми қашқир дунёда,
Қўйиб берсанг бир-бирини
гажиб ташир дунёда –
Эгни юпун, ҳоли забун,
бўйни эгик, нотавон,
Ўзбекларни тўфонлардан
ким саклади сог-омон?
Қай улуг зот бу миллатга
номус берди, ор берди,
Кўкрагини осмон қилиб
бургут берди, сор берди?
Ай Ватаним, ай онажон,
у ҳақсиз замонларинг,
Авлиёю азизларинг –
топталган маконларинг!
Дунё равон, дунё равон –
гоҳи тўқ, гоҳ оч тараф,
Ярми ҳилол тараф бўлса,
ярми эса хоч тараф.
Арслон бўлиб истибодода
қўрқмай панжа солди ким?

Миллат юкин, Ватан юкин
елкасига олди ким?
Қай улуг зот ҳалос айлаб
туҳмату жазолардан,
Қутқаролди ўз ҳалқини
балою қазолардан?
Темурхоннинг наслидан деб
фарзга олсам арзигай,
Ўз бобомдан шу қаломни
қарзга олсам арзигай.
Ай онажон, ай болажон,
ай жонга жон, отажон,
Ўзбекистон Ватан бўлди,
Ўзбекистон, онажон!..
...Қарам бўлмас бундан буён
ҳар ёву ҳар ётга юрт,
Ўзбекистон – она юртдир,
Ўзбекистон – ота юрт.
Дунё гарчи қалқиб ётар –
тўқ тараф ҳам, оч тараф,
Элим дея, юртим дея
ёнган зотларга шараф!..
...Бутун умри, бор ҳаёти –
дахлдорлик, қарздорлик,
Буюкларга – озод Ватан,
обод Ватан ёдгорлик...

Сирожиддин САЙИД,
Ўзбекистон халқ шоири

Энг катта бойлигимиз – халқимиз, ёшларимиз



Истеъдод, истеъдод ва яна бир бор истеъдод соҳибларини топиш, тарбиялаш ва уларнинг меҳнатини муносиб қадрлаш энг асосий вазифамизга айланиши зарур.



Адабиёт масаласи –
бу маънавият
масаласидир.




Биз учун ягона мафкура –
бу Ўзбекистоннинг тараққиёти,
Ўзбекистоннинг равнағи, Ўзбекистоннинг дунёда ҳеч кимдан кам бўлмаслигиdir.



Болаларим, сиз шундай бир замонда яшаяпсизки, ўзингизни кўрсатишингиз, бор имконият ва салоҳиятнгизни ишга солишингиз мумкин.



Мен, авваламбор, ёшларимизга қаратса айтмоқчиман: ўқинг, тарихни ўрганинг, тарихини, ўтмишини билган одам келажакда адашмайди.



Тарихимиздаги оғриқли давлардан ҳам хулоса чиқариб яшашимиз керак. Эртага бизнинг ўрнимизга келадиган ёшлар ана шу тарих ҳақиқати билан қуролланиши лозим. Чунки ҳеч бир соҳада ҳеч кимдан кам бўлмайдиган авлодгина буюк давлат барпо этиши мумкин. Нега деганда, буюк давлатни қуриш учун маърифатли, тарихни биладиган, ундан сабоқ чиқара оладиган одамлар керак.

“

Бу дунёда қуруқ гапга эмас, аввало, ҳар томонлама ишончли, синалган, ҳаётниңг ҳақиқий синовидан үтган одамларга ишониш керак.

“

Ҳаётда мақсадга эришиш ҳеч қачон осон бўлмаган. Эй, бизга шу ҳам бўлаверади, деган фикр билан яшайдиган одам, билиб қўйинглар, ҳаммамизнинг душманимиздир.

“

Эзгу мақсадларимизга етиш учун бугун белни қаттиқ боғлаб меҳнат қиласақ, ўзимизни қийнамасақ, эртага ҳаёт бизни қийнайди. Бу бешафқат ҳақиқатни ҳеч қачон унутмаслик зарур.

“

Ҳеч бир ишда шошилмасдан, айни пайтда сусткашликка йўл қўймасдан, фақат ва фақат ўзимизнинг кучимизга ишониб, таяниб яшшимиз керак. Ана шунда биз, албатта, ўз мурод-мақсадимизга етамиз.

“

Бирорвонинг қўлига ва юзига қараб яшайдиган инсон ва давлатнинг озодлиги бутун бўлмайди, мустақиллиги тўлиқ бўлмайди. Ҳаётниңг шафқатсиз қонуни шу: фақат ўз куч-қудратига ишонган халқгина ўз мурод-мақсадига етади.



“

Кимки мустақиллик йилларида Ўзбекистон қўлга киритган муваффақиятларни кўрмоқчи бўлса, аввало одамларнинг, халқимизнинг юзига, кўзига қарасин.

“

Озодлик, эркинлик ҳавосидан бир бор тўйиб нафас олган одам ҳеч қачон қулликка кўнмайди, қулликка қайтмайди.

“

Бу дунёда ҳар бир инсон, ҳар бир оила ўзининг муқаддас орзу ва ниятларига етиш учун яшайди. Агар ҳар бир оила ўз нияти йўлида бир ёқадан бош чиқариб ҳаракат қиласа, албатта, унга эришади. Бугун халқимиз ана шундай эзгу ниятлар билан яшаяпти. Биз шу йўлда доимо курашишимиз, қолаверса, бу курашнинг амалий томондан янада фойдали бўлишига ҳаракат қилишимиз керак.

Ислоҳотларнинг

мустаҳкам асоси

Истиқлолнинг илк кунлариданоқ ёшларга оид давлат сиёсати устувор вазифалардан бири сифатида белгиланди. Мустақиллик даврида қабул қилинган илк хукуқий ҳужжатлардан бири ҳам айнан “Ўзбекистон Республикасида ёшларга оид давлат сиёсатининг асослари тўғрисида”ги қонундир. 1991 йил 20 ноябрда кучга кирған ушбу қонун ўтган йиллар давомида ёш авлодни ҳар жиҳатдан баркамол қилиб тарбиялаш йўлида амалга оширилган ислоҳотларга, янги қонун ва қонуности ҳужжатларига асос бўлди.

Яқинда қабул қилинган “Ёшларга оид давлат сиёсати тўғрисида”ги қонун ана шу ислоҳотларни янги босқичга олиб чиқиши, янада жадаллаштириши шубҳасиз. Бир гурӯҳ ёшлар ўзлари ва тенгдошларининг, ўсиб келаётган ёш авлоднинг келажагига дахлдор ушбу муҳим ҳужжат ҳақида ўз фикр-мулоҳазалирини билдириллар. Бу фикрларда юртимиз ёшларининг қарашлари, кайфияти акс этган, десак, адашмаймиз.



Расул Кушербаев

Олий Мажлис Қонунчилик палатаси депутати, Ахборот ва коммуникация технологиялари масалалари қўмитаси аъзоси

Ривожланиш, ўзгариш бор жойда ҳеч бир мезон такомиллашувсиз турмайди. Айниқса, дунёда кечеётган жараёнларга мос равиша юртимизда олиб борилаётган кенг кўламли ислоҳотлар жараёнида бу масала устувор аҳамиятга эга.

Олиб борилган таҳлилий ўрганишлар мамлакатимизда ёшларга оид соҳанинг хукуқий асосларини замон руҳига мос ҳолда янада тако-

миллаштириш зарурлигини кўрсатди. Оддий айтганда, қарийб йигирма беш йил илгари қабул қилинган “Ёшларга оид давлат сиёсатининг асослари тўғрисида”ги қонунни Ўзбекистоннинг бугунги замонавий қиёфасига, кенг имконият ва шароитларда камол топаётган ёшларнинг ҳаётий талаб ва истакларига мослаштириш зарурияти пайдо бўлди.

Янги таҳрирда ишлаб чиқилиб қабул қилинган “Ёшларга оид давлат сиёсати тўғрисида”ги қонунда ёшлар бўйича давлат сиёсатининг мақсад ва тамоиллари, ёшларнинг хукуқий ва ижтимоий муҳофазаси, таълим олиш, иқтидорли ёшларни давлат томонидан кўллаб-қувватлаш каби масалалар қамраб олинди. Хусусан, қонунда ёшларга оид давлат сиёсатининг субъектлари сифатида давлат ҳокимияти ва бошқаруви идоралари, ёшлар номидан уларнинг жамоат бирлашмалари фаолият кўрсатиши белгилаб қўйилди. Қонуннинг 4-моддаси билан ёшларга оид давлат сиёсатининг очиқ ва шаффоғлиги, ёшларга оид давлат сиёсатини рўёбга чиқаришда ёшларнинг иштирок этиши, ёшлар ташаббусларини қўллаб-қувватлаш ва рағбатлантириш, маънавий, ахлоқий ва маданий қадриятларнинг устуворлиги, ёшларнинг камситилишига йўл қўйилмаслиги каби масалалар асосий принциплар қаторида мустаҳкамлаб қўйилган.

Қонунда “ёшларга оид давлат сиёсати”, “ёшлар (ёш фуқаролар)”, “ёш оила”, “ёш мутахассис”, “ёшлар тадбиркорлиги” тушунчаларининг мазмuni очиб берилган ҳамда ёшларнинг хукуқ ва қонуний манфаатлари мустаҳкамланган. Жумладан, “ёшлар (ёш фуқаролар)” деганда, ўн тўрт ёшга тўлган ва ўттиз ёшдан ошмаган шахслар назарда тутилмоқда. “Ёш оила” деганда, эр хотиннинг иккиси ҳам ўттиз ёшдан ошмаган оила ёхуд

фарзанд (бала) тарбиялаб вояга етка-заётган ўттиз ёшдан ошмаган ёлғиз отадан ёки ёлғиз онадан иборат бўлган оила, шу жумладан, никоҳдан ажралган бева эркак ёки аёл тушунилади. Бу ўз ўрнида ёш оиласарни қўллаб-қувватлаш борасидаги норматив хужжатларни амалда қўллаш бўйича ягона ёндашувга асос бўлади.

Эътиборли жиҳати шундаки, қонуннинг 21-моддасида ёшлар нодавлат нотижорат ташкилотларининг хукуқий мақоми, шунингдек, улар фаолиятининг давлат кафолатлари кўрсатилган бўлиб, ёшларнинг нодавлат нотижорат ташкилоти жисмоний ёки юридик шахслар томонидан ихтиёрийлик асосида ташкил этилган, ёшларнинг хукуқлари, эркинликлари ва қонуний манфаатларини рўёбга чиқаришни ҳамда ҳимоя қилишни, ёшларнинг ижтимоий фаоллигини оширишни асосий мақсадларидан бири деб биладиган, ўзини ўзи бошқарувчи ташкилот эканлиги кўрсатиб ўтилган.

Шунингдек, қонуннинг 25-моддасида иқтидорли ва истеъодли ёшларни давлат томонидан кўллаб-қувватлаш мақсадида уларни таълим ва илмий-тадқиқот муассасаларида, шу жумладан, хорижда ўқитиш, қайта тайёрлаш ва амалиётни ўташ дастурларидан танлов асосида фойдаланишини таъминлаш каби кўплаб имтиёзлар ўз аксини топган. Бу келажак эгаларининг жамият ҳаётида ўз муносиб ўринларини топиши йўлида кафолатлаб қўйилган яна бир мустаҳкам хукуқий асос дейиш мумкин.

Яна бир муҳим жиҳат, ушбу қонунни қабул қилиш жараёнида ёшлар томонидан қонун лойиҳасини такомиллаштириш бўйича 500дан ортиқ таклифлар келиб тушди ва уларнинг аксарияти қонунда акс эттирилди.

Бугун ҳеч муболағасиз айтиш мумкинки, мамлакатимизнинг фаол йигит-қизлари иштирокида қабул қилинган ушбу муҳим хужжат ёшларнинг ҳеч кимдан кам бўлмаган шароитда камол топиб, ўз имконият ва салоҳиятларини намоён этишига ва натижада буюк аждодларига муносиб авлод бўлиб камол топишига муҳим асос бўлиб хизмат қиласди. ♦

TO
10

Юртимиизда ёшларга оид ижтимоий муносабатларни тартибга солувчи 20 дан ортиқ қонун, 30 дан ортиқ Президент фармони ва қарори, Вазирлар Мажхамасининг 100 га яқин қарори қабул қилинган. Буларнинг барчаси ёшларнинг ҳуқуқ ва эркинликларини таъминлаш, орзуумидларнини рўёбга чиқаришда ҳуқуқий асос бўлиб хизмат қилмоқда.

Шу йилнинг 12 август куни Олий Мажлис Қонунчилик палатасида “Камолот” ёшлар ижтимоий ҳаракати марказий кенгаши томонидан анъанавий тарзда ўтказиб келинаётган “Истиқлол фарзандлари” шиори остидаги фестивалда иштирок этган ёшлардан бир гурӯҳи Ўзбекистон тарихида биринчи маротаба қонун қабул қилинишида кузатувчи сифатида бевосита иштирок этди. Мазкур қонуннинг қўйи палата томонидан қабул қилинишига гувоҳ бўлиши.

“Ёшларга оид давлат сиёсати тўғрисида”ги қонунда ёшларга оид давлат сиёсати – давлат томонидан амалга ошириладиган ҳамда ёшларни ижтимоий жиҳатдан шакллантириш ва уларнинг интеллектуал, ижодий ва бошқа йўналишдаги

салоҳиятини камол топтириш учун шарт-шароитлар яратилишини назарда тутадиган ижтимоий-иқтисодий, ташкилий ва ҳуқуқий чора-тадбирлар тизими экани алиҳида таъкидланади.

Ёшларнинг ҳуқуқлари, эркинликлари ва қонуний манфаатларини ҳамда улар учун очиқ ва сифатли таълимни таъминлаш, ҳаёти ва соғлигини сақлаш, маънавий, интеллектуал, жисмоний ва ахлоқий жиҳатдан камол топшишига кўмаклашиш, ахлоқий негизларни бузишга олиб келадиган хатти-ҳаракатлардан, иллатлардан, терроризм ва диний экстремизм, сепаратизм, фундаментализм, зўравонлик ва шафқатсизликояларидан ҳимоя қилиш каби бир қатор муҳим масалалар ёшларга оид давлат сиёсатининг асосий йўналишлари қилиб белгиланганлиги қонун бугунги глобаллашув жараёнларини ҳисобга олиб ишлаб чиқилганидан далолат беради.

Қонуннинг яна бир муҳим жиҳатларидан бири 27-моддасида ўз аксини топган: “Ёшларни ва ёш оиласарни ижтимоий ҳимоя қилиш мақсадида Ўзбекистон Республикасида ёшлар ижтимоий хизмати фаолият кўрсатади”. Бунда ёш фуқароларга психологияк-педагогик, юридик ёрдам кўрсатиш ва маслаҳатлар бериш, имконияти чекланган ёш фуқароларга, ёш оиласарга ижтимоий ёрдам кўрсатиш, таълим ва меҳнат жамоаларида ёшларнинг ҳуқуқлари, эркинликлари ва қонуний манфаатларини рўёбга чиқаришга кўмаклашиш каби ҳаётий ва ўта муҳим масалалар кафолатланади.

Ўн беш йилдан буён фаолият кўрсатиб келаётган ва ёшларнинг қанотига айланган “Камолот” ЁИҲ мазкур қонуннинг “Ёшларга оид давлат сиёсатини рўёбга чиқаришда нодавлат нотижорат ташкилотларининг иштирок этиши” ҳамда “Ёшларнинг нодавлат нотижорат ташкилотлари” моддаларида назарда тутилган ва бошқа тегишли моддаларда кўрсатиб ўтилган тартибда ўз ишини олиб боради. Мазкур қонун “Камолот” ЁИҲнинг фуқаролик жамиятида янада эмин-эркин фаолият юритиши, келажакдаги истиқболининг ҳуқуқий асоси бўлиб хизмат қиласи.

Бир сўз билан айтганда, ушбу қонун ҳар бир ёшнинг янада фаол бўлиши ва иқтидорини намоён этишига куч ва рафбат беради. 



Мусулмонбек Иброҳимов

“Камолот” ЁИҲ Марказий Кенгashi матбуот хизмати бўлими мутахассиси



Ёқутхон Холбекова

Зулфия номидаги давлат
мукофоти совриндори

“ёшлар ўртасида жисмоний тарбия ва спортни ривожлантириш, соғлом турмуш тарзини шакллантиришига бўлган интилишни ва спортга қизиқишига рағбатлантириш бўйича чора-тадбирларни амалга ошириш” таъкидланган. Демак, соҳа янада ривожланади. Жаҳон ва Осиё чемпионлари, Олимпия ўйинлари совриндорлари, халқаро мусобақалар ғолиблари сони бундан-да кўпайди. ●

Мен спортнинг енгил атлетика йўналишида 2014 йили халқаро “Гран-при” мусобақасида 1-ўринни эгалладим ва Осиё рекордини янгиладим. Бу, албатта, ўз-ўзидан бўлгани йўқ. Етарли шароит, имконият яратилгани, ёшлар, хусусан, қизлар спортига катта эътибор берилгани самараси. Жонажон Ватанимиз Ўзбекистон – имкониятлар мамлакати.

Замонавий спорт залларида машғулотларни тамомлаб, уйга қайтарканман, менга ҳамиша кўтаринки кайфият ҳамроҳ бўлади. Сабаби, тинч-осойишта юртда яшайман, ота-онам ёнимда, ўқишим, спорт билан шуғуланишим учун ҳамма нарса муҳайё.

Спортчи тенгдошларим билан вилоятларга борганимда замонавий спорт саройларини, уларда машқ қилаётган ёш спортчиларни кўриб хурсанд бўламан. Эътиборлиси, спорт билан оиласвий шуғулланаётганлар сони кундан-кун кўпайиб боряпти.

Яқинда қабул қилинган “Ёшларга оид давлат сиёсати тўғрисида”ги қонунда ёшлар спортига алоҳида эътибор берилгани тенгдошларим қатори мени ҳам беҳад қувонтирди. Жумладан, 5-моддада “ёшлар спортини оммавий ривожлантириш учун шарт-шароитлар яратиш” масаласига алоҳида ургу берилган. 12-моддада эса





Жўрабек Жаҳон

“Ўзбекистон адабиёти ва санъати” газетаси мухбири, шоир

Фан, маданият, спорт – қайси соҳа бўлишидан қатъи назар, Ватанимиз ёшлари халқаро миқёсдаги мусобақаларда, фан олимпиадаларида ўз куч ва билимларини намойиш этяпти. Туғилиб ўсган жонажон заминининг довругини янада ошириб, элу юртига ёргу юз билан қайтиб келмоқда. Буларнинг замирада ёшларга яратиб берилаётган шарт-шароитлар, қўллаб-қувватлашлар турибди.

Мен ҳам ана шу бекиёс Ватанинг фарзанди сифатида тенгдошларимга кўрсатилаётган фамхўрликлардан баҳрамандман. Ўзбекистон Ёзувчилар уюшмаси тавсияси билан “Биринчи китобим” лойиҳасида “Туйғулар шаҳарчаси” номли шеърий тўпламим катта ададда чоп этилиб, ўкув юртлари ва кутубхоналарга бегутлар тарқатилди. Ушбу лойиҳада бошқа қўллаб истеъдодли тенгдошларимнинг ҳам китоблари нашр этилди. Бу кувончли воқеадан кўп ўтмай жамият ҳаётида фаол иштирок этаётган ёш оила сифатида “Камолот” уйидан квартирага ҳам эга бўлдик. Имтиёзли кредитлар

асосида берилаётган бундай уйларда бугун қанчадан-қанча ёш оиласлар давлатимизнинг эътибори, фамхўрлигини ҳис этиб яшяпти.

“Ёшларга оид давлат сиёсати тўғрисида”ги қонун бу борадаги ишларни янада жадалаштириши, такомилаштириши аниқ. Қонунда ёшларга оид давлат сиёстининг асосий йўналишлари кўрсатиб ўтилган. Улардан бири ёш оиласларни маънавий ва моддий жиҳатдан қўллаб-қувватлаш, улар учун муносиб уй-жой ва ижтимоий-маиший шароитларни яратиш бўйича комплекс чора-тадбирлар тизимини амалга оширишдир. Бу ёш авлоднинг камол топиши, ҳаётда муносиб ўрнига эга бўлиши, юксак мэрраларга эришиб, юртимиз тараққиётига ҳисса қўшишига мустаҳкам асос бўлиб хизмат қилади. ♀



Адҳамжон Усмонов

Ўзбекистон Республикаси Вазирлар Маҳкамаси ҳузуридаги “Ўзархив” агентлиги бўлим бошлиғи

Янги қабул қилинган “Ёшларга оид давлат сиёсати тўғрисида”ги қонунда ёшлар учун очиқ ва сифатли таълимни таъминлаш асосий принциплардан бири сифатида белгиланган. Мустақиллижимизнинг илк йиллариданоқ таълим-тарбия соҳасига катта эътибор қаратилди. Кадрлар тайёрлаш миллий дастури ишлаб чиқилиб, ҳаётга татбиқ этилди. Бунинг натижаси илм-фандада, иқтисодий-ижтимоий соҳаларда яққол кўринди. Турли халқаро фан олимпиадаларида олтин медалларни қўлга киритаётган ёшлар ўзбек илм-фани бугун ҳам жадал тараққий этаётганини бутун дунёга намойиш қилиб келмоқда.

Таълим соҳасидаги ислоҳотлар, фамхўрликлардан кўпсоноли тенгдошларим қатори мен ҳам баҳраманд бўлганман. Ўниверси-

тетда бакалавр босқичини тугатаётib Навоий номидаги Давлат стипендияси соҳиби бўлдим, сўнг магистратурада давлат гранти асосида ўқидим. Кейинроқ Ўзбекистон Республикаси Президенти хузуридаги Давлат бошқаруви академиясини тамомладим. Эришган муваффақиятларимга энг аввало туғилиб-ўсган қышлогимда, кейинроқ туманда олган билимларим асос бўлган. Айтмоқчиманки, соҳага берилган эътибор ва ислоҳотлар сабаб чекка қишлокларда ҳам таълим даражаси кўтарилди, ўқитувчи ва ўкувчиларнинг билим-савияси ошиди.

Қонуннинг бир неча моддалари ёшларнинг билим олиши, салоҳиятини намоён этиши, меҳнат қилиши учун керакли шарт-шароитлар, имкониятлар яратиш, уларга имтиёзлар бериш масаласига қаратилган. Демак, бу борадаги ислоҳотлар янада чукурлаштирилади, ёшларга янада кенг йўл очилади. ♀

Орифжон МАДВАЛИЕВ
тайёрлади.

Шому саҳарларда юртимни кездим



Осиё

Мен – Осиё. Шарқман. Илк Одам
Менда севди жуфти Ҳаввони.
Эътиқодни ўрганди олам,
Менда таниб илк бор Ҳудони.

Мен осмонни ичимга ютдим,
Қуёш кезар томирларимда.
Илк алифбо, илк ҳарфни битдим
Бобилону Сомирларимда.

Бу дунёning тамаддунига
Олтин гиштни қўйдим мен комрон,
Асрларнинг баҳтили қунига
Етсин дея умидвор инсон.

Яшамоқнинг сирларини гоҳ
Баён этиб тарихларимда,
Қитъаларнинг кирларини гоҳ
Тозаладим ариқларимда.

Сув ичганлар мендан ютоқиб,
Лойқалатди булоқларимни!
Ўшанда ҳам дарёдек оқиб,
Гулга кўмдим қирғоқларимни!

Мен то ҳануз қучга тўлугман,
Гангитолмас майда иғволар.
Мен сoddаман. Лекин улугман:
Багримдадир сирли дунёлар!

Мен – Осиё. Шарқман. Илк Одам
Менда севди жуфти Ҳаввони.
Эътиқодни ўрганди олам,
Менда таниб илк бор Ҳудони.

Абдулла ШЕР

1943 йили туғилган.
Тошкент давлат
университети (ҳозирги
ЎзМУ)нинг журналистика
факультетини тамомлаган.
“Кўклиам табассуми”,
“Ёнаётган йўл”, “Ёмғирлар
оралаб”, “Гул йиллар, булбул
йиллар” каби шеърий
тўпламлари нашр этилган.



* * *

Шому саҳарларда юртимни кездим,
Эркин шамолларга ошно тутиниб.
Ўзимни баҳтиёр бойчечак сездим,
Баҳорнинг ишқида қорлардан униб.

Шому саҳарларда қўшиқ тўқидим,
Оҳангга айлансин дедим бу жаҳон.
Шомда илк юлдузни сўздек ўқидим,
Саҳарда шеъримдан уйгонди осмон.

Шому саҳарларда томчи шабнамга
Оламнинг кўзгуси дея қарадим.
Шомда ишондим-у Ёруг Одамга,
Саҳарда заминга нурдек ярадим.



Анна Ахматова

Гўзал қизча излаб аслини,
Бу дунёни тутди саволга
Ва юракнинг солди расмини
Дарахтлару дарё, шамолга.

Келмай туриб ҳали навбаҳор,
Настариннинг гулидек тошиди.
Бўлмаса ҳам ишқда баҳтиёр,
Одамларга севги улашиди.

Унга боқиб осмон қолди лол:
Ерда экан энг ёргу юлдуз!
Кийлаб қўнди дарахтга шамол,
Дарё билан ўйнаб оқди муз...

Чақнар экан унинг илҳоми,
Ҳайрат ичра олам суқланди.
Сўнг нурларга ишонган номи
Абадият ичра ўйқланди.

Китобини унинг варақлаб,
Шоирликдан тұясан гүрур.
Ҳар очганда кундек ярақлаб,
Чиқиб келар мардана умр.

Чиқиб келар Улугвор Алам –
АЗобларнинг баҳтли келини,
Бардошини алқаб Худо ҳам,
Унга берди булбул тилини.

У аскардай ўпди тиз чўкиб,
Шеъриятнинг қуттулуг түгини.
Бор қўрини сўзларга тўкиб,
Ловиллатди Пушкин чўгини.

* * *

Мени алдаб кетди рангин гулзорлар,
Жўшқин булбуллар ҳам жўшимай қўйдилар.
Яшаига интилган асрий чинорлар
Жонини қўрсатиб, танин ўйдилар.

Барглару томирнинг оралигидა
Буралди дарахт деб аталган ҳаёт.
Япроқнинг манглайи қоралигидан
Ерга кириб кетди илдиз деган дод.

Баҳордан ҳам бошқа фасл кўп – билдим,
Еллардан изгирин бўлганда пайдо.
Кечаги чечаклар бугун чўп – билдим,
Устимдан кулганда турланган дунё.

Барибир, гоҳ совиб, гоҳида илиб,
Рангларга беписанд боқиб яшайман.
Ҳар куни қуёшни лолажон қилиб,
Тоғлар чаккасига тақиб яшайман.

* * *

Узоққа бормади баҳт унча,
Ғанимлар орага тушиди-қу!
“Ҳаммаси дунёда вақтинча,
Ваъда ҳам шоҳдаги қушидек-қу!” –

Шу тахлит овутиб ўзни биз,
Кирамиз чорларкан гўшанга.
Ўргана бошлиди кўзимиз
Тўшакни тўлдирган ёш танга.

Кўнишиб кетамиз охир биз
Деб: “Дунё бири кам, тантис-да!”
Зухрони унутган Тоҳирмиз:
Бемалол ухлаймиз сандиқда.

* * *

Сонет

Мен нозик белингга қўл узатган чоғ
Беш панжа шаклини олди юрагим,
Тўргайга айланиб, келди сайрагим,
Сўзлардан юз бурди титраган дудоқ.

Яқинлаб келгандек бўлди энг йироқ
Кўҳи Қоф томонда қолган эртагим.
Эркалаб дединг-у менга: “Тентагим!” –
Үн саккиз баҳорга тўлди бу қучоқ.

Бўсалар олдим-у, тикилдим ёниб,
Сўнг юмдим қўзимни лаззатдан бир дам –
Топдим-у йўқотдим яна ўзимни.

Топширдим боримни сенга инониб,
Фақат олиб қолдим умрбод, эркам,
Сени қуйлаш учун чанқовузимни.

Маъруф Жалилнинг “Сайланима” китобига ёзув

Сен фақат сўз йигдинг, мол-мулк йигмадинг,
Сўз узра бош эгдинг, гоҳо йигладинг,
Бу дунё тор экан, лекин, дўстгинам:
Сўзларинг сиди-ю, ўзинг сигмадинг.

Муҳаммад Раҳмон

Гўзал шоир эди Муҳаммад Раҳмон,
Гўзал инсон эди Муҳаммад Раҳмон,
Осмонлар қўймасдан олиб кетдилар,
Гўзал осмон эди Муҳаммад Раҳмон.

Абдуллоҳлар жуда кўп ўтган
Бу дунёда мен ҳам Абдуллоҳ,
Улар мени ишониб қутган,
Мен улардан қарздорман, Аллоҳ!

Жангномадир улар ҳаёти,
Матонатга исм ҳар бири.
Ботинида қолган фарёди
Бу оламда сирларнинг сири.

Улар тутди буюк кўксини
Юрту иймон ҳимоясига.
Ҳатто тарих боқар ўксиниб
Кечмишларнинг ҳикоясига.

Таъқиблару сургуну зиндан...
Эркка ташна тиллар чўгланди.
Ҳайҳот, улар тугилган замон
Қора миљтиқ зимдан ўқланди.

Зулмат тунда тиглар қайралди, –
Хукм аҳлиниг фармони бажо.
Сўз товушдан, эвоҳ, айрилди,
Жим йиглади ҳар битта ҳижо.

Топтаб ўтди насрү назмини
Гоҳо этик, гоҳида туёқ –
Ёдга чизар улар расмини
Фожиадан қорилган бўёқ.

Иллар ошиб, асрлар ошиб,
Тикилади менга ул қўзлар
Ва чиқар-у қалбимдан тошиб,
Ёриб ташлар қаламни сўзлар.

Ўртанади ичу ташларим,
Йиглай бошлар, шеърга томган ёш...
Сиз тинч ётинг, мен, адашларим,
Сиз учун ҳам қўтарганман бош!





Жамила ЭРГАШЕВА,
Ўзбекистон Республикасида
хизмат кўрсатган маданият
ходими.

1956 йили туғилган.
Тошкент давлат
университети (ҳозирги
ЎзМУ)нинг журналистика
факультетини тамомлаган.
“Изҳор”, “Интиқом”,
“Таназзул”, “Аёл жодуси”,
“Зулғизар”, “Қир устидаги
аёл” каби роман, қисса
ва ҳикоялар жамланган
китоблари чот этилган.

Учрашув

Ҳикоя

Шифохона қуюқ дарахтзор орасида жойлашгани учун туни билан чигирткаларнинг чириллашидан қулоқлар қоматга келади. Саҳарга яқин уларнинг овозини қушларнинг чуғурлаши босиб кетади. Йўлаклари нурга чўмилиб ётган шифохона эса митти паррандаларнинг бу шовқин-суронига бутунлай бепарво, мудраб тонгни кутади. Аслида шифохонада кундузлари ҳам жуда сокин кечади. Бу ерда асосан мартабали ва нишондор кишилар ётиб даволанишади ва улар кўпинча касал бўлганликлари учун эмас, касал бўлмаслик учун ҳар ярим йилда ўн-ўн беш кун ётиб, турли текширувлардан ўтишади, дам олишади. Уларнинг ўзлари ҳам, изидан келувчилар ҳам касалхона тартибларини жуда ҳурмат қилишади, унда-мунда йўлакка чиқиб қолишса ҳам, юмшоққина шиппакларда оёққиналарининг учida оҳистагина юриб, бир-бирлари билан пичирлашиб гаплашишади.

Узун ва ораста йўлаклар, одам бўйидан икки баравар баланд, доимо ёпиқ эшик ортидаги хоналар узра қалқиб турувчи бу сокинликни фақат бир одам – бош шифокорнинг биринчи ўринбосари гурсиллаған қадам товушлари билан бузиб, янчиб юраверарди. Ҳамшира қизлар берадиган гурунгларга қараганда унинг бу “тартибсиз”-лиги шифохонанинг йиғилишларида жуда кўп марта муҳокама ҳам қилинган, бош шифокор “Ҳаким Сатторович, бу ер шифохона. Шифохонада қанақа контенгент ётиб, даволанишини яхши биласиз. Сал у ёқ-бу ёғингизга қараб юринг, эл қатори шиппак кийинг. Туфлингизнинг овози ҳамманинг тинчини бузаяпти”, деб кўп марта айтган. У эса “ҳо-ҳо”лаб кулиб, “Даврон Бердиқулович! Мен мушук эмасман-ку, овоз чиқармай юрадиган. Мен одамман, шифокорман. Беморларимнинг атрофида айланиб ётган инсу жинсларни ҳуркитиб юрмасам бўлмайди-да”, дер экан. Бош шифокор “Шиппак, шиппак...” деб минғирлайверган экан, охири “Ака, кет, десангиз, кетайн, лекин мен шиппак киймайман, бу менга тўғри келмайди”, дебди.

“Лекин Ҳаким Сатторовичнинг билими зўр. Ҳамма унга кўринишни истайди. Бош шифокоримиз ҳам ҳамма танишларини шу кишига кўрсатади”, дейишарди қизлар.

Бош шифокорнинг кўрсатмаси биланми, ёки шунчаки тасодиф туфайлими, вилоятнинг машхур гимнастикачи қизи, айни пайтада вилоят маданият бошқармасида ишлатган Алия Шодиметова айнан шу хушсурат, ўқтам шифокор йигит – Ҳаким Сатторович қарайдиган палатага тушиб қолди. Ким-кимлар бир марта кўринишга зор бўлган шифокор унинг ёнига кунига ўн марта киради: “Қани-и, Алияхоним, тузукмисиз?”. Ўзиям кун ора навбатчиликда туради, айни саҳар пайти, атай унга қараш учун келиб ётган онаси палатани бошига кўтарганча хуррак отиб, уйқуни ураётган пайтида ҳам кириб келади-да, бамайлихотир тунҷироқни ёқиб, унинг қон босимини ўлчайди, юрагини эшитиб кўради, чойшабнинг бир четини кўтариб, баданини эгаллаб олган тошмалирига қарайди. Кетаётиб, бемалол уйқусини давом эттираётган онасига бир қараб, сўнг Алияга ҳазилнамо кўз қисиб қўяди: “Сиз ҳам ухланг”.

У хонадан чиқиб кетгач, Алия – беш ёшидан буён эл оралаб юрган сарвқомат гимнастикачи – анчагача қон босимини ўлчайтган, юрагини эшитиётган пайт баданига теккан қўлларининг тафтини, ҳатто устига энгашган дам юзига урилган иссиқ нафасини ҳис этиб ётади. Унинг ортидан қоладиган атир ҳиди ажиб дашт гулларини ёдга солади, кўнгли ҳам бепоён даштлардек ҳувуллаб қолади. Сўнг беихтиёр эшикка тикилиб, уни яна кута бошлайди. Йўлакдан эшитилаётган гурсиллаган қадам товушлари, залворли эшикларнинг оғир фийқиллаб очилиб-ётилишлари бора-бора асабини буза бошлайди. Кейин ётган жойида ўзининг устидан кулади: “Ҳей, ўн саккиз яшар қизмисан? Бунча ҳаяжонланмасанг? У шунчаки вазифасини бажарајпти, холос. Сенга бирор сўз деган, ёки бирор ишора қилган бўлмаса... Қолаверса, шундай ақлли, билимли йигит уч боласини қўйиб, ёши ўттизга етган бир қари қиз билан ҳаётини қайтадан бошлармиди? Бу ивириқ ҳаётда шундан бошқа тузукроқ машғулот йўқми? Ўзи-чи, ўзи? Ўзи ҳам ҳеч қачон ҳеч кимнинг бундай қурбонлик беришига йўл қўярмиди? Ҳеч қачон!..”. Лекин унинг ихтиёри аллақачон ўзидан кетган, на тийиқсиз ҳаёллар тизгинини, на эшикка қараб мўлтираб тураверадиган кўзини бошқара олмас эди. Ҳар қанча ўзини уришса ҳам, у йўқ пайти уни кутаверади, келганида эса ҳаяжонини зўрға ичига ютади.

Йигити тушмагур ҳам атай қилгандек эрталаб уст-бошини ҳам алмаштирмасдан қилич-дек бўлиб костюм-шимда тўғри унинг хонасига кирап, кетгунича ҳам бир кириб, аҳвол сўрар эди. Тўғри, Алиянинг аҳволи анча оғир. Шифохонага тушганига бир ҳафта бўлибди ҳамки, баданини босиб кетган тошманинг на асл сабабини топа олишди, на уни қайтара олишди. Текширишди, маслаҳатлар қилишди, бошқа шифохоналардан мутахассислар чақириб кўрсатишли, билган бор илму амалларини қилиб кўришди, аммо тирсагидан тангадеккина бўлиб бошланган тошма ҳамма жойини босиб, қулоқларининг ичи, тилининг учигача тошиб кетди, қайтмади. Қишлоқдаги момогинаси “Бу эшак еми-ку, иримини қилмаса, қайтмайди”, деб отасини қистай-қистай, машинага бир эшакни юклаб, уч ҳовуч арпа бериб, шаҳарнинг қоқ ўртасида жойлашган касалхонага жўнатиби: “Арпани этагига солиб, эшакка едирсинг”. Уни бир амаллаб аравачага ўтиргизиб, эшак-

нинг ёнига чиқаришди-ю, аммо машинада 30-40 чақиримдан иззат-икром билан келтирилган эшак арпани ҳидлаб ҳам кўрмади. Тошма ҳам қайтмади.

Бир ҳафта ўтгач, Ҳаким Сатторович янги дори бошлатди: “Буям бир таваккал, ҳеч нарса қилмасдан қараб турла олмайман-ку, ахир. Лекин негадир ижобий самара беришига кўнглим ишониб турибди”. У энгашиб, Алияning қўлларини оҳистагина сиқиб қўйди: “Сиз ҳам ишонинг, албатта ҳаммаси яхши бўлади”.

Дард уни бутунлай ҳолдан тойдирган, қон босими пасайиб кетган, назарида юраги ҳам ярадор қушчадек зўрга уриб турарди. Унинг қароқларига ёш қалқди. Агар шу инсон қўлларидан тутса... жаҳаннамга ҳам боришга тайёр эди у. Ўлса, шу йигит учун, унинг қўлларидан тутган ҳолда ўлса!. Яшаса, шу йигит учун, шу йигит-нинг қўлларидан тутмоқ учун яшаса!..

Доктор унинг қўлларини қаттикроқ сиқди: “Биргалашиб Худодан сўраймиз, ҳаммаси яхши бўлади. Сиз менга ишонинг”. Алияning назарида унинг овози титраб кетди, кўзлари ҳам намлангандек бўлди. У бошқа ҳеч нарса демади, тез-тез юриб хонадан чиқиб кетди.

Бирпастдан кейин бош шифокорнинг ўзи кирди. Даволовчи шифокор ҳар кирганида бир талаб олаётган онаси энди унга жовуллаб кетди: “Мен сизларни тушунмаяпман. Сизлар учун инсон ҳаёти ҳеч қандай қимматга эга эмасми? Кечагина иш бошлаган бир йигит менинг қизимнинг устида интуициясига ишониб, тажриба ўтказмоқчи. Сиз эса индамай қараб, томошабин бўлиб ўтирибсиз. Тиббиёт аниқ фан, аниқ илмга асосланган соҳа, унда интуиция эмас, илм, тажриба муҳим. Қўлларингдан келмаса, жавоб беринглар, Тошкентга олиб кетамиз”.

Бош шифокор юпатмоқчи бўлгандек унинг елкаларига қоқди: “Альфия опа! Мен сизни тушуниб турибман. Лекин сиз ҳам мени тушунинг ва ишонинг. Биринчидан, докторингиз жуда билимли мутахассис, иккинчидан, бу касалликни ҳамма жойда, ҳатто Америкада ҳам биз даволаган усулда даволайди. Дунёда даво усуллари ҳеч қачон сир сақланмайди, бу мумкин эмас. Қўлимиздан келган ҳамма ишни қиласяпмиз. Худо хоҳласа, бугун-эрта натижаларга эришиб қолсак, ажаб эмас”.

Альфия опа яна жовуллади: “Ана, кўрдингизми! Қилаётган ишингизнинг натижасига ўзингиз ҳам ишонмайсиз. “Эришиб қолсак, ажаб

эмас” эмиш. Менга бундай мужмал гап керак эмас, менга “Албатта эришамиз” дейдиган доктор керак!”

Бош шифокор бир муддат жим қолди. Сўнг она-болага бир-бир қараб, ҳамон ёқасидан олишга ҳам тайёрдек хезланиб турган онага юзланди: “Опа, касалнинг бошида туриб бекордан бекорга ваҳима қилманг. Сиз сўраётган гапни ҳеч қачон ҳеч қандай доктор айта олмайди. Сабрли бўлиш керак”.

Янги муолажанинг фойдасини Алия кечга яқин ҳис қилди: аъзои баданидаги куйишиш бироз пасайгандек эди. Шунгача юз марта унинг ёнига кириб, “Яхши-и-и”, деган доимий жавобидан руҳи тушиб кетган Ҳаким Сатторович энди унинг “Негадир тошмаларим куйишмаёттандек”, деганини эшитиб, кўзлари чақнаб кетди: “Ростданми?!”. У дарҳол чойшабни тиззасигача кўтариб, диққат билан касалликка разм солди, сўнг билакларини очиб кўрди: “Есть!”, суюнганидан боладек битта товонида туриб, паркет полда “чир” айланди ва деярли юргурган ҳолатда ташқарига чиқиб кетди.

У ўша кеча навбатчи бўлмаса ҳам, ярим тунда касалхонага Алияни кўргани келди. Йўлакда унинг гурсиллаган қадам товушларини эшитиб, Алияning юраги ҳапқириб кетди. У хонага димогида қандайдир шўх куйни хиргойи қилганча кириб келди: “Сира ухлай олмадим. Сизни бир кўриб кетмасам бўлмас эди”.

У яна Алияning тошмаларини кўздан кечирди, қон босимини ўлчади, юракларини эшитиб кўрди, сўнг ўз-ўзидан мамнун бир ҳолатда хона четида турган стулни олиб, оёқларини чалкаштирганча ўтириб, Альфия опа билан дарвозаларининг олдига кимдир ташлаб кетган кичкинагина кучукча, унинг қанчалар шириклиги, қандай овқатланиши, қандай югуриши, қандай думлаши, энди шу кучукчани ўzlари боқиб олишга қарор қилганликлари ҳақида гурунглашди. Кетаётib, Алияни танқид қилиб қўйди: “Бу қизингизнинг лугатида “яхши” деган сўздан бошқа сўз йўқ, шекилли. Жуда зерикиб кетмадингизми у билан ётиб? Лекин менинг юракларим қон бўлиб кетди-ей. Ўзи ўтай деб ётиби, қандайсиз, десам, “яхши-и”, дейди. Уни деб бутун касалхона хавотирда оёққа турган, бунга қандайсиз, деса, яна “яхши-и-и”, дейди. Қойил-е!”.

Қизининг аҳволи ўнглана бошлаганидан мамнун она ҳам кулимсираб унинг фикрини маъқуллайди: “Ха, рост айтасиз, бу билан



бир соат бирга ўтирган одамнинг юраги “тарс” ёрилиб кетса керак. Она бўлганингиздан кейин чидар экансиз-да. Лекин унинг шундай бўлишига ўзим сабабчиман, мактабда ҳамма фанлардан бешга ўқирди, қайси институтга топширса ҳам кириб кетарди. Бу боғча ёшидан гимнастикага қатнади, қадди-қомати ҳам гимнастикага мос эди, гимнастикачи бўлади, деб туриб олдим. Момоси билан, дадаси билан талашиб-талашиб, гимнастикачи қилдим. Қайнонам “Эл бўлмадинг”, деб хафа бўлди. Мен “Бегоналигимни юзимга солдингиз”, деб хафа бўлдим. Барibir айтганимдан қайтмадим. Гимнастикачи қилиб-ку, ютқизганимиз йўқ. Касбининг ортидан дунё кезди, обрў-эътибор

топди. Бугун ҳам вилоятда шу соҳа бўйича ягона мураббий. Аммо яна бир томони бор, гимнастикалар, кўряпсиз, гапирмас экан, ичидагимни гап бўлса, ҳаракат билан айтиб қўя қолади”. Ҳаким Сатторович куллади: “Яхши эмас. Унда-мунда гапириб ҳам туриш лозим, Алияхон”. “Албатта-да. Тумтайиб юриб, мана, ёши ўттизга етди. Аллақандай сочи паҳмоқ Алвастилар “мен” деган йигитларнинг бурнидан ит ўтказиб, истаган жойига етаклаб юрибди. Бу бўлса, шунча ҳусни, шундай ақли билан!.. Оғзимнинг солиги, қизимнинг қилиғи йўқ, деган хотин аслида менинг ўзимман”.

Онасининг бу хил ҳасратларини аввал ҳам кўп эшитган бўлса-да, Алия шифокор йигитнинг олдида жуда хижолат бўлди: “Она-а-а!”.

Уч кун деганда ҳамма тошмалар қайтиб кетди, аммо уни яна уч кун олиб қолиши: "Мен ишонч ҳосил қилишим керак". Кетаётган куни Ҳаким Сатторович шифохона ҳовлисизда барқ уриб гуллаб ётган атиргуллардан катта бир гулдаста тайёрлаб, унга келтириб берди: "Уйга боргач, сувга солиб қўясиз". Яна тайинлади: "Ўзингизни уринтирманг. Тошмалар сизни жуда чарчатган, ўзингизга келиб олгунча, эҳтиёт бўлиб туринг. Яна қайталаб қолманг", "Хўп, раҳмат..."

Алия кўз ёшларини яшира олмади. Шундай оғир хасталикдан тузалиб уйга қайтаётган одамнинг йиглаши фалати эди, лекин йигит ундан "Нега йиглаяпсиз?" деб сўрамади. Унинг ҳам негадир кайфияти йўқ эди.

...Шу бўйи уларнинг йўллари кўп йиллар кесишмади. Бу орада Алия турмушга чиқди, фарзандли бўлди. Онаси ухлаб қолган пайтлар ухламасдан унинг бошида бедор тонг оттирган шифокор йигит баъзан-баъзан ёдига тушишини айтмаса, деярли унутиб юборди. Чунки йигит ҳам уни бирор марта бўлсин, изламади. Лекин Алияning ёдига тушган дам ўша пайтлар жону жаҳонини ёндирган ҳис-туйғулари, касалхонадан чиқаётган пайт ўзини тўхтата олмай йиғлаганлари учун жуда-жуда хижолат тортар эди. Бир сафар қандайдир йигинда қорамағиздан келган тиқмачоқдек бир аёл билан ёнма-ён ўтириб қолган эди, уни "Ҳаким Сатторовичнинг оиласи", деб таништиришди. Беихтиёр Алияning юзларига қон тепди, кўнглида кечган туйғуларни сездирмаслик учун "Эрингизни яхши биламан, жуда билимли, касбига садоқатли шифокор", деб, аёлга мулозамат қилган киши бўлди, у эса "Акангиз сиз билан фаҳрланиб юради, менинг синглим, дейди доим", деб такаллуф қилди.

Кейинги вақтларда тез-тез Алияning юраги безовта қиладиган бўлиб қолди. Сал нарсага нафаси бўғзига тиқилиб, қора терга тушиб қолаверади. Ўзи ҳам жонининг тинчини билиб ҳеч нарсага уринмайдиган бўлиб қолди. Камҳаракатлилик оқибатида анча вазн тўплади, бу эса яна ҳаракатини чегаралаб қўйди. Баъзан ойнага қараб, қархисизда унга термулиб турган қовоқлари салқи, бақбақалари осилиб қолган, ранги захил кекса аёлни кўриб, ўзидан кўнгли қолиб кетарди. Бир замонлар фаоллар шифохонаси бўлган жой Кардиология марказига айлантирилган экан. Эри уни қўярда-қўймай шу марказга олиб келиб ётқизди.

Тақдирнинг ҳазилини қарангки, унга яна ўша анча йил аввал ётган хонани беришди. Деворнинг бир томонини эгаллаган деразасига қалин шойи парда тутилган ним қоронги хонада ётиб, ўзи истамаган ҳолда хотираларга берилди. Эшикдан кирган ҳар бир одамга жовуллаб ётишувчи онаси, эртаю кеч елкасига эшикбондан олган кўкиш халатни номигагина илган ҳолда кириб келувчи отаси... Ўшанда отасига қараб, одамзод овоз чиқармасдан, бир томчи ёш тўқмасдан ҳам йиғлай олиши мумкинлигини кўрган эди. Отаси ҳам жуда босиқ, камгап одам эди. Алияning олдига келар-кетар, келганида ҳам, кетганида ҳам қизининг бошини бир ҳидлаб қўярди. Эҳ, одамзод шунчалар ҳам мўрт бўлмаса, одамнинг қўли билан ясалувчи эшик-дераза, жиҳозлар ҳам одамдан кўпроқ яшар экан. Онасининг овози қулоқлари остида жаранглаб турибди, аммо ўзи йўқ. Отаси ҳам... Аслида жону жаҳонини на қаёқдан келгани, на қаҷон кетиши номаълум бўлган дард ўртаб ётган бир пайтда ҳам ким аҳвол сўраса, жилмайиб, "Яхши-и-и..." деб жавоб берадиган хушрўй, сарвқомат гимнастикачи қиз ҳам йўқ. Унинг ўрнини туриб-ўтиргандагина эмас, у ёнидан бу ёнига ағдарилганда ҳам малолланадиган бир кампир эгаллаган. Яна... гурсиллаган қадам товушлари билан bemорлари атрофида айланиб юрган инсу жинсларни ҳуркитувчи ўша ўқтам шифокор йигит ҳам йўқлиги аниқ. Қизиқ, ҳозир у қаерда экан, нима иш билан шуғуланаётган экан? Ўшанда чамаси қирқларга кирган эди, ҳозир етмишдадир... Аллақачон нафақага ҳам чиқиб бўлгандир? Балки, ўтиб кетгандир... Жуда ажойиб йигит эди. Ўшанда Алияning кўнглида эмас, йигитнинг қалбида ҳам Алияга nisbatan bir ўтли туйғулар уйғонгани аниқ. Бу унинг кўзларидан англашилиб турарди. Онаси ҳам сезган экан, кейинроқ бир гап очилганда айтган эди. Эҳтимол, ўша туйғулар бўлмагандан таваккал қилишга журъат топа олмаган ва Алияни кутқариб қололмаган бўлармиди?

Ҳаммаси ўша-ўша, ўша хоналар, ўша узун йўлаклар... Фақат овоз кўп, шовқин кўп эди: тапир-туптур, шақир-шуқур. Бири-биридан шошиб, гурсиллаб юрадиган, баланд-баланд овозда гапирадиган шифокорлар, ҳали у ёққа, ҳали бу ёққа бошлаб кетаверадиган ҳамширалар... Алия эса кексайган, асаблари чарчаган. Кун бўйи унга тиним беришмади, бир

дунё аппаратлардан ўтказишиди, таҳлил учун қоён, пешоб олишди. Соатлаб томчи уколлар қилишиди. Кечгача буткул ҳолдан тойди. Кечқурун ўғли билан келини олиб келган овқатдан номигагина totинган бўлди-да, улар кетгач, шипдаги қандилни ўчирди, ёнdevорга ўрнатилган бежирим тунчироқни ёкиб, ўрнига чўзилди. Жуда ҷарчаган эди, дарров кўзи илинди. Шу ётишда қанча вақт ётганини билмайди, аммо бир тиниқиб ухлаб олгани аниқ. Эшик оҳиста чертилиб, оғир фийқиллаб очилганда, ҷарҷоқлари анча тарқаган эди, сергаклик билан бошини кўтариб, эшикка қаради. Остонада шумшайиб турган оқ ҳалатли кишини кўриб, аввалига ҳайрон қолди. Қария унга кимни-дир, аниқроғи, унга жуда қадрдон бўлган бир инсонни эслатди, аммо кўнглига келган фикрга ишонгиси келмади, шундай бўлса-да, кекса кишининг хурмати учун ўрнидан туриб ўтириди. Келувчи эса уни кўриб, негадир хижолат тортди. Томоқ қириб, ичкарилаш учун ундан изн сўради: “Мумкинми, Алияхон?”. Алия беихтиёр ўрнидан туриб кетди, келувчи журъатсизгина пичирлаб гапирган бўлса-да, бу овозни танимаслиги мумкин эмас эди: “Ассалому алайкум! Келинг, келаверинг, Ҳаким Сатторович!”.

Алия хонанинг умумий чироғини ёкиб, унга стул қўйиб берди. Кейин ўзи ҳам каравотининг бир четига омонатгина ўтириб, хурмат билан ҳол-аҳвол сўради: “Қаранг-а, сиз шунча йилдан бери ҳалиям шу ерда ишляпсизми? Мен сизни аллақачон нафақага чиқиб кетган бўлсангиз керак, деб ўйлагандим”. Ҳаким Сатторович ҳамон каловланарди: “А-а-а, йў-ў-қ, ишдан кетганим йўқ. Нафақага чиқдим, ўн йиллар бўп қолди, лекин ишлаб юрибман”. “Ҳа, энди сиздай илмли, фидойи мутахассисларга жавоб беришармиди? Ёшлар сиз эгаллаган малакани эгаллагунларича беморлар қийналиб қолмасликлари керак-да”, “Ҳа-а, йўғ-е, жуда-а унчалик эмас. Ҳозир ёшлар орасида ҳам зўрлари кўп, лекин шундай ёшлар борки, ўзларидан бошқа ҳеч кимни танимайди ҳам, тан олмайди ҳам. “Сизни ҳамми?” – бу гап Алиянинг оғзидан “лоп” этиб чиқиб кетди-ю, аммо дарҳол тилини тишлади: “Дилини оғритиб қўйдим-да...”. Аммо сұхбатдошининг юз-кўзларида ҳеч қандай ранж аломатини кўрмагач, бироз енгил тортди. “Ҳа, аллақачон кетишим керак эди. Ўзи, соғлиғим ҳам йўқ. Бодим бор. Ўн беш йиллар бўлди, кўп азоб беради. Айниқса, ҳаво бузила-

диган бўлса, жуда мазам бўлмай қолади. Меникциям ноиложлиқдан-да. Биринчи аёлимиз ўтиб қолди. Иккинчи аёлдан туғилган болалар ҳали ёш. Бир ставка иш беришган, навбатчиликларим бор. Нафақага қўшимча-да. Бугун ҳам навбатчи эдим. “Касаллик тарихлари” билан танишаётib, сизнинг исми-шарифингизга кўзим тушиб қолди...”.

Алия минғир-минғир қилиб, тили билан танга санаб, арз-ҳол қилаётган сұхбатдошини тинглаб ўтириб, беихтиёр унинг лойи қотиб қолган кулранг резина шиппагининг тумшуғидан кўриниб турган бармоқларига кўзи тушди. Ҳам ишлиқ, ҳам кўчалик қилиб кийса бўладиган оч кулранг шими ҳам пича узун экан, шекилли, почаси пойабзал пошнаси остида босилавериб, йиртилиб, шатмоқ бўлиб кетган эди: “Бечора, ростдан ҳам жуда мазаси йўқча ўхшайди. Бутунлай ҳафсаласиз бўлиб қолибди. Қаричилик, оиласдаги йўқотишлар... Кейинги хотин ҳам уйига тилсиз-жағсиз хизматкор бўлиб кириб келмагандир... Ўгай она-болалар ўртасида қанча дилхираликлар ўтганлиги аниқ. Булар одамни ҳароб қилмай, нуратмай нима қилади? Шўрлик!..”

У аввалига юраклари ачишиб, қадрдон докторнинг ярим овозда бераётган гурунгларини жон кулоғи билан ҳеч бир малолсиз тинглаб, ўрни келганда далда бериб ўтириди. Аммо ҳар сафар кўзи резина шиппакнинг тумшуғидан мўралаб турган бармоқларга, шатмоқ бўлиб кетган почаларга кўзи тушганда мазаси қочиб кетарди. Қария эса вақт алламаҳал бўлиб қолганини ҳам, ўзининг навбатчилигини ҳам, қаршисида энсаси қотиб, эснаб ўтирган аёлнинг беморлигини, унинг дам олиши кераклигини ҳам буткул унуган ҳолда, ҳар иккаласига ҳам умуман алоқаси йўқ алланималар ҳақида минғир-минғир гап берарди. Навбатчи ҳамшира, уни кўриб, очиқдан очиқ зарда билан, беморлардан бири сўраётганини айтди-ю, Алия ундан қутулиб, енгил нафас олди: “Кексалиқ уни буткул ҳароб қилиби”. Аммо у чиқиб кетгач, бу одам соатлаб ўтириб, нималар ҳақида гапирганини эсламоқчи бўлиб ҳарчанд уринмасин, ҳеч нарсани эслай олмади. Юраги ториқди. Дераза ёнига бориб, куз осмонига қаради, милтиллаб турган ўлдузлар жуда олислаб кетгандек эди.



Замон руҳи, ҳаёт фалсафаси



Абдуғани СУЛАЙМОН

1943 йили туғилған.
Шинжон университетининг
журналистика
факультетини тамомлаган.
“Кўнглимдаги дунё” номли
шеърий китоби чоп этилган.
Матбуотда қатор адабий-
танқидий мақолалари
эълон қилинганд.

Халқнинг руҳиятини англамоқ учун тарихини ўрганмоқ зарур. Ўтмиш сабоқларидан тўғри хulosса чиқарилсагина, миллат тараққий этади. Шу боис чинакам ижодкор борки, тарих ҳақида ёзади, мозий ҳақиқатини бадиий ҳақиқатга айлантириш орқали миллат қалби ва руҳига қувват бағишлади. Эркин Воҳидов, Абдулла Орипов ва Рауф Парфининг шонли тарихимиз тўғрисидаги шеърлари халқимизга ана шундай ҳаётбахш куч бергани бунинг исботидир. Адабиётимизга шоир бўлиб кириб келган, кейинчалик йирик насрый асарлар муаллифига айланган Ўзбекистон халқ ёзувчиси Мұхаммад Али ижодида ҳам тарихий мавзу етакчи мавқега эга.

Адабнинг дастлабки шеърларидан бири қадимий удумимиз улоқ ҳақида бўлиб, халқимизнинг мардона руҳи, шижоати ўз ифодасини топган:

Саф-саф бўлиб баҳодирлар
 Тайёрланур,
 Отланур!
 Ларзalanур ҳозир ерлар,
 Файратлар қанотланур.

Бундай сатрлар, чиндан ҳам, ўқувчи қалбига мардона рух беради, ғайратларга қанот бахш этади.

Мұхаммад Али тарих түғрисида ёзар экан, үтмиш воқөлигини шунчаки қайд этиб қолмайды. Ватан ва халқ кечмишидан бугунги күн учун ибрат олиш, түғрироғи, бой тарихимиз сабоқларини замондошлари онги ва руҳига сингдириш – шоирнің бош мақсади ана шу. Адіб мард ва жасур сарбадорлар ҳақида роман ёзишдан олдин уларнің жасоратини шеърларда васф этганды. Шоир аввало халқимиз тарихида бекіёт ақамиятга эга бу озодлик ҳаралатини келтириб чиқарған сабабларға эътибор қаратади. Үтмишни фақат шоир бўлиб эмас, чинакам тадқиқотчи сифатида ҳам кузатади:


*Бир замонлар, бир замонлар
Озод бўлган ўлкада
Түгилмоқда гўдаклар ҳам
Қамчи изи елкада,
Озод бўлган ўлкада.*

Мазкур тасвир ўша кезда халқ бошига тушган уқубатнің нечоғлик катта бўлганини ўқувчи қалбу шуурига муҳрлаб қўяди. Шеърни мутолаа қиласа экан, китобхон қаттиқ таъсирланади, вужудига титроқ юргурганини сезмай қолади.

Ботир сарбадорлар ғанимнің құдратли ва шафқатсиз эканини билган. Ёв билан кураш осон кечмаслиги маълум эди. Лекин озодлик истаги ҳар нарсадан балаңд келади. Сарбадорлар мустамлакачиларга қарши курашга отланади. Шоир таъбири билан айтганда, гарчи боши узрадор кулоч ёзиб турса-да, улар эрк излади, она юртнің истибод гирдобидан озод бўлишини истади:

*Эрк бер дея кутиб турмас,
Эрк излайди сарбадор.
Гарчи доим боши узра
Кулоч ёзиб тургай дор,
Эрк излайди сарбадор.*

Шеърда иккінчи ва бешинчи мисраларда қўлланган такрор муаллиф ифодаламоқчи бўлган асосий фикрни таъкидлашга, эрк олинади – берилмайди, деган ғояни уқтиришга, мазмуннің таъсир кучини оширишга хизмат қиласа. Биринчи ва учинчи сатрларда туроқнің бир хилда 4+4, қолган мисраларда 4+3 тарзидা



келиши мазмун ва оҳанг уйғунылигини, бадиий буёқдорликни таъминлаган. Умуман, ушбу шеър назм техникаси жиҳатидан ҳам ўзига хос.

Авлодлар онги ва руҳида сарбадорлар эрк ва озодлик ҳақида қўшиқ бўлиб қолгани ифодаланган қўйидаги поэтик хуносада:

*Эркни севган авлодида,
Эркни севган ҳақида
Кўшиқ бўлиб қолди мангу
Эрк, озодлик ҳақида,
Эркни севган ҳақида!..*

Мұхаммад Али шеърларини мутолаа қиласа экан, замонамиз ёшлари мард ва танти, ҳар қандай мушкул вазиятда ҳам ёвга бош эгмаган, ор-номусни ҳар нарсадан устун билган аждодлари шижаатини ҳис этади. Қалбида ана шундай олижаноб туйғулар жўш урганини сезади. “Кўхна Урганч минораси дейди” шеъри ана шу жиҳатдан алоҳида ақамиятга эга:

*Йиқилмоқда дерлар мени,
Йиқилгувчи йўқ ҳали.
Паноҳ тутган эрлар мени
Киргин жанглар маҳали...*

Кечмиш суронлари бу минорага ўз таъсирини ўтказган. Бирок не-не қирғинбарот жангларда мардлар паноҳ тутган иморат ҳамон мағрур қад ростлаб турибди. Зоро, йиқилиш унинг учун мутлақо ёт тушунчадир.

Чингизхон босиб келганида боши эгилмаган, Жалолиддиндай фарзандидан айрилганида бардоши тўзимаган минора – эрк ва озодликнинг боқий тимсоли. Шоир талқинича, миноранинг боши эгилишини Она Ерга таъзим дея қабул қилинмоғи керак:

*Она Ерга фидо бўлсам,
Ўздан рози бўларман.
Мен ўлмайман! Агар ўлсам,
Тикка туриб ўларман.*

Мардлик, ор-номус, шижаот туйфулари Муҳаммад Алининг тарихий мавзудаги шеърларида юқори пафос билан қўйланади. Унингча, ҳақиқий мард киши ёв қархисида таҳликаға тушмайди. Ор-номуси баланд инсонлар бўронларга тик қарайди. Бундай одамларнинг ҳар бир ҳаракатида шижаот барқ уриб туради. “Спитамен” шеъри рамзий тасвир билан бошланади:

*...Бўрон елар қўчаларда тез,
Кўринганга урап ўзини.
Наҳот ҳеч ким бепарво бу кез
Бўронларга туттас юзини?*

Муҳаммад Али рамзлар, тимсоллар тилидан фойдаланишда катта маҳоратга эга. Унинг шеърларида фикр яланғоч ифодаланмайди, метафоралар воситасида талқин этилади. Бадиий шакл ва мазмун ўзаро уйғунлашиб кетади. Мазкур шеърдаги она юрт ғанимлари рамзи бўлиб келган “барги хазонлар”, “Магриб ёқдан кўчган тўзонлар” сингари тасвирлар ҳам ушбу фикрни қувватлади:

*Кўним топмай ерда, воажаб,
Айланади барги хазонлар.
Қорайтирас ослонни шитоб
Магриб ёқдан кўчган тўзонлар.*



Спитаменни шоир элнинг фидойи фарзанди, озодлик кураши етакчиси сифатида тасвирлайди. Ижодкор бадиий-эстетик идеалининг тажассуми ўлароқ унда жуда кўп фазилатлар мужассам. Бундай ботирларни, эҳтимол, жисман маҳв этиш мумкиндири, бироқ уларнинг руҳини синдириб бўлмайди. Негаки, уларнинг борлиғи Ватаннинг, ҳалқнинг руҳи билан уйғунлашиб кетган бўлади. Зоҳиран сокин кўринса-да, дили тубида бўрон жўшиши сабаби шунда. Мана бу мисраларда Спитамен руҳияти бор мураккаблиги билан ифодаланган:

*...Мен қоя ёнида турибман қалқиб,
Дарё кўзларимга иргитар осмон.
Дўстлар, бир қараашда сокинман балки,
Балки дил тубида жўшмакда бўрон?..*

Шеърда Спитаменга бундай мардона руҳ онасидан ўтганига нозик ишора этилади. Жасур фарзандининг жонсиз вужуди устидаги онаизор ҳасрати алла воситасида талқин қилинади. Сўнгиз мусибат қархисида ҳам қадди эгилмаган, аксинча, шундай ботир ўғлонни дунёга келтирганидан, ёвуздар ҳолини танг қила билган ватанпарвар фарзандни тарбиялаганидан кўнглида ифтихор ҳиссини туйган она сиймоси намоён бўлади:

*Келгинди ёвуздар ҳоли бўлди танг,
Миннатдор онангман, миннатдор онанг...
Алла-ю алла.*

Амир Темур номи фақат босқинчи ўлароқ талқин этилган, бу номни ижобий маънода тилга олиш тақиқланган 60-йилларда Муҳаммад Али шеърига буюк Соҳибқирон образини олиб кирди. Кичик бир эпизод орқали бўлса ҳам, шоир бу образни миллатнинг ҳақиқий қаҳрамони сифатида тасвирлашга эришди. У шундай бир қаҳрамонки, руҳи озодлик курашчиларини мудом қўллади. Мана, буюк Соҳибқирон қабридан келган овоз:

*Эй, тарихчи, этма умримни торож,
Бас. Бундай гапларга эмасман мухтож.
Тори узилса ҳам соз аталур соз,
Бошдан тушиганда ҳам тож барибири тож.
Бу мисраларда миллатнинг озодлик сози,
гарчи тори узилган бўлса ҳам, куйлашдан тўхтамагани таъкидланади. Она ҳалқимиз азалдан салтанат тожига эга эканига урғу*

берилади. Мисралар замирида ифодаланган маънога кўра, бу тожнинг бошдан тушиши вақтинчалик. Кун келиб миллат салтанат тожига яна эга бўлиши аниқ. Ўша мустабид замонда, сатрлар зимнида бўлса ҳам, бундай фикрни ифодалаш катта журъат талаб қилган. Бунинг учун шоир чинакам ватанпарвар, ҳақпарвар бўлиши зарур эди. Шу ўринда профессор Бегали Қосимовнинг "...тарихий мавзу Муҳаммад Алиниңг биринчи тўпламидан охирги китобигача етакчи мавзу сифатида



ардоқланиб келаётир. Хусусан, ҳалқимизнинг эрк ва мустақиллик учун қураши масалалари тарихий мавзудаги асарларига сарлавҳа бўла олиш даражасига кўтарилиган", деган эътирофи эсга келади.

Муҳаммад Али шеъриятида Ватан мавзуси алоҳида мавқега эга. Шоир она юртига муҳаббатини куйлар экан, бошқа ижодкорларни тақрорламайди.

Йўлим тушди сендан кўп йироқ,
Хузурингга қайтгумдур бироқ.

Ахир, айт-чи, бегона элда
Кимнинг баҳти, ҳаёти кулган?

Кўкка отсанг, ҳатто ҳиссиз тош,
Ерга қайтар, олиб кетмас бош...

Ватандан йироққа йўли тушар экан, чин фарзанд қалбини соғинч ҳисси чулғashi аён. Ёт элларда шунчаки сайёҳ эмас, балки йирик салтанатнинг хукмдори бўлган Бобур қисмати

фикримизни исботлайди. Бетакрор шеърияти, нодир табиблик салоҳияти билан ўзга юртда эътироф қозонса-да, юрагини она юрт соғинчи ўртаган Фурқат тақдиди бунга мисол бўла олмайдими?.. Шоир ҳаётий мисол билан фикрини хуласалайди: ҳатто кўкка отилган ҳиссиз тош ҳам ўз ватанига, заминга қайтиб тушади-ку. Нега энди яралмишлар афзали одамзод Ватани қадрламаслиги керак?!

Муҳаммад Али ҳаётни чинакам ижодкор кўзи билан қузатади, ҳамма кўриб турган воқеилиқдан бошқалар пайқай олмаган ҳикматларни сезади. Зоро, ҳақиқий шеърда ҳаётнинг ана шундай теран фалсафаси бутун зиддияти билан акс этади.

*Болалар улгаймоқ истарлар,
Дунёни чулгамоқ истарлар.*

*Кексалар яшармоқ истарлар,
Ёшларин яшишмоқ истарлар.*

*Ҳаёт на кексарур, яшарур,
Ул – қари, ул – ёшдир бир умр.*

Ҳалқона ҳикматларни бетакрор бадиий ифодалашга интилиш шоир шеъриятининг муҳим йўналишини ташкил этади. Ҳалқимизда "Шодлигингни бўлишсанг – кўпаяр, қайғунгни бўлишсанг – камаяр" деган машҳур нақл бор. Бу ҳикмат шоир тўртлигига қуидагича бадиий талқинини топган:

*Элга бағрингни оч, боринг кўр баҳам,
Бу қадим ҳикматга қулоқ бер, одам:
Кувончинг бўлишсанг – кўпаяр қувонч,
Ғамингни бўлишсанг – камаяди гам...*

Адабий-эстетик қарашларида ижодкорнинг даражаси намоён бўлади. Муҳаммад Али бир шеърида "Шоирлар сафифа бари – биринч! Шоирлар ичиди иккинчи бўлмас!" деган тўхтамга келади. Юксак мэрраларни кўзламасдан ижодда юқори натижага эришиб бўлмайди. Биринчиликка интилмаган ижодкор иккинчиликдан ҳам бенасиб қолади.

"Ойбек вафотига" шеърида ҳам шоирнинг адабий-эстетик қарашлари ўзгача талқин этилган:

*Гоҳи Замин узра булуатли карвон,
Зангори осмон,
Гоҳи Замин узра зангори осмон,
Булуатли карвон...*

Аввало, шеърда
мутлақо ўзгача
услуб танланган.
Мисраларда сифат-
лашларнинг ўзаро
алмашиниб келиши
услубнинг ўзига хос-
лигини таъминла-
ган. Шоир “булутли
карвон”, “зангори
осмон” бирикма-
лари замирига
теран маъно жойлай
билган. Уларнинг
ўзаро алмашиниши
эса ўқувчи эътибо-
рини муаллифнинг
асл муддаосига
қаратади.



*Ҳаволар осуда, событ туюлур,
Сокит туюлур,
Сойлар ҳам сойларга сокит қуюлур,
Сокит қуюлур.
Фақат титраб қўяр Замин хас каби,
Замин хас каби
Портлаб кетганида шоирнинг қалби,
Шоирнинг қалби...*

Ана шу мўйжаз шеърда Ойбекнинг қисмати, уму-
ман ижодкор тақдирни барча мураккабликлари билан
қаламга олинган. Чинакам ижодкор шахс қалбининг
замин мувозанатини белгилай олиши ҳақидаги
теран фалсафа ўқувчи кўнглида акс садо беради.

Ижодкор бўлиш – изтиробларга ошно тутињмоқ,
демақдир. Чинакам адаб зиммасидаги масъулият
шунчалик каттаки, уни кўтармоқ ҳар кимнинг ҳам
ҳадди эмас. Муҳаммад Али талқинича, шоир қал-
бida илоҳий бир ўт бор. Бу ўт шундай кучга эгаки,
унинг учқунлари қаҳратонларни ортга чекин-
тиради. Ижодкор қўлидаги нозикадо уд саслари
юракларга шиддат-шижоат туйғуларини олиб
кирмоққа қодир. Фақат бунинг бир шарти бор:
ҳақиқатга офтоб мисол кўз солмоқ ва туз ҳурмати,
нон ҳурмати фақат рост сўзламоқ:

*Сен шоирсан, қалбингда бор илоҳий бир ўт,
Қаҳратонлар чекингувчи учқунларидан.
Кўлларингга олганингда нозикадо уд,
Юракларга шиддат киргай сас-унларидан.
Офтоб мисол ҳақиқатга солсанг кўзингни.
Туз ҳурмати, нон ҳурмати – рост сўзла фақат!*

Бироқ яна бир ойдин ҳақиқат ҳам бор. Ҳақ
сўзни айтиш осон эмас. Аксар замонларда
рост сўз таъқиб қилиб келинган. Ана шу ерда
кураш бошланади. Бу кураш кўпинча шоир
ботинида кечади. У танлаши керак: рост ёки
ёлғон. Биринчиси баъзан муаллифга таъна,
дашном, алам, изтироб келтирса, иккинчиси
гоҳо сохта шараф, сохта шон олиб келади.
“Шеърнинг яралиши” сарлавҳали шеърида
шоир шундай ёзади:

*Шеър яралди дунёда илк бор,
Илк бор оҳанг шаклга кирди.
Ва майдонда қолди устувор,
Кураш деган фаслга кирди.
Кўнгилларнинг сийловисан, Шеър,
Ёрг дардлар ила тўлуг сен.
Эзгуликнинг яловисан, Шеър,
Ёвзликка отилган ўқ – сен!*

Муҳаммад Али катта ижодий тажрибага
эга, салоҳиятли шоир, атоқли адаб. Хоҳ тари-
хий, хоҳ замонавий мавзуда ёзилган бўлсин,
унинг шеърлари кўнгилга нур олиб киради.
Ўқувчини ўз-ўзини тафтиш қилишга маж-
бур этади, миллатнинг мураккаб ва шонли
тариҳи сўқмоқларига олиб киради, руҳият-
нинг ёруғ манзиллари сари етаклайди. Шу
орқали шоир шеъриятимизнинг сўнгги ярим
асрлик тараққиётига муносиб ҳисса қўшиб
келмоқда.



Аравакаш

Ҳикоя



Тошкентга борадиган бўлиб киракаш машиналарга яқинлашдим. Қўлида калит ўйнаб, мижоз пойлаб турган ҳайдовчилар бир зумда атрофимни қуршаб олишди. Лом-мим демасимдан бири қўйиб-бири савол беради:

- Ўзингизмисиз?
- Тошкентнинг қаерига борасиз?
- Қанча бермоқчисиз?

Мен ҳам анои эмасман. Тажрибам етарли, йўл юравериб пишиб кетганман. Ҳайдовчи билан қандай келишишни, қанақа машинага ўтиришни яхши биламан. Аввало, йўлкирани узоқ савдолашаман, сўнг машинанинг ҳолатини кўздан кечираман, иложи бўлса янгириғига чиқаман, йўлда бирор ишкал чиқмасин дейман-да. Кейин, олдинги ўриндиқقا ўтириш, узоқ йўлда зерикмаслик учун албатта, менга қўшиқлари маъқул ҳофизни эшитиш шартини қўяман. Орқа ўриндиқ бошқа мижозлар билан тўлишини узоқ кутолмаслигимни ҳам айтаман.

Шодмон ОТАБЕК,
Ўзбекистон Республикасида
хизмат кўрсатган маданият
ходими.

1946 йили туғилган.
Тошкент давлат университети (ҳозирги ЎзМУ)
нинг ўзбек филологияси
факультетини тамомлаган. “Япроқдаги нур”,
“Энг бахтили кун”, “Ширмонбулоқ оқшомлари”,
“Одамийлик синовлари”,
“Дўрмон ҳангомалари”
каби китоблари чоп этилган.

Тирикчилик важидан боёкиш ҳайдовчи ҳамма шартимга кўнади, инжиқликларимга ҳам чидайди. Аммо негадир бу гал таъбимга мос машина ҳа деганда топилавермади. Қора нимча кийган, найнов, турқи-туриши совукроқ ҳайдовчи билан узоқ тортишдим. У деярли ҳамма шартларимга кўнди, фақат нархини келишолмадик. Шунда бир четда тортишувимизга жимгина қулоқ солиб турган, ёши қирқлардан ошган, хушрўй ҳайдовчига қўзим тушди. Үнга яқинлашиб, энди гапирмоқчи эдим, ҳалиги найнов дарҳол ўртага тушиб, ҳамкасбига иддаоқилди:

– Сен биздан кейин келгансан, ҳаққинг йўқ олиб кетишга!

– Хўп-хўп, – деди хушрўй ҳайдовчи қўлини кўксига қўйганча кулимсираб.

– Сендан ортса олиб кетаман, фақат... муомалани ширин қилгин.

– Ие, бу ёғи қизиқ бўлди-ку, – дедим найновга тик қараб. – Сиз нега тазиқ қилиятсиз? Сиз билан келишолмадик, нима, энди бошқа ҳайдовчи билан кетолмайманми?

Найнов бундай темир мантиқ олдида бир лаҳза талмовсирагандек бўлди, аммо барибир отдан тушса ҳам эгардан тушмади.

– Кейин келган кейин кетади, барибир кутиб туриши керак.

– Эй инсон, – дедим жаҳл билан. – Ҳеч ким нонингизни яримта қилаётгани йўқ, нега тушумайсиз? Одамларни норози қилманг, йўлда юрасиз, қарғиш эмас, дуо олинг.

– Э, менга ўргатманг! – деди найнов тўнгиллаб.

– Ука, муомалани ширин қилгин, шунда... ҳаммаси яхши бўлади, – деди хушрўй ҳайдовчи яна муросага унданб.

“Муомалани ширин қилгин”. Ибратли гап экан, ўзиям икки марта айтди. Шу йигит билан кета қолай. Яхши йигитга ўхшайди.

Мен уни четга тортдим. Йўлкирани осонгина келишдик. Бошқа мижозларни кутиб ўтирамасданоқ йўлга чиқишимиз мумкинлигини айтганда ҳайрон бўлдим.

– Бунақада тирикчилик нима бўлади? Топганингиз бензин пулига ҳам етмайди-ку!

– Қаноат қилганга худо ўзи етказади, ака, – деди у кулиб. Ишонқирамаганимни сезиб, қўшимча қилди. – Кечки самолётга улгуришим керак. Ҳамқишлоқларни кутиб оламан. Мени хизматимга яраша рози қилишади.

– Э шундайми? Үнда кетдик, – дедим омадим чотганидан хурсанд бўлиб.

Йўлга чиқдик. Вилоят марказидан ўтиб, довонга борадиган катта йўлга бурилдик. Оқ “Нексия” пахталари териб олинган қорамтири-қўнғир далалар, барглари сарғайиб тўкила бошлаган дов-дараҳтларни ортда қолдириб елиб кетди.

– Ака, йўлимиз узок, агар хўп дессангиз, гурунглашиб борамиз-да энди, – деди ҳайдовчи.
– Мен гаплашишни яхши кўраман.

– Яхши бўларди, – дедим-у, андак ўйланниб қолдим: ишқилиб, тинимсиз эзмаланиб бошимни қотирвормасмикин?

– Аввало, танишиб қўйсак, менинг исмим Маъмуржон.

Мен исмимни айтдим.

– Раҳмат, ака. Шоир айтмоқчи, энди “Ўртада бегона йўқ”.

Машхур шоирнинг машхур шеъриниям биларкан. Ўқимишли йигитга ўхшайди. Бунақалар аравани қуруқ отпӯчмайди.

Орага сукунат чўқди. Машина бир маромда, енгил силкиниб борарди.

– Дарвоқе, мана шу юришим бўладими, ака?
– деб сўради Маъмуржон қўлини рул чамбарагига уриб қўйиб. – Мен бундан тез юролмайман.

– Шуниси яхши, бехавотирроқ.

– Агар ишингиз шошилинч бўлса...

– Шошаётганим йўқ, хижолат бўлманг.

– Эсимни таниганимдан буён машина ҳайдайман, ака, – деди Маъмуржон енгил тортиб.

– Тажрибам етарли. Тайгада икки йил ишлаб келганман. Агар истасам, тезроқ юришим ҳам мумкин. Аммо етмиш, саксондан оширамайман, шуни ўзимга қоида қилиб олганман. Айтганингиздек, шуниси бехавотир. Ўша бориладиган жойга ярим соат кейин борилса нима бўпти? Инсоннинг ҳаёти ҳамма нарсадан азиз-ку. Мен машинамга ўтирган одамнинг ҳаётига ҳам жавобгарман. Уни эсон-омон манзилига етказиб қўйишим керак. Афсуски, буни ҳамма тушунмайди. Ахир, ҳамма бало-фалокатлар шу тез юриш оқибати эмасми? Ҳозир айrim кишиларнинг ўткаси йўқ. Бир нарсадан қуруқ қолаётгандек тез юришади. “Права”ниям ўқимай олишадими, нима бало?! Яқинда йўл ҳаракати қоидалари қайта кўриб чиқилди. Озгина қоидани буздингми, тамом – отнинг калласидек жарима тўлайсан. Менимча, тўғри иш бўлди. Шўпирлар ҳам анча ҳовридан

тушиб қолди. Ҳамма нарсада тартиб-интизом бўлиши керак-да, шаҳар бедарвоза эмас-ку! Тўғрими, ака?

Машинанинг бир маромдаги тебранишидан кўзим илиниб, андак мизғибман, Маъмуржоннинг луқмасидан кўзим очилиб кетди.

– Тўғри, тўғри, – дедим кўзларимни ишқалаб.
– Агар уйқунгиз келса, ухлайверинг.
– Йўқ, бўлди энди...

– Ака, мен бир аравакашман, – деди Маъмуржон йўлдан кўз узмай. – Тирикчилигим мана шу машинанинг орқасидан. Тўртта филдирак айланиб турса бўлди, қора қозон қайнаб туради. Институтда ўқиши насиб қилмади. Мактабда ёмон ўқимагандим. Мендан пастроқ ўқиганлар ҳам йўлини қилиб дипломли бўп кетишиди. Мен унаقا... йўлини қилгим келмади. Ҳаётимдан нолимайман. Ўқимаган бўлсан ҳам, оқ-қорани танийман, пайти келса ҳақимни талаб қилишният биламан. Умрим асосан йўлда ўтади. Ҳар хил одамларни кўраман. Яхши ҳам, ёмон ҳам учрайди. Менимча, яхши одамлар кўпроқ. Акс ҳолда, бу ҳаёт кун-паякун бўлиб кетарди. Боя айтдим, шекилли, Тайгада икки йил ишлаб келиб, шу машинани олдим. Ҳамқишлоғим ўша ерда ишбошқарувчи эди. Уни қора тортиб борувдим. Олдинига ишим туппа-тузук юришиб турди. Кейинчалик мен ишонган одам фирромлик қила бошлади, ҳақимдан уриб қоладиган бўлди. Охирида ярим йиллик маошимни бермади. Менга роса алам қилди. Үнга тавалло қилиб, “Яхши иш қилмаяпсан, мен бу совуқ ерларга сенинг бир оғиз гапингга ишониб, бола-чақа боқаман деб келганман. Бозори ва мозори бир одамлармиз, ҳақимни берақол” дедим. “Ҳақинг менда қолиб кетмайди, оларсан бирор кун”, деди мужмал қилиб. Нимаям дердим, бегона юртда ҳаммага кулги бўлиб ҳамқишлоғим билан ёқа йиришмайман-ку. Худога солдим. Инсофисиз экан, барибир ҳақимни бермади. Юрга қайтгач, дуч келиб қолганимизда мени кўрмагандек тескари ўгирилиб кетадиган бўлди. Кишининг кўнглини оғритиб бўлмас экан. Кўп ўтмай худо уни жазолади. Қўқнори билан қўлга тушиб, қамалиб кетди. Барибир унга ачиндим. Бола-чақаси чирқиллаб қолди-да. Иссик-совуғидан хабар олиб турдим. Нима бўлгандаям, ўша эски гап – мозоримиз бир. Билса – балиқ, билмаса холик билади, дегандай...

Бир маромда елиб бораётган машинамиз довоңга яқинлашиб қолган эди. Ярим очиқ ойнадан ураётган салқин шамолдан жунжикдим. Фаросатли ҳайдовчи буни дарров пайқади.

– Ойнани сал кўтариб қўяйми?

– Майли, – дедим.

Маъмуржон қўлини узатиб, тугмачани босди. Шамолнинг ғувиллаши пасайиб қолди.

Бир аравакашнинг сухбатларидан завқланардим. Одамга малол келмайдиган, кўнгилга яқин туюладиган бундай гурунгни яна қаерда эшитиш мумкин?

Сухбат пилигини кўтариш учун сўзамол аравакашни яна гапга солгим келди.

– Маъмуржон, бола-чақадан қалай?

Аравакаш беихтиёр жонланди, юзида мамнунлик ифодаси пайдо бўлди.

– Худога шукр, беш фарзандим бор, – деди Маъмуржон чехрасига қизиллик югуриб, фурур билан. – Бир қиз, тўрт ўғил. Мана секин-секин ўйли-жойли ҳам қиляпман. Ҳаммасидан кўнглим тўқ, фақат шу... қиз боланинг иши қийин бўларкан. Фарзанд ўнта бўлса ўрни бошқа, аммо шу қизимга бўлакча меҳр қўйганман. У ҳам мени еру кўкка ишонмайди. Қиз бола отага меҳрибон бўлади, дейишади. Ҳақ гап экан. Уни ёлғиз қиз деб ортиқча эркалатмаганмиз, ўй-рўзфор ишларига пишиқ-пухта. Мундоқ қараганда бир оилани гуллатади. Энди қарангки, шу қиз ҳам goҳо қайнонасига ёқмай қоларкан, бир ойда, икки ойда кўзида ёш билан уйга йиглаб келганда дунё кўзимга қоронги кўриниб кетади. Орага тушиш ноқулай бўлса-да, фарзанд тақдирига бефарқ қарай олмас экансиз. Аввало, бетимни шартта сидириб, куёвбola билан очиқасига гаплашиб олдим. Балки хотиндан кўнгли совиғанмикин деб ўйладим-да. Йўқ, унаقا эмас экан. Дадил туриб, хотиним билан яшайман, менга бошқаси керак эмас, деди. Хайрият, дедим ўзимча. Кейин инжиқ қайнона билан жиддий гаплашдим. Қани айтинг-чи, келин қайси ишингизни қилмаяпти? Гарчи ўзим қўйди-чиқдини ёмон кўрсам ҳам, шундай дейишга мажбур бўлдим. Хайрият, ўшандан буён қизим оиласи билан тинч-тотув яшаяпти. Пайти келганда керакли гапни керакли жойда айтиб ҳам туриш лозим экан. Мен шундай хуласага келдим.

– Тўғри айтасиз, – дедим Маъмуржоннинг куйиниб айтган гапларидан таъсирланиб.

Ажабо, унинг бир қарашда оддийгина туюладиган гапларида ҳам бир ҳикмат бордек эди: “Керакли гапни керакли жойда айтиб ҳам туриш лозим экан”.

Машина довоңдан ўрлай бошлади. Ойнага майда ёмғир томчилари урилар, атрофни гира-шира қоронғилик ва туман чулғай бошлаган, олдинда илонизи йўл зўрга қорайиб кўринар эди. Маъмуржон тезликни янада пасайтириди. Суҳбат ҳам ўз-ўзидан узилиб қолди.

Маъмуржон дискни магнитафонга жойлагач, ҳофизнинг овози янграй бошлади:

*Карвон кўрдим, тұялари бўзлаб келар,
Нортуюда мени ёрим излаб келар.*

Бир зум бошимни орқага ташлаб, кўзларимни юмдим. Куй сеҳри бутун вужудимни аллалаб, сарҳуш қилди. Ҳузурбахш шу ҳолатнинг яна узоқ давом этишини истардим. Тезлиги оша бошлаган машина аста силкита бошлагач, оҳиста кўзларимни очдим. Туман ҳам тарқаб кетган, оқшом қулоқлашган, машина чироғида йўл анча равон қўринар эди.

– Истасангиз, бирор жойда тўхтаб, чой-пой ичволамиз, – Маъмуржон йўлдан кўз узмай тақлиф қилди.

– Майли, – дедим рози бўлиб. – Ўзингиз аэропортга кечикмайсизми?

– Самолёт кеч соат ўнда келади, бемалол улгурман, – Маъмуржон соатига қараб кўйгач, тезликни пасайтириб, йўл четидаги чойхона қаршисида тўхтади.

Чойхона сўлимгина, файзли экан. Шарқираб оқиб турган тип-тиниқ булоқ сувида юз-кўлимизни ювгач, якондозлар тўшалган сўрига чиқиб ўтиридик. Чироқлар ёқилган, атроф чароғон. Фир-ғир шабада эсиб турибди.

Ёшгина ўсмир йигит чопиб келди. Тавозе билан саломлашгач, қандай овқат ейишимиизни сўради. Маъмуржон менга юзланди.

– Сиз нима десангиз – шу, овқат танламайман, – дедим.

– Мен ҳам йўлда овқат танламайман, – Маъмуржон завқланиб гаптирди. – Бизга ўхшаган аравакашларнинг ризқи-насибаси йўлларга сочилган. Шунинг учун борига, етказганига шукр қиласмиз.

Оқшом чўкиб, мижозлар сийраклашган, чойхонада шўрва билан кабоб бор экан, холос. Борига қаноат қилиб, тоғ йўлида иштаҳа билан овқатландик. Кейин кўк чойни майдалаб, сух-

батлашиб ўтиридик. Буни одатдаги суҳбат деб бўлмасди, чунки асосан Маъмуржон гаптирас, мен тинглар эдим. Қизик, мундоқ қараганда унинг гап-сўзлари, ҳикоялари янгилик эмасдек, ҳар куни ўзимиз кўриб-эштиб юрган воқеа-ҳодисалар... Аммо ҳайдовчининг тилида бўлакча бир маъно касб этар, шуниси билан қизиқ ва мароқли туюлар эди. Назаримда, ҳали Маъмуржоннинг асосий гап халтаси очилмаган, йўлда бундан ҳам ғаройиб-ажабтовур тафсилотларни эшитадигандек эдим. Тахминим тўғри чиқди.

Довоңдан ўтиб, ярим соатлар йўл юрганимиздан сўнг. Маъмуржон ногоҳ йўл четида турган машинани кўриб, дарҳол тўхтади. Кабинадан тушаркан, “Мен... ҳозир”, деди-ю, ўша машина томон тез юриб кетди. Ҳайдовчи билан бир оғизгина гапглашди-ю, тезда қайтиб келди. Машинасини қайта ўт олдиаркан, изоҳ берди.

– Тинчлик экан, мен бирор ишқал чиқсан бўлса, ёрдам-пордам керак эмасмикин деб тўхтовдим.

– Ҳамма ҳайдовчи ҳам бундай қилмаса керак? – хаёлимга урилган саволдан ўзимни тиёлмадим.

– Ҳар кимнинг гуноҳ-савоби ўзининг бўйнида, aka, – деди Маъмуржон жиддий тортиб.

– Ҳайдовчи ҳалқи ҳам хом сут эмган банда: яхшиси бор, ёмони бор. Ҳалиги саволингиз бир воқеани эсимга солди.

– Қани-қани, эшитайлик, – дедим қизиқсаниб.

– Тошкентга тўрт йўловчи билан келаётгандим. Манзилга беш-олти чақирим қолганда машинам бузилиб қолди. Шу урина-ман, қани энди, тузала қолса. Қоронғи тушиб қолган, йўловчилар безовта-тажанг. Ўзим ҳам...

Йўл четига чиқиб, кўл кўтараман, қани энди, бирортаси тўхтаса. Ахийри биттаси тўхтади. Хайрият дея ёнига чопиб бордим. Янги ўттиз бир “Волга” экан. Бунаقا машина кучли бўлади. Машинамни шатакка олиб, манзилга обориб қўйди. Ҳурсанд бўлиб шўпирнинг қўлига ўн минг сўм берсам, пулимни юзимга отиб юборди. Қолмишига “Бу пулингни фалон жойингга тиқиб қўй!” деса бўладими? Жоним ҳалқумимга келди. Шартта бўғиб қўй дедим-у, аммо шайтонга ҳай бердим. Нима бўлса ҳам менга яхшилик қилувди-да. Ука-жон (қўринишдан мендан анча кичик эди), аввало раҳмат сизга, кам бўлманг, шунчалик

яхшилик кўрдим сиздан, кечаси мушкулимни осон қилдингиз, барака топинг, аммо... бунаقا эмас-да, муомалани ширин қилинг, агар берган тулим камлик қилган бўлса, кам деб айтинг, қанча бўлади, ўзи, бу хизматингиз, десам, безрайиб, ўттиз минг бўлади, деди. Вей, инсофинг борми, ўзи, дедим тутоқиб, мен ҳам бола-чақа боқаман деб юрибман, ўзи, Тошкентгача битта йўловчини ўн беш мингга олиб келаман, сен... сен... одам эмас экансан-ку, мана, ол дея яна олдинги пулга ўн минг қўшиб, йигирма мингни қўлига тутқазиб жўнавордим. Анчагача ўзимга келолмадим. Шунаقا инсофисизларни кўрсам чидолмайман-да. Одатим шунаقا. Сут билан кирган қон билан чиқади. Ўзимни ўзгартиролмайман. Ҳа айтгандек, бошқа такси кутаётган йўловчиларим ҳали шу ерда, бу можарога гувоҳ бўлиб туришганди, улар ҳам ўша шўтиргинг қилиғидан дарғазаб бўлишди, ҳатто хезланиб, уни урмоқчи эдилар, мен хай-ҳай, қўйинглар, ёмоннинг жазосини худонинг ўзи беради, дея аранг шаштидан туширдим. Биласизми, ҳаётда яхшилик ҳам, ёмонлик ҳам албатта қайтаркан. Илгари қирқ йилда қайтса, энди жуда тез – қирқ кун ёки қирқ соатда қайтяпти.

– Наҳотки ўша шўтири билан яна учрашган бўлсангиз? – деб сўрадим.

– Топдингиз! Худди шундай бўлди. Бу кенг дунё баъзан жуда торайиб ҳам қоларкан.

– Уни таниб қолувдингизми ёки у сизни... ўзи танидими?

– Унақа одамларнинг башарасини ҳеч қачон эсимдан чиқаролмайман. Довоңдан қоқ ярим тунда водийга қайтаётгандим, йўл четида челягини кўтариб, ўтган-кетган машиналарга музтар тикилиб турган шўтиргни кўриб қолдим. Бензини тугагани аниқ эди. Қоқ ярим тун. Бунаقا овлоқ жойда анча-мунча шўтири тўхташга боти-нолмайди. Боёқишига раҳмим келиб, секингина машинани бир четга олиб, тўхтатдим. Тўғри, уни аввалига танимадим, челягини кўтариб ёнимга чотиб келгандагина таниб қолдим. Шунда ҳам тўхтаганимга афсусланмадим. Аммо у мени дабдурустдан танимади. Капотни очиб, бензин тўла канистрни ерга қўйдим. У челягини канистрга яқинлаштириди. Челакка қуйиб беради деб ўйлади-да. Мен канистрни кўтариб, қўлига тутқаздим.

– Қанча керак бўлса қуйиб олаверинг, – дедим сир бой бермай. Овозим унга танишдек туюлди, шекилли, юзимга ажабсингандек қараб-қараб қўйди, канистрни иккиланиброқ

олди, машинасига бориб, бензинни қуяркан, мендан кўз узмас эди. Орадан кўп ўтмай канистрни ерга қўйди. Мўлжалимча, бензиннинг ярмини ҳам қўймаган эди.

– Ҳаммасини бемалол қуяверинг, – дедим унга. – Бакимда бензин етарли.

– Йўғ-э, ҳаммасини дейсизми? – деб сўради. Сўнг чўнтағини сийпалаб қўйди. Пулим етармикин деб ўйлади, шекилли. Менга яна бир карра қараб қўйгач, қолган бензинни ҳам қўйиб олди. Ёнимга келиб, чўнтағидан пул чиқараркан, сўради:

– Қанча бўлади?

– Сизга текин, – дедим қўзига тик қараб.

– Тушунмадим, нега энди менга... текин? – деди у ҳайрон бўлиб.

– Чунки биз сиз билан эски танишлармиз. Танишлардан пул олинмайди. – Мен киноясиз, самимий гапирадим. У менга узоқ тикилиб қолди. Нихоят, ўша тунги воқеани эслади, шекилли, кўзларини галати пирпиратиб, будранди:

– Э-э, узр, энди танидим, сиз... ўша...

– Ҳа, мен... ўша...

Энди у қўзимга тик қарай олмасди. Ерга боқиб, ўзича минғирлади:

– Узр, мен ўшанда... аҳмоқлик қилиб... ёшлиқ экан... Мени кечиринг.

– Мен аллақачон кечирганман. Келинг, ака-ука бўлиб қолайлик.

У билан қўл олишиб, гўё қайтадан танишдик. Пулинин ёнимга қайта тиқиштирмоқчи бўлувди, кескин силтаб ташладим.

– Уят бўлади! – дедим. – Агар илгари шунчаки таниш бўлсак, энди ака-ука бўлдик. Ҳозиргина дунёда пулдан ҳам азиз, пулдан ҳам зиёда турадиган нарсалар борлигига гувоҳ бўлдик, шекилли. Бояқишининг кўзларида ёш йилтиллади. У билан самимий хайрлашдик.

Маъмуржоннинг ғаройиб ҳикояси мени ўйлатиб қўйди. Балки, унинг ўрнида бошқа, чапанироқ, тезоброқ одам бўлганда, ҳалиги шўтиргинг юзига нордон-нордон гапларни айтиб, ачитиб-ачитиб ўч олган бўлармиди... Шундай қилишга ҳақлидек ҳам эди. Хўш, бундан кимга фойда-ю, кимга зиён? Ўч олган томонга шох-бутоқ чиқармиди? Бир замбил лой бўлган одам шу билан инсофга кириб, бир юмалаб яхши бўлиб қолармиди? Менимча, Маъмуржон бирдан-бир тўғри йўлни танлаган эди. Шундай мулоҳазалар хаёлимдан ўтаркан, унга ихлосим янада ортди. Ҳаётий ҳикояларини тарин эшитгим келди.

– Маъмуржон!

– Лаббай ака!

– Шу... шўпирларга йўловчи қиёфасидаги бе-зорилар ҳужум қилиб туради дейишади. Бунаقا воқеалар кўпроқ тунда содир бўлса керак.

– Менинг ўзимга куппа-кундузи иккитаси дуч келган.

– Йўғ-э, бу қандай содир бўлган? – қизиқ воқеани эшитиш умидида яна қулоғимни динг қилдим.

– Ўшанда Тошкентда таксичилик қилар-дим, – дея янги ҳикоясини бошлади Маъмуржон. – Шаҳарнинг ҳар бир кўчаси, ҳар бир гадойотпомас бурчаги менга яхши таниш. Бир куни Чилонзордан икки ёш йигит маши-намга ўтириди. Мўғулбашара, бақалоқроғи ёнимга, қорачадан келган, қотмароқ шериги орқага ўтириди. Қўйлиққа борамиз, дейишли. Шаҳарнинг нарига чеккасига суриб кетдим. Таксотаркда ишлардим, отнинг калласидек кунлик план бор. Манзилга етгач, бақалоқ беш қаватли бир уйга кириб кетганча гум бўлди. Тажангланиб, орқамда ўтирган шеригига вақт ўтаётганини айтсам, хавотир олманг, кутга-нингиз учун қўшимча ҳақ тўлаймиз, деди. Хўп дея ўтиравердим. Бир маҳал бақалоқ чиқди. Қўлида қандайдир катта тугун. Энди Юнусо-бодга ҳайданг, дейишли. Бу ёғи қандоқ бўлади, йигитлар, десам, ҳаммасини биратўла оласиз, хавотирланманг, дейишли. Ичимдан қиринди ўтса ҳам, ноилож машинани ўт олдирдим. Юну-сабодда кўпқаватли уй олдида тўхтатишиди. Бақалоқ яна ичкарига кириб кетди. Бу гал бир соатча кутиб қолдим. Сабр-тоқатим тугади. Чиқса, бир тузлайман деб яниб турибман. Қуёш ботиб, атроф фира-шира бўлиб қолган эди. Нихоят, бақалоқ чиқди. Ёнимга ўтириши ҳамон энди заҳримни сочмоқчи эдим, улгуролмадим. Қай кўз билан кўрайки, томогимга ва биқи-нимга иккита пичноқ қадалиб турарди. Юрагим шув этиб кетди. Ҳаммаси тамом деб ўйладим. Биз шўпирлар бунаقا воқеаларни кўп эшит-ганимиз, аммо менинг бошимга тушмайди деб ўйлаймиз. Мен ҳам шундай ўйлардим-да. Хом сут эмган бандамиз-да.

Гапирай дейман, томогим қуруқшаб, тилим калимага келмайди. Аранг ўзимни қўлга олиб, гап қотдим:

– Йигитлар, буниси қандоқ бўлди?

– Жим! Гапирма!

– Ахир, шунча вақт хизматингларни қилдим, эвазига...

– Жим! – томогимдаги пичноқ қаттиқроқ тиради. Яна гапирсан, суйворишдан ҳам тоймайдигандек. Алам ва нафрат омихта бўлиб, миямга қаттиқ урилди. Томирларимда қон эмас, алам ва нафрат оқарди. Жунбушга кела-ётган fazabimni аранг жиловлаб, бўйнимни қимиirlatmay гапирдим:

– Э, қўлингдан келса сўйвора қол! Сўйвор, тортиб юбор пичноғингни! Қўлингдан келадими шу иш! Сўйвор, агар қонсираб турган бўлсанг! Бир бошга бир ўлим! Аммо айтиб қўяй, сенларни барибир топишади. Жазодан қочиб қутуломайсанлар. Бешта болам бор, шуларнинг уволи сенларнинг бўйнингда!

Дадиллигим таъсир қилдими ёки бошқа сабабданми, безорилар андак саросимага тушгандек бўлди. Қаттиқ тирадан пичноқлар сал четга сурилди. Эшик тутқичига секин қўл узатгандим, яна ўша таҳдид эшитилди:


– Қимиirlama!

– Хўш, мендан яна нима истайсизлар? – дедим хит бўлиб. – Мана, айтган жойингизга қайта-қайта олиб келиб қўйдим, яна нима керак?

– Пулдан чиқар! – деди бақалоқ хириллаб.

Ўша куни тушумнинг чўғи пастроқ эди, бардачоқдаги бор пулни чиқариб бердим. Жон ширин-да. Қароқчилар пулни чўнтакларига уриб, жўнаб қолишиди. Уларнинг орқасидан қувиш ёки мелисага хабар бериш ўша лаҳза хаёлимга келмади, нест-гаранг эдим. Қандай катта хавф-хатардан қутулганимга ҳали-ҳамон ишонқирамасдим. Ҳаётим ёнимга қолгандек эди.

Ўша машъум воқеадан кейин бир неча кунгача ўзимга келолмай юрдим. Безориларни қидириб топиш ва жазосини бериш керакми ёки худога солиб қўя қолган маъқулми – бу ҳақда иккиланардим. Агар ҳамма қўл силтаб кетаверса, жиноятчининг кетидан тушмаса, безори эртага бошқа одамни қақшатади. Бунақада ҳаёт бориб-бориб дўзахга айланиб кетмайдими? Демак, жиноят албатта жазоланиши керак. Бунақаларни энди яхши гап ёки панд-насиҳат билан тузатиб бўлмайди, гишт қолипдан кўчган, энди уларнинг жойи қамоқ! Мен бу оддий хуносага ўз аччиқ тажрибам мисолида келдим. Мелисаҳонага учраб, бор гапни айтдим. Уларга қуруқ гапнинг ўзи кифоя қилмас экан, ёзib ҳам бердим. Катта дафтар-китобига тикиб қўйишиди берган маълумотларимни. Рўйхатда турадиган



жиноятчиларнинг фотосуратлари ҳам “дело”га тикилиб қўйилар экан, бир ҳафтагача эринмай суратларни кўриб чиқдим. Мелиса билан ихтиёрий ҳамкорлик қилаётган эдим-да. Ҳар куни ишдан кейин мелисаҳонага бориб, “дело” титкилайман. Қани энди, ўша жирканч башаралар топила қолса. Нихоят, ҳафсалам пир бўлиб, энди тополмасам керак деганимда лот этиб ўша бақалоқ қароқчининг фотосурати чиқиб қолди. Худди лотереясига ютуқ чиққан одамдек ҳовлиқиб кетдим. “Дело”да бақалоқнинг тураржойи ҳам ёзилган экан, мелиса билан бориб дарров топдик. Унга юзма-юз бўлишим билан башарасига боғлаб бир мушт туширдим. Ерга йиқилганча кучала еган итдай буқчайиб қолди. Яширмайман, шу лаҳза бир маза қилиб олдим. Муштим ҳам темирдек қаттиқ эди-да.

Қорнига тепмоқчи эдим, мелиса ҳожати йўқ дегандек тутиб қолди. Бақалоқ орқали шериги ҳам осонгина топилди. Улар суд қилинди, жазоланди. Ҳаётда бунаقا жиноятчиларнинг урчиб кўпайиши ёки камайишига ҳам ўзимиз сабабчимиз, ака. Мен шундай оддий холосага келдим. Ўзимиз қандай бўлсак, ҳаётимиз ҳам шундай бўларкан.

Машина тунги чироқлардан чароғон бўлган шаҳарга кириб борар, мен оддий аравакашнинг жайдари фалсафасини хаёлан такрорлаб борардим: “Ўзимиз қандай бўлсак, ҳаётимиз ҳам шундай бўларкан”.

**Адіба УМИРОВА**

1980 йили туғилған.
Ўзбекистон Ёзувчилар
уюшмаси ҳамда Ўзбекистон
Миллий университети
қошидаги олий адабиёт
курсини тамомлаган.
“Яшил түшлар”, “Қыёшга
йўл”, “Ёруғ сирлар”,
“Юрагимдасан” шеърий
тўпламлари чоп этилган.

* * *

Бу чўллар мангу бешак,
Карвон босиб келар йўл.
Бир туюда беланчак,
Бирида баҳмал замбил.

Кўлдан тушимас бир фурсат
Умид деган олтин жом.
Кимга баҳт, кимга кулфат
Олиб келар бу оқшиом.

Парво қилмас дала-туз,
Кумзорлар – ёнар танча.
Бунда изсиздан-изсиз,
Келиб-кетарлар қанча!

Тиним билмас шамоллар,
Афсона тўқири гулхан.
Дунё қайта яралар,
Бор экан-да, йўқ экан...

Кўнглиңгман – кўз юмиб кета олмаган...

* * *

Сизни билмадим-у, менга танишдай
Уфқ ортидаги зангори йўллар.
Кўзим дарёсида яшаётгандай
Нурларга гарқ бўлиб неча минг йиллар.

Айни шу лаҳза ҳам ёргу сирларга
Кўмилган дунёга келганман бирров.
Қонимдан то ўтли нафасимгача
Кўксимни куйдирап ишқ деган олов.

Сановбар тушилардай бариси аён,
Оққушилар руҳимни уйготади, оҳ.
Елкамда қачондир қанот бўлганин
Менга эслатади осмон баногоҳ.

Ноумид эмасман агар айрилсак,
Соямиз қўшилар суман гулида.
Охир-оқибатда яна учрашсак,
Балки сўзлашармиз қушлар тилида!

* * *

Бошқача бўлиши мумкинмас энди,
Ўзгармас қонуналар бордир ҳаётда.
Ёмғирдай шариллаб қўзёшим тинди,
Баҳтсиз кунларимни олмасман ёдга.

Бугундан эртани ўйлайман фақат,
Наҳот, шу ёшгача кирмади ақлим.
Шунча куйганларим етади бевақт,
Ортиқ адашишга ҳаққим йўқ, ҳаққим.

Сиз ҳам барисини унутинг бу тун,
Бехуда гамларга ичикаяпсиз.
Ўлимга ҳар қачон улгурниш мумкин,
Азизим, яшишга кечикаяпмиз.





Оққушилар

Беш-олти ёш эдим, чамаси,
Күлга олиб борганда бобом.
Бир тўн оққушиларниг галаси
Сув бўйида этарди хиром.

Юракларда зарра губор йўқ,
Қамишзорлар чайқалар бегам.
Бир хил рангдан иборат борлик,
Қандай гўзал эди бу олам?!

Эртакларга тўла кўзларим,
Фам нелигин билмасди ҳали.
Хотирамда қолгани шу зум,
Зангор кўлниг зумрад хаёли.

Англаб бўлмас қандайдир согинч
Ва кўнглимни ўртагувчи зор.
Сиз ҳам саир этганимисиз ҳеч
Қушлар билан дунёни бир бор?

Бобом, мен, кўл, бир им овора,
Шундай кечар эди ёз, қишилар.
Болалигим эсласам, дарров
Кўринади ўша оққушилар...

Мен сенинг ўзингдан кечмаган ёдинг,
Умрингни банд этиб қўйган аҳдингман.
Ҳали яшаб улгурмаган ҳаётинг,
Орзуварингдаги гўзал баҳтингман.

Қай ерга борсанг ҳам кўринар юзим,
Азобинг, армонинг, тилагингдирман.
Тилингни ловуллаб қуйдирар исмим,
Ишқиз яшоммаган юрагингдирман.

Кўнглингман – кўз юмиб кета олмаган,
Кўкдаги руҳингман, ердаги йўлинг.
Икки дунёда ҳам тарк этолмаган,
Икки дунёга ҳам бермаган гулинг.

Ҳали очилмаган ёруг сирингман,
Бўйнингга сиртмоқдек осилган сўроқ.
Ҳар лаҳза, ҳар нафас мени севмаган,
Мени согинмаган бирор қунинг йўқ.

Сенга ёқаман деб, йўл топаман деб,
Ишқда, ибодатда адашмадимми?
Беозор майсалар қўзёшин тўкиб,
Бир умр сўқирдай яшамадимми?

Дўзахми вужудим ёндираётган,
Кўксимни куйдирган гул фарёдими?
Ўзимдан ганимдай ўч олаётган
Йўқотган қадримниг ўчмас ёдими?

Жавзо боғларида тентиган мезон –
Беор тушларимниг ўнгимасмикан?
Ўзим билиб-бilmай мен янчган хазон
Кимнингдир топталган қўнглимасмикан?

Пойингдан бошимни қўтаролмайман,
Кўзимдан тўкилар тун изтироби.
Яратган, аён эт, қалбимдаги ишқ
Бу қайси дунёниг гўзал азоби?!

Она


Болаларинг кўзингдан ўтар,
Айтгинг келар баҳор сеҳрини.
Бу ўил ҳам сув оқизиб кетар,
Дарахтдаги сўнгги беҳини.

Хаёлларинг ёқар танчани,
Умидларинг айланар кузга.
Кўлингдаги гулдор нимчани
Илинасан қай биримизга?

Кўринмайди қишининг адоги,
Куриб борар тинка-мадоринг.
Бу дунёда қолмади, ҳоги,
Бир мени деб чекмаган зоринг.

Ўйласанг-чи ўзингни, онам,
Кўпайибди сочингдаги оқ.
Оёгингни иссиқ тут ҳар дам,
Кўз нурингни асрагин кўпроқ.

Нигоҳинг йўл қарайди ҳар қун,
Кулогингга гап кирмайди ҳеч.
Ўйонасан қушлардан олдин,
Юлдузга қўл силкийсан ҳар кеч.



Назар ШУКУР

1954 йили Чироқчи туманиндағы Наврұз қишлоғыда туғилған. Тошкент давлат университеті (хозирги ҮзМУ)нинг география факультетини тамомлаган. "Күндеги умр" (1984), "Қышлак, йұлларда" (1985), "Вақт хиёбонда" (1992), "Мени кечир, мұхаббат" (2004), "Видо" (2005), "Сен қайтмасаң..." (Сайланма, 2006) шеърий китоблари нашр этилған. 1985 йилнинг 14 май күні Тошкент шаҳрида автохалокатдан вафот эттән.

Иқтидорли шоир Назар Шукурнинг деярли ҳар бир сатри санъат даражасыда. Санъаткорона нигөх билан кузатылған ва битилған гүзәл ҳаёт манзаралари – күнгил лавҳалари... "Сомон йұли. Босилмайди, бу йұлнинг чанғи, Ухламайди ўтиб кетген карвоңлар занги", "Киприк-ларим наизасига илинганд осмон", "Юлдузлар-ку олов туёқ теквалар изи, Күзларимни очтирайди чанглари түзиб" ва бошқа барча сатрлари шеъриятимизга янғи нафас олиб кирған шоирларнинг пешқадамларидан эканини күрсатиб турибди.

Йұлдош ЭШБЕК,
шоир

КУЗ ВАРАҚАЛАРИ

УМР ҰТАЛТИ. ҲАЗОНЛАР УЧАР,
ХАР ҚАЛАЙ, ИЗИМ БОР – ШЕВРЛАР ЁЗАМАН.
ФУРЕАТЛАР-БЕРАҚЫМ, ФУРЕАТЛАР-ҮЖАР,
БАЙТ БИТМАГАН КУНАР, НЕТАЙ, ОЗАМАН.

ҚҰРҚАМАН ДУНЁНИ КЕМТИК ҰТМОҚДАН,
НОЗУ НЕГМАТЛАРДИН ТЕКИН ЕБ ФАҚАТ.
ЁМОНИ ЫҮҚ ШУҢДАЙ ӘШАБ ҰТМОҚДАН,
ҚИЛМАЙМАН БУНДАКА ҰМРГА ТОКАТ.

УМРИМНИҢ ӘМ=ҖШИЛ ДОВ=ДАРАХТИДАН
ШЕВРЛАРИМ ҲАЗОНДАЙ УЧСА – ФОХИА!
АГАР ШОД БҰЛМАСАМ БИРОВ ӘЛХТИДАН
БАХТЛИЛАР ОЛДИДА БУ ҲАМ НОЖЫО.


ДИЛИМЕГ ДАРЗ СОЛАР КУЗ ВАСИЛТИ,
ӘПРОБЛАР ЁҒИЛАР МИЕЛИ ҚОРАХАТ,
БАЛКИ БУ КУЗАКНИҢ ҚУТ, ХОЕИЛТИ,
ЛЕКИН ЙҰҚОЛАДИ МЕНДА ФАРОСАТ.

УМР ҰТАЛТИ. ШУНЧА ЁЗГАНИМ
ЗИЛ ТУШАР КҮЗИМГА ҚҰРИНИБ КАМДАЙ.
ТҮГЕЛИБ, ДУНЁГА ҚАДАМ БОЕГАНИМ
МАЛОДИР БАВЗИДА... АДОМАН ШАЙДАЙ.

БҮМ=БҰШ ВАРАҚЛАРДАЙ УЧГАНЬ БАРГЛАРГА
КУНЛАРИМ ҰХШАТИБ, ЮТАМАН ҚОРАК.
КЕЛМЕСА=ДА УМРИМ БАҒИГА ҚАРГА,
ЭХТИЁТ ШАРТИДАК УШЛАЙМАН ҚУРАК...

МЕВАЛАР ТЕРИЛАР, ОМБОРАЛAR ТҰЛАР,
ЖАНУБГА ҰАГУРАР КУШЛАРНИҢ ҒАРИ.
ҲАЗОНЛАР ЁҒИЛАР, ДЕЛИДА УЛАР –
КУЗНИҢ ҚИШГА ИСЁН ВАРАҚЛАРИ.

28.10.84
Д.ЧИҢГІҮРГЕОҚ



Ўзи бир тихор эди

Асқад Мухтор интеллигенти баланд, дунёқараш кенг шоир, ёзувчи, таржимон ва муҳаррир. Умрини миллий адабиётимиз ва маданияти-мизнинг равнақига, жаҳон адабиёти дурдоналарини ўзбек халқига етказишга бағишилган атоқли адид ва жамоат арбобидир.

Атоқли адид қарийб олтмиш йиллик ижодий фаолияти давомида адабиётимиз хазинасини бойитган, юксак бадииятли асарлари билан китобхонлар қалбидан мустаҳкам жой эгаллаган.

Асқад Мухторнинг ўзига хос салмоқли насли, бетакрор шеърияти қатор хорижий мамлакатларда ҳам адабиёт мухлислари кўнглига кириб борган, десак, асло муболага бўлмайди.

Адабининг адабиётимиз ва умуман миллий маданияти-мизнинг равнақи йўлидаги улкан хизматлари муносиб тақдирланган. Асқад Мухтор – Ўзбекистон халқ ёзувчиси, Давлат мукофоти лауреати, “Дўстлик” ордени соҳибиидир.

Чинакам бадиий асар ҳамма вақт жавобсиз саволдир, борди-ю, адид унда бирор муаммо кўтарган бўлса ҳам, бу – амалда ҳал қилиб бўлмайдиган муаммодир. Агар муаллиф амалда ҳал қилинадиган вазифа қўйса, асосан, очерк ёки мақола бўлади. Ёзувчи эса ташвиқотчи эмас, шоир бўлиши керак.

Шоир учун асосий иш – кўнгил кўзи билан кўриш; қоғозга тушириш эса – касб.



1938 й.

Талант ҳақида қуюниб
гапирғанларнинг ҳаммаси ҳам
талантли бўлавермайди. Чунки
ҳеч ким ўзини талантсизман деб
ўйламайди.

Аскад Мұхтарнинг ўз ўрни бор.
У бадшиш иншо нұқташ нағаридан
мұраққад давборда яшади, иншо қылды.
(У ўзининг иншодини шеър битишидан
бошлиди. Умрининг оқиригага бу
ниңардан узоқлашыганы айқ.

Матёқуб Қўшжонов




Пиримқул Кодиров, Абдулла Орипов, Озод Шарафиддинов
ва Одил Ёқубов билан.



Берди Кербобоев, Одил Ёқубов, Константин
Симонов, Фафур Гулом, Баҳром Раҳмонов ва
ижодкор дўстлар билан.

Аскад Мұхтар узун ва баракали умр кўрди, ўлmas асарлар, иншоий мактаб,
истеъодли шоғирдлар, маъриратли фарзандлар қолдирди, агадиётнинг ишонкуяри,
ташкилотчи, арооби ва замонаткаши бўлид ҳамшиша ётиш яшади.

Эркин ВОХИДОВ



Сила а'золари ва яхин қариндошлари билан.

Аскад Мұхтар қалқымизни улкан тинорга қиёслаб роман ёзган
эди. Биздек шоғирдлари, муҳислари нағарида у кишининг ўзи дир
тинор эди. Мен умримда утрамган бутун одамлар даврасининг бошида
Аскад Мұхтар турдиги. Чин инсон Аскад Мұхтардек яшаб ўтади.
Чин адиб Аскад Мұхтардек бўлади.

Эркин АЪЗАМ



Шамол шамни учиради. Шунга ўхшаб, айрилиқ
ҳам шунчаки хушторликни совитиши мумкин, чин
муҳаббатни эса ўт олдиради.

Асқар Мұхтар түркіндегі маданияттың да зиёли инсон эди. У ныкжындағы ділімден, айни наимде, ғылудағы қамтарын, қамсұкум да оғынды ғылудағы ділімден, айни наимде, ғылудағы қамтарын, қамсұкум да оғынды ғылудағы ділімден, Асқар ақа мартабаталаб әмас эди, қамта идораларға өдем білгелі. Асқар ақа мартабаталаб әмас эди, қамта идораларға өдем білгелі.

Низом КОМИЛ

* * *

Езувчи ёлғонны түқійді-ю, ҳақиқатнан ёзади.

* * *

Шоир бұлыши яхши, шоирлик дағво қилиш ёмон.

Адібнинг "Тұңдаликлар" идан олинди.



Қаламқаш дүстлардың даврасыда.



"Гулистон" журнали жамоасы. Үстөз ва шогирдлар.

Асқар Мұхтар дағры кенг инсон эди, олам үнга үз көңгілігінің күрсатды. Асқар ақа парвозны севарды, умри қам юксакда үтди. Асқар Мұхтар Ватаннан қандай икесін дилан севған бўлса, калқымиз үнга үз мұхаббатини шундай саковат ила намоёнт этажетир.

Хусниддин ШАРИПОВ



Вахоб Рұзиматов, Маматкул Ҳазраткулов, Ахмад Аъзам ва бошқалар билан.

Асқар Мұхтар қамта санъаткор бўлганинг утун қам шогирди никожында кўп эди. Аммо шоир уларнинг ҳаммасини қам билавермасан. Билиши шарт қам әмасди. Агадиётда үстозлик сиртдан қам бўлади. Шунинг утун қам Асқар Мұхтар қамта үстоз бўлшишига қарамасдан, үстозлик дағво қимтай үтди.

Машраб БОБОЕВ


Умрим узоқ бўлар, сезиб турар кўнгил...



Сарвар Азимов ва шоир Зулфия билан.



Фиёсiddин ЎНАРОВ
тайёрлади.



ВАКТ ИНСОНСИЗ ХЕЧ НАРСА!

Асқад Мухтор шеъриятида
умр ва инсон моҳияти



Беҳзод ФАЗЛИДДИН

1983 йили туғилган. Ўзбекистон давлат жаҳон тиллари университетининг халқаро журналистика факультетини тамомлаган.

“Муқаддас замин”, “Боғларингдан кетмасин баҳор”, “Онамнинг кўнглига кетамиз”, “Сен қачон гулайсан”, “Кутмаган кунларим, кутган кунларим” номли шеърий тўпламлари чоп этилган.

Ү

збекистон халқ ёзувчиси Асқад Мухтор салмоқли қиссаю романлар, бадиий таржималар, кўплаб ўткир публицистик мақолалар баробарида шеъриятда ҳам етук асарлар яратди. Айниқса, ўзбек фалсафий-интеллектуал лирикаси тараққиётида унинг ҳиссаси катта бўлди.

Асқад Мухтор чинакам адид даражасига етгунича мураккаб ижодий йўлни босиб ўтди. Биринчи шеъри 1935 йили – 15 ёшида чоп этилганига қарамай, илк китобгacha бўлган давр чўзилиб кетди. Буни “мен узоқ вақт китобхон билан тотшиша олмаганимдан кўраман”, дея изоҳлайди унинг ўзи. Шоир “Ўзим ва шеър ҳақида” мақоласида поэзияни тушунишдаги бекарорлиги анча вақтгача давом этганини таъкидлаб ўтади. Гарчи ижодининг ilk палларида битган шеърлари адабий жамоатчиликда ижобий баҳоланганд эса-да, унинг ўз қиёфасини белгилаб берувчи шеърлари хийла кечроқ яратилди. Айниқса, ўтган асрнинг 60–70-йиллари Асқад Мухтор шоир сифатида юксак ижодий чўққига кўтарилди. “99 миниатюра” (1962), “Шеърлар” (1966), “Қуёш беланчаги” (1971), “Сизга айтар сўзим” (1978) каби бирин-кетин чоп этилган китоблари фалсафий-интеллектуал лириканинг ажойиб намуналарини ўз ичига олган. Мазкур тўпламларга киритилган шеърлар ўша давр шеърияти учун янгилик эди. Шоирнинг “вазн ва қофия қонун-қоидаларини бузиб юборган” шеърлари фавқулодда фикр-

нинг гўзал поэтик ифодаси, фалсафий, ўз навбатида, ҳаётийлиги билан кўнгилларга йўл топди. Бундай оригиналлик турли мавзу-мундарижада Асқад Мухторнинг кейинги китобларида, хусусан, “Ийлларим” (1990) тўпламида давом этди.

Асқад Мухтор шеърларининг ўзига хос хусусиятларидан бири (умуман, бу унинг бутун ижодига хос хусусият) фалсафий мулоҳазаларга бой, оддий воқеалардан ҳам катта фикр, салмоқли хulosалар чиқарилганидадир. “Шеър – инжа туйғуларнинг нозик ифодаси, шеър – кўнгил рози, қалб кечинмалари” каби тушунчалар Асқад Мухтор шеъриятида ўзгачароқ можият касб этади. Шоир лирикаси мисолида айтадиган бўлсак, шеър – ҳиссий тафаккур, кўнгил фалсафаси, шеър – фикрнинг туйғуларга ўралган гўзал суврати.

Шоирнинг ўзи иқорор бўлганидек, ийллар давомида шеър, унинг ифода шакллари, воситалари, усуслари, рухи ҳақидаги фикрлари жуда кўп ўзгарди. Асқад Мухтор ижодий такомилида унинг ушбу таърифларига мос кўплаб шеърлар яратилди. Аммо уларнинг барчасида – сюжетли-воқеабанд шеърларида ҳам, мусиқий-оҳангдор, ва албатта, рационалистик шеърларида ҳам ФИКР юзага қалқиб чиқаверади. Бундан Асқад Мухтор шеърлари фақат фикр назмга солинган намуналардан иборат, деган хulosага келмаслик керак. Шоир таъкидлаганидек, фикрсиз поэзия йўқ. Таъбир жоиз бўлса, ҳар қандай шеър бағрида фикр юлдузи яшайди; бир шеърда бу юлдуз порлаб туради, қай биридадир милтиллайди, бошқасида элас-элас кўзга ташланади.

Фикр ва туйғу уйғунлиги лириканинг барқарор қонунларидан. Куруқ фикрнинг ўзи шеър бўла олмаганидек, фақат ҳис-ҳаяжон ифодасини ҳам назм дея олмаймиз. “Бадиий асарда маънавийлик билан ҳиссийлик уйғуналашмоғи керак”, дейди немис файласуфи Фридрих Ҳегел. Энг асосийси, шеърда бу икки муҳим унсур орасидаги мувозанат йўқолмаслиги лозим. Шундай деймиз-у, аммо фалсафий-интеллектуал шеърларда тарози посангиси кўпроқ фикрга ён берини ҳам инкор эта олмаймиз.

Бадиий асарда, инчунин, шеърда фикр ва ҳиссийёт ҳамиша бир-бирини тўлдиради: баъзан ақл туйғуларни йўлга бошлайди, гоҳида ҳиссийёт онг илғаб етмаган ҳодисотни англашга кўмаклашади. Чунки “туйғулар, ҳислар шундай хотира ҳамда доноликка эгаки, кўпинча айни шу хотира ва донолик ақл-идрокимизга етишмай қолади” (Ирвинг Стоун).

Асқад Мухторнинг энг яхши шеърларида фикр ва туйғу синтези зуҳур топади. Шоирнинг икки банддангина иборат мана бу шеърида оний кайфиятдан илҳом олган лирик қаҳрамон лаҳзалик ҳолат-манзара (сарғайиб, сийраклашиб қолган япроқлар аро танга-танга бўлиб тушаётган нур) мисолида инсон умри ҳақида тасаввур беради (дарвоқе, шеърнинг ўзи ҳам “Умр” деб аталади):

Куни кеча шу сўрида ётганимда,
Ой шуъласи тушимас эди юзларимга:
Япроқларнинг титроқ, яшил шарпалари
Ором олиб келар эди кўзларимга.
Бугун бўлса танга-танга нур тушипти.
Мижжам ҳоргин, уйқу бермас ёргу юлдуз.
Бирданига юрагим шув этиб кетди:
Куз келипти, куз...

Шеърдаги ички маънолар силсиласи шундайки, бирор уни ўқиб, умр бебақо, инсон ҳаёти омонат экани ҳақида яна бир қур мулоҳаза қилади; бошқа ўқувчи уни ёшлик завқи ва кексалик оғиркарвонлиги орасидаги зиддиятга боғлади; зийракроқ шеърхон ҳаёт (умр) – кеча тўп-тўп бўлиб, ҳатто ой шуъласини тўсиб турган, бугун эса заифлашиб, новдаларга видо сўзларини айтиб бандидан чирт-чирт узилаётган япроқлар сингари ғанимат экани ҳақида ўйга толади, шу боис умрни кўпроқ эзгу амал, эзгу сўз билан ўтказиш кераклигини тақорор ҳис қилади. Айниқса, шеър сўнгиди лирик қаҳрамоннинг юраги шув этиб кетиши ҳолати шоир назарда тутаётган фикр таъсирчанлигини оширади. Асқад Мухторнинг шу каби сатрларида шеър – унинг ўзи берган таърифлардан бири бўйича айтсак – “ярқ этган оний туйғу”, “шавқ түғёни” экани англашилади.

Ўтаётган лаҳзалар, кечаетган умр соатларини ёруғ юз билан яшаш, келажакка ёрқин из қолдириш инсон учун улуғ ҳаётий мақсадга айланиши лозим. Бу фикр шоир шеърларида турли поэтик усулда ифодаланади. Унинг “Вақт” шеърида фурсат ва инсон муносабати, зиддияти оригинал бадиий тажассум топади:


“Вақт” – ўз-ўзича ҳеч нарса эмас,
“Давр” десак – исмли, жисмли.
Вақт қаритади-чуритади, холос,
Давр – инсон каби, дардли, ҳусни.
Вақт сўндиради эҳтиросларни,
Ёшликни юлқилаб қочар омонсиз.
Чандек учар, инсон из солмаса;
Инсон ном бермаса – ўтади номсиз.

Вақтнинг ўз-ўзига қўйиб берилса борми, шоир айтмоқчи, шафқатсиз кечади, ҳаялла-майди: “Ўзи тиклолмайди ўз қоматини, Ўзи келажакни тайёрламайди”. Шундай экан, Вақтга шакл ва мазмун беришга, уни зийнатланти-ришга, лаҳзаларни мангаликка муҳрлашга интилиш керак.

Ушбу шеър ёзилишидан ропта-роса йигирма йил олдин (1945) аллома шоир Fafur Fулом вақт ҳақидаги шоҳ сатрларини битган эди. Шеърда бир лаҳза мазмунини бир бутун баҳорга жамлаган Fafur Fулом инсон қудратини вақт билан ўлчаса, Асқад Мухтор вақтни инсон измига топширади: вақт инсонсиз ҳеч нарса!

Асқад Мухторнинг кўплаб шеърларида лирик қаҳрамон – шоирнинг ўзи – донишманд, ҳаётнинг аччиқ-чучугини татиб кўрган, мулоҳазакор шахс. Унинг ўз ҳаёт фалсафаси бор. Эзгулик ва ҳақиқат учун кураш, азизу мукаррам хилқат ҳисобланган инсон номига муносиб иш тутиш, шахс маънавиятини юксалтириш йўлида бетиним ҳаракат шеърлардаги қаҳрамон эътиқоди негизини ташкил этади. Умуман, умр моҳияти, ҳаёт маъносини, инсоннинг макон ва замондаги ўрнини англаш, идрок этишга уриниш, бу борадаги фикрларни бадиий-фалсафий талқин қилиш фалсафий-интеллектуал лириканинг асосий хусусиятларидан ҳисобланади. Асқад Мухтор шеърларида эса бу жиҳат бўртиб кўринади.

Дақиқа ва абадийлик, кун ва тун, ёруғлик ва зулмат, ҳаёт ва ўлим тазод-жуфтлиги Асқад Мухтор лирикасида алоҳида мазмун-моҳиятга эга. Ўтган, ўтаётган кунни сарҳисоб қилиш, ўз-ўзини мунтазам тафтиш этиш унинг қаҳрамонига хос хислатлардан.



Орифу фозиллар инсон кун парчаларидан иборатлиги, ҳар куни унинг вужудидан бир парча кетиши, ҳар лаҳза ҳисобли экани ҳақида айтиб ўтадилар. Асқад Мухтор шеърлари инсон умрининг лаҳзаларга сочилиб ётган моҳияти ҳақида баҳс этади. Бу “Йилларим”, “Сирли нидо”, “Қайтаман кечирган куним...” каби шеърларида, айниқса, равшанроқ кўринади.

Ёш ўтгани сайн инсон феъли нозиклашиб, туйғулари ингичкалашиб боради. Чунки ортда қолган умри ҳақида ўйга толган киши учун “Йил қузатиш – фам”. “Янги йил сарҳадини бузиб ўтган нафис қор учқуни” эса уни баттар хавотирга солади. Ахир, умр ўтмоқда. Бу ҳолатни шоир, мана, қандай образли ифодалайди: “Қилт этиб узилган битта япроқ ҳам Нақ қалбимга тегиб ўтади...” (“Қалбим нозиклашди”). Шоирнинг бу турқумдаги шеърларида ижтимоий-фалсафий залворга эга жиддий фикр туйғулар итпини тортиб туради.

“Ярим тундан кейин ўрнимга ётсам...” деб бошланувчи шеърида реал воқелик билан шоирнинг тасаввур олами, ўй-изтироблари тарозига қўйилади. Лирик қаҳрамон “Ярим тундан кейин ўрнига ётса, Қонининг уриши бермайди уйқу”. Эътибор қилинг-а, ўзи, шоир ярим тундан кейин ухламоқчи бўлди. Бунгача не-не ўй-хаёллар, безовта фикрлар банд этган экан уни. Кун бўйи турли ташвишлар, яхши-ёмон ҳислар оғушида юрган қаҳрамоннинг ўйлари марказида умр ва вақт, давр ва замон ҳақидаги мулоҳазалар, ўтмиш ва келажак ҳаёли бўлганини сезиш қийин эмас. Хўш, унга қон уриши нега тинчлик бермай қолди? Нима экан шоирни бу қадар түгёнга солаётган?

Шеърни ўқишида давом этамиз:

Узоқ аждодимнинг овозидир бу.

Ушбу даъваткор овоз шоирни ором чоғи ҳам тинч қўймайди:

Гапир,

гапир,

гапир,

ҳаётсан!

Мана унинг бизга бераётган саволлари:

– Борми ҳақиқатга ҳамон ташналар?

– Одам юлдузини кўқдан уздими?

– Боглар қўкми?


– Тиниқми чашмалар?

– Қизларнинг ибоси эзгуми?

Саволларнинг салмоғи оғир. Шу ўринда Маяковскийча зинапояли шеър шакли ўзини оқладиди. Таъкидни кучайтириш билан бирга бу саволларнинг ҳар бири ўз ҳолича улкан ва жавоби оғир эканини англатади.

Аммо сўнгти саволга яна бир эътибор қилайлик. Биламизки, ибонинг ўзи эзгу фазилат. У “эзгу”сиз ҳам керакли маънони бера олади. Унда нега шоир бу сўз ёнига яна “эзгу” сўзини қўшиб тилга олаяпти? Бу билан нима демоқчи бўлган экан? “Кизларнинг ибоси беғаразми?”, соддароқ қилиб айтганда, “Гўзаллик сохталашиб кетмаяптими?” дегандай туюлмаяптими? Шеърдаги оригинал қофиялар (уздими – эзгуми) фикрнинг таъсир кучини оширишга хизмат қилган. Шеър бағридаги оҳангдор фикр, фикр қалбидаги туйфу-чи? Шоирнинг фикр ва туйфу уйғунлигидаги шу каби назмий намуналари унинг фалсафий-интеллектуал лирикаси даражасини белгилаб турибди.

Асқад Мухтор инсонни “кашфиёт ёлқини”, “асрий зулматларда бир ёруғ нуқта” деб атайди (“Инсон”). Шоир тасаввуридаги инсон маънавий-интеллектуал жиҳатдан етук бўлиш билан бирга, замон ва давр дарду ташвишлари билан яшаши, ижтимоий фаол бўлиши шарт. Аммо бунинг учун ушоқдай жонга метиндай бардош, катта матонат керак. Булар йилларни йилларга улаб топиладиган неъматлар. Шу боис кўзни каттароқ очиш, ён-атрофга, дунёга идрок назари билан боқиш даркор. Асқад Мухтор шеърларидаги инсон “дамларни мисқол тарозида ўлчаётган”, кун, ойу йилларнинг пучу сарасини ҳисоблаётган, “Розилари борми йиллар орасида?” деб тинимсиз ўзини саволга тутаётган бедор ўйли одам; “руҳий долғалардан безиллаб қолган”, устига-устак, “янги дўзахлар” барпо этилаётганидан саросимага тушган, “қўл чўзиб илтижо қилаётган келажак”ни сақлаб қолишига бутун башариятни даъват этаётган замин кишиси; давр дардларидан мажрух бўлган қалб эгаси; дардим сукунатни чўчитмасин деб сокин боғларни айланиб ўтадиган, ширин тушларни ҳуркитмасин, жонлар оромини бузмасин, тунни уйғотмасин деба дардини ичига ютиб, оламнинг беғубор тонгини кутаётган нуроний; тун бўйи бешик узра бош эгиб, уйқунинг баҳридан кечиб гўдаги камоли учун жон куйдираётган муштипар она; ҳамма мўъжизалар ўрнини босадиган аёл; ортидан қоладиган гулу ниҳоли истиқболини ўйлаб, қалбини оғир ўй бурдалаётган бобо... Шоир шу йўналишдаги шеърларида инсон камолоти, башарият саодати, курраи замин тинчлиги, элатлар бирлиги учун қайғуряди ва бу пафос ўйчан, донишмандона, шу билан бирга, ички тугёни сатрларида зухурланаиди.



Асқад Мухтор шеърларида некбинлик – оптимистик рух кучли. Ҳаётсеварлик – шоир лирик қаҳрамонининг асосий фазилатларидан. У ҳаётнинг безавол эканига ишонч билан шундай дейди: борлиқдаги барча чиройни “ҳаёт қалби”га қайтиб чиқмас қилиб киритиш керак. Шоир кўплаб шеърларида ҳаётнинг ёруғ томонларини кўрсатишга, умрнинг бебаҳо инъом эканини бадиий-фалсафий акс эттиришга эришади. Ёрқин, характерли деталлар топади.

Кор тагидан дадил бош сузар.

Умри қисқалигин яхши билади.

Аммо кўзи тиник, чунки дили сезар:

Баҳорга сўқмоқлар очиб ўлади.

“Бойчечак” деб аталган ушбу шеърдаги рамз ҳаётнинг нечоғлик беназир мўъжиза эканини англатиб турибди. Бойчечак – кўкламнинг умри бир тутам чечаги. Қор остидан дадил бош чиқариб, Қуёшга юз тутиш фақат шу гулнинг унчамунча киши илғамайдиган жасорати. Аммо мақсад фақат кун ўтказиш эмас. Яшаш керак! Умрнинг қисқа ёки узунлиги – Яратганинг тақдирни. “Баҳорга сўқмоқлар очиб” – эзгуликларга йўл очиб ҳаёт кечириш лозим. Шоир танлаган рамз остидаги яширин маъно шуларга ишора қилаётир.

“Асқад Мухтор ижодиёти кўзгусида авлиё Зардўштий, Конфуций, Дао, Муҳаммад алайҳис-салом, Исо алайҳиссалом, Баҳовуддин Нақшбанд таълимотларининг бадиий савлати юз кўрсатади, – деб ёзди шоир Рауф Парфи. – Бу инъикос у ёки бу даражада бўлишидан қатъи назар, Инсон ва инсонийлик, Инсон баҳти учун кураш фояси билан сугорилгандир”. “Адабиёт фан-техника инқилоби даврида ҳам инсон билан иш кўриши керак, – дейди Асқад Мухторнинг ўзи. – Экзюпери мақтаган самолётлар ҳозир ҳеч нарсага ярамай қолди. Лекин Митти Шаҳзодаси ҳали узоқ яшайди”.

Асқад Мухтор қаҳрамони авлодлар, ворислар, уларнинг келажаги ҳақида кўп ўйга толади. Авлодлар тақдирига масъуллик ва жиндек хавотир шоир шеърларига ўзига хос тарзда қўчиб ўтади:

Кўрқсак, биз бегуноҳ норасидалар,
Уруш кўрмаганлар учун қўрқамиз.
Ачичқ ёши томмаган қўзи осудалар
Ўлик қўммаганлар учун қўрқамиз.
Шоир баъзан даҳшатли йиллар суронидан
анча олисда яшаётган авлодлар орасида эканини
ҳис қилиб, улардан беозор узр сўраб ҳам қўяди:
Кечиринг, тунд бўлиб қолсам бир зумга,
Бу менга на одат, на ҳунар.
Шунчаки саргайиб қалқар юзимга
Ўша йиллардаги уйқусиз тунлар...

Бу мисралар шоир умрининг сўнгги дамларида “Тундаликлар”ида ёзган “Шундай йилларни кўрдикки, бахти бўлиш уят эди” деган сўзларига уйғундир.

Асқад Мухторнинг шеърлари анча сокин, шоирнинг ўзи каби оғир-вазмин. Аммо мана шу босиқлик замиридаги туғён, ноҳақлик,adolat-сизлик, лоқайдликка исён пўртанаси юракларни тўлқинлантиради. Унинг шеърларида шавқ (экстаз) ҳолати ҳис-туйгуларда эмас, кўпроқ онгу шуурда рўй беради. Ушбу фалсафий-интеллектуал шеърлар маънавий бедор шахснинг онгу шуури, зехну идрокидаги туғёнлар ҳосила-сидир. Шу ўринда Миртемирнинг шоир ижоди ҳақидаги мана бу фикрларини келтириб ўтиш жоиз: “Асқад шеърлари тинч ва лиммо-лим, лекин таги туғёни кўклам сойларидек табиий, турхикмат, кучли ва жозибали. Асқад шеърларида образлар сийқалик иллатидан холи, Асқад тили чинакам поэзия тили... Чертиб-чертиб, чиннидай жаранг берган сўзлардан силлиқ ва ҳар қайсиси ўз ўрнида зарур фишт қўя олади”.

Билгир шоирнинг оригинал қофиялари (эшикдан – эшитган, худди – ўтди, ўнғай – кунгай, ҳамон мен – ёмонми, хислатинг – эслатдинг, соҳилга – соғинган) шеърларига ўзгача оҳор беради. Ҳатто поэзия тилига кўт ҳам уйқаш келавермайдиган сўзларни учратамиз: матералист, планета, спутник, неандертал, орбита, радар, озон... Аммо шоир уларни мисраларга шундай сингдириб юборадики, натижада шеърдан бу термин-сўзларни

“узиб” олиб бўлмайди. Ёки “кўнгил радарлари” деган чиройли ибора топади. Шу тарзда Асқад Мухторнинг фалсафий-интеллектуал шеърларида олим, ёзувчи, шоир, санъаткор, умуман, зиёли шахснинг нигоҳи синтези акс этади.

Шеърда муаллиф-шоирнинг характеристи, ботиний-зоҳирий дунёси аксланиши бор гап. Асқад Мухтор айтмоқчи, ҳақиқий шеърларга шоир шахсининг муҳри босилган бўлади. Шу боисдан ҳам унинг шеъриятига хос фалсафий-интеллектуаллик, донишмандлик сифатларини, давр ва объектив сабабларни инкор этмаган ҳолда, кўпроқ шоир шахсияти билан боғлиқ ҳолда тушуниш мумкин.

Даврдаги ўзгаришлар, замонасининг муаммолари Асқад Мухтор ижодини ҳам четлаб ўтмади. Агар сиёсий-гоявий жиҳатдан таҳлил этиладиган бўлса, шоирнинг кўп шеърлари “ғалвирдан тушиб қолиши” аниқ. Шоир ижодига қўчиб ўтган “умумманфаатлар, ижтимоий мотивлар, замон ҷақириқлари, миллионлар онгини банд этган порлоқ ғоялар” узоқ умр кўрмади. Йилларнинг ўзи унинг бундай асарлари ҳақида ҳукм чиқариб бўлди. Бироқ адабиётда бош мезон асар бадиияти, тили ва услуби эканини инобатга оладиган бўлсак, унинг ҳали узоқ яшайдиган шеърлари оз эмас. Хусусан, бир пайтлар шоирнинг ўзи писанд қилмагандек бўлган “шахсий руҳий ҳолатларни кавлаштираверадиган интим мунглар”, “қантарилган кўнгил созлари”дан таралган сатрлар ҳамон умргузаронлик қилмоқда.





Ҳамма гап самимиятда

Чарли Чаплин ҳикматларидан

Комедия суратга олиш учун менга парқ, полициячи ва битта чиройли қиз кифоя қиласади.

Мен сийқаси чиққан мавзудан күркмайман. Ҳәётнинг ўзи тўласича сийқалик.

Ахир, ҳар биримиз яшаймиз ва ўламиз, бир кунда уч маҳал овқатланамиз,
севамиз ва севмай қўямиз.

Ҳаёт репетиция қилинмайдиган пъесадир. Шу боис парда тушиб,
спектакль тугамагунича ҳеч қандай қарсакни кутмай куйланг,
йиғланг, рақсга тушиңг, кулинг ва қўлингиздан келганича яхши яшанг.

Севилмаганларгина нафратланадилар.

Ҳаётдаги энг қайгули ҳол – ҳашаматга ўрганиб қолишдир.

Ҳеч қачон бола бўлмаганлар катта ҳам бўлмайдилар.

Ҳамиша ерга қараб юрадиган одам камалакни кўролмайди.

Табассумсиз кун – йўқотилган кун.

Ақл мени хавотирга солиши, ҳатто касал қилиб қўйиши
мумкин. Бироқ уни юрагим билан уйғунаштира олсан,
ўша заҳотиёқ менинг бебаҳо иттифоқчимга айланади.

Ҳамма гап самимиятда. Чол банаң пўчоғига сирпаниб
ийқилиб тушди – бунга кулмаймиз. Лекин бу ҳолат такаббур
ва бой жентелмен билан содир бўлса, мириқиб хохолаймиз.

Мен камбағалликда ҳеч қандай жозиба ёки ибрат кўрмайман. У менга
ҳеч нарсани ўргатмади, ҳаётий қадриятлар ҳақидаги тасаввурларимни
бузди, холос. Жамиятнинг олий синфи деб аталувчи бойларнинг
иктидори ва фазилатларини ҳурмат қилмасликни уқтириди.

Менинг оғриғим кимнингдир кулгисига сабаб бўлиши мумкин,
лекин менинг кулгим кимнингдир оғриғига сабаб бўлмаслиги керак.

Фикрлаш қобилияти скрипка ёки роял чалишга ўхшайди.
У билан ҳар куни шуғулланиб туриш керак.

Ойна – менинг энг яхши дўстим. Чунки йиғлаган
пайтим у ҳеч қачон кулмайди.



Ориф ТОЛИБ
таржимаси

Бағрим бутун эди – чалинмасди най



Шоди ОТАМУРОД

1978 йили туғилған.
Ўзбекистон Миллий
университетининг
журналистика
факультетини тамомлаган.
Ўзбекистон Ёзувчилар
уюшмаси томонидан
“Биринчи китобим” рукнида
“Соғинч ранглари” шеърий
тўплами чоп этилган.

Куз

Куз келди ёдимга келган ашъордай,
Куз келди сўроқлаб хотираларни.
Бағрим бутун эди – чалинмасди най,
Бугун тушунаман ноталарини.

Куз кирди ул найнинг тешикларидан,
Куз кирди сўроқлаб “Чўли ироқ”ни.
Кеча қизгонардим баҳорни жуда,
Мехмон қилоламан бугун фироқни.

Куз тушди вақтнинг зиналаридан,
Куз тушди ўйнатиб сариқ тилларин.
Эшитилар “чиқ-чиқ” – қадам товуши,
Кузнинг оёгиdir соат миллари.

Биламан, сиз...

Богларинг бор, дараҳтларни қучгим келса,
Тоғларинг бор, қанот қошиб учгим келса,
Булоқлардан бир зилол сув ичгим келса,
Қўлларимга коса тутиб тургайдирсиз,
Биламан, сиз Ватанни чин севгайдирсиз.

Бугдойзордан хирмонини уйдирғанлар,
Юртн суйиб, ўзини ҳам суйдирғанлар,
Мехридан бир юксак Ватан қурдирғанлар,
“Бу иморат – бизнинг бино” дегайдирсиз,
Биламан, сиз Ватанни чин севгайдирсиз.

Қишилогимдан кетиб, юрсам шаҳарларда,
Сигир ҳайдаб кўринмасам саҳарларда,
Саратонда чўмилмасам анҳорларда,
Қаерларда юрибсан, деб тергайдирсиз,
Биламан, сиз Ватанни чин севгайдирсиз.

Ўзбекистон – табиатда буюк асар,
Бир-биридан таъм ўғирлар қовун, асал,
Ариқларда сувнинг шашти пасайса сал...
Ниҳолларга кўз ёшингиз бергайдирсиз,
Биламан, сиз Ватанни чин севгайдирсиз.

Оқ қогозга тўқай десам бор ҳисларим,
Тугамади байтлариму баҳсларим,
Эй, дўстларим, сизга ортган ҳавасларим,
Сен ҳам биздай севасанми, дегайдирсиз,
Биламан, сиз Ватанни чин севгайдирсиз.



У яхши қиз эди чинакам,
Унумтасман әрка чоғларни.
“Севаман”ни айтган бўлсам ҳам,
Яна айтишишимни хоҳларди.

Кулган бўлса кулгандир мендан,
Балки унга шу бўлган ҳузур.
Хафа қилиб қўймадимми деб
Сўрамаган ҳеч қачон узр.

Эркаланиб кетарди бирам,
Қўлларимга қўлин боғларди.
Мен ёнига қайтган бўлсам ҳам,
Яна қайтишишимни хоҳларди.

Овози йўқ занжирми севги,
Богланганим ростимиди унга.
Кийик каби зийрак ва сезгир,
Бор гўзаллик хосмиди унга.

Муҳаббатим бўлган эмас кам,
Бахши этгандим боғу тогларни.
Мен-ку унга етган бўлсам ҳам,
Яна етишишимни хоҳларди.

Эслатарми севги байрогин
Хайр демоқ-чун кўтарилган кўй.
Хуши ёқарми қушлар сайроги,
Ҳижрон томон бурилганда йўл.

Эслаганда қўзларимда нам,
Билмам нечун – ўзин оқларди.
Мен ёнидан кетган бўлсам ҳам,
Келиб-кетишишимни хоҳларди...

Кўнгил уйи

Эй дўстларим, қурганман,
Кўнгил деган иморат.
Девори меҳр деган
Фишталаридан иборат.

Бузилмасин қўнглингиз,
Битмас дунё шилари.
Кўз ёш тўкиб эритманг
Бу иморат гишталарин.

Дарвоза

Уйинг бунча шинамдир,
Ҳовлингга гул соч, севги.
Остонангда турибман,
Дарвозангни оч, севги.

Менинг бундай сўзимни,
Қалбга қаттиқ олмагин.
Мен ҳам кирај уйингга,
Кўнгилга қулф солмагин...

Согинч

Кеча керак бўлдинг, болалик чогим...

Эркин Воҳидов

Ёшлиқ, сени суратимда кўрмоқдаман,
Барисини энди сендан сўрмоқдаман,
Кундан-кунга тошга ўхшаб бормоқдаман,
Сенга боқиб бағрим бўлак-бўлак бўлди,
Бу кун ўша соддалигинг керак бўлди.

Тойчиқ қилиб минганиларим ҳасса эди,
Бу бувимнинг қувончига ҳисса эди,
Дил томида бойичечагу майса эди,
О, орзулар энди оддий эрмак бўлди,
Бу кун ўша соддалигинг керак бўлди.

Энди чиндан тўйиб-тўйиб йиғлагайман,
Сени кўнгил кулбасида сақлагайман,
Умримни ҳам энди сенга боғлагайман,
Ў, бир лаҳзанг хотирамда юксак бўлди,
Бу кун ўша соддалигинг керак бўлди.





Абдунаби БОЙҚҰЗИЕВ

1954 йили туғилған.

Тошкент давлат университеті (хозирги ЎзМУ)ни тамомлаган. “Губорингни ёзгайман”, “Сени излаб келдім”, “Жудолиғ дашти”, “Кўзлари дарёйим!..”, “Дилхирож тўйғулар”, “Беш наво”, “Чўли ироғим” номлы китоблари чоп этилган.

Тилем, она манинг тили!..

Баъзида тил камбағаллашиб боряпти, деган гап қулоққа чалиниб қолади. Шундай пайтларда, наҳотки, бутун бир халқни халқ, миллатни миллат қилиб турған она тилимиз камбағаллашаётган бўлса, деган ҳавотир ич-ичингни кемира бошлайди. Тарих қисмати йўқликка юз тутган тиллар, халқ ва элатлар тақдири ҳақида қанчадан-қанча оғриқли қисса ва ривоятлар сўйламаган бизга...

Кейинги пайтларда Андижонга бориб қолсам, бундан нари борса ўттиз-қирқ иилгина илгари ҳамқишлоқларим лафзида бўлған кўпигина сўз ва иборалар бугун уларнинг тилидан тушиб қолаётганини сеза бошлайман!.. Биргина мен туғилған кичкина қишлоқда хотирдан ситилаётган сўзлар шунча бўлса, бу кўламни бутун мамлакат миқёсига чақсак, залворлигина китоб бўлар экан-да, деб қўяман.

Аслини олганда, тил эмас, кундалик тилимиз камбағаллашиб боряпти, десак тўғрироқ бўлар. Ўзбек тилига давлат тили мақоми берилиб, улуғланиб турған пайтда уни бойитмасак, эътиборсизлик чангига қоплаган дурдай сўзларимизни ярқиратиб ишлатмасак, уят бўлар, деб ўйлайман. Гапни кўп чўзмасдан ана шундай сўз ва ибораларимиздан айримларини келтира қолай...

Балиш – думли қўй.

Бича – опа.

Бувак – чақалоқ.

Бўгаллатиб – кося

ёки идишга ўта тўлдириб, оғзи-бурнидан тошириб қуийиш ёхуд солиш.

Дудама – иккиюзламачи, турланаверадиган кимса, хамелеон.

Дўлтақўзи – лаллайган, лавоқ.

Дўхти қурсин – афти, башараси қурсин.

Жижки – бувак, чақалоқ

Жони порт – кимнингдир кўнглини олиш, бир иш ёки нарсанинг ташвишида йўл, чора излаб доим безовталаниб турған одамнинг ҳолати.



Итиринжи – уйдаги тар-
тибсизлик, бесаранжомлик.

Иягид қариган – ўзини
кatta одамлардай тутиб
сўзловчи болакай, кексақори.

Коски – оғзи шалак,
сўконғир кимса.

Кўқайим кесилди –
сўзим ўлди, камситилдим.

Кўтак арава – асосан отга
кўшиладиган тўрт филдиракли
арава. Кўтак – русча “коток”
сўзининг бузилгани.

Кўтарам – силласи қуриб,
кетини кўтаролмай ётиб
қолиш, касаллик.

Лаган – раҳбарлар нима
деса, маъқуллаб турадиган
ялтоқи одам. Лаганбардор.

Ловак – лавоқ, бўшанг, хом
семиз.

Маллаш – оқ сариқдан
келган бола.

Минқи – димогида,
пинғиланиб, тушунарсизроқ
гапирадиган одам.

Модалиб – тақалиб, қада-
либ, тирғалиб туриб олиш.


Орашон – суюқ овқатнинг
шарақлатиб қайнатилиши

Панғвош – ақли ғовлаган,
мияси пўла, қовоқбош.

Поэмон – афтодаҳол,
хафаҳол, тушкун, паришонҳол.

Ров – жадал, бирров, осто-
надан ҳатлаб-ҳатламай кўриб
ўтиш.

Сариф машак – сариф-
дан келган, жаҳли бурнининг
учида турадиган, сал нарсага
аччиғланадиган одам.



Сомтираб – тентираб, дов-
дираб, йўлидан адашиб.

Сорвозори – ўз шахсини
мартабали қилиб, ишинг тушса
ёки иш буюрсанг, ўзини торо-
зига солиб турувчи кимса.

Тавирка қилиб – арзи-
майдиган гапни ҳам гап деб,
мартаба қилиб кўтариб юриш.

Тасрайиб – безрайиб,
бақрайиб туриб олиш.

Тутантириқ – кул ости-
даги охирги чўғ устига ташлаб,
пуфлаб олов чиқариш учун
маҳсус ингичкалаб ёриб
чиқилган пайраҳа ўтин, қуруқ
хас-хашак ёки қофоз.

Тутимсақ – ўзича, турли
ажабтовур юмушларни ўйлаб
топиб, куймаланиб юрадиган
бола.

Уммай-жуммай – ғайрат
 билан, шижаот билан ҳаракат
қилиши.

Упчик – чақалоқлар
сўргичи.

Шихти қурсин – афти
курсин.

Шўқатой – шўх,
тиниб-тинчимайдиган, тутим-
сақ бола.

Эшма – бўлар-бўлмасга
эшилиб, нозланаверадиган қиз
ёки аёл.

Қуйқи – ғамингни еган,
куйинган одам бўлиб сенинг
гапингни унга, унинг гапини
сенга чақимчилаб юрувчи аёл.

Чиноқчи – пахта мавсу-
мida теримчилар ортидан
юриб, ҳосилнинг чаноқда
қолдирмай тоза терилишини
назорат қилиб борувчи шахс.

Чўкар – қаттиқ пояли
ўсимликларнинг синиб ёки
ўриб олинганидан кейин шуд-
горда қолган, оёққа санчилиши
мумкин бўлган қисми.

Фиртмак – гапи билан
бўйи ёшига мос тушмайдиган,
кatta одамдай ақлиланниб
сўзлайдиган бола.





**Тозагул
АЛЛАНАЗАРОВА**

1976 йили туғилған.
“Мирзачұл овози” газетасы
бөш мұхаррири.
Ижодий ишләри вақтли
матбуотда мунтазам әълон
қилиб келинади.

Mаҳалламизда ҳамма бир-бирини танийди. Агарда бирор бегона ёки янги күчіб келган киши учраб қолса, Тұлғон момо албатта сұраб-сурештиришиша тушади. Үнинг табиати шунаңа: маҳалладаги барчаны билиши устига кимнингдир бирор нохуш одатини сезиб қолдими, юзинг-күзинг демайды, шартта гапириб ташлайды. Тұғрисүз ва дангалчилигидан ҳеч ким гина-кудрат құлмайды. Яқында құшнимиз Нодира опанинг онаси қишлоқдан меҳмон бўлиб келганди. Қишлоғимиздаги урфга кўра, меҳмон хурматига бир лаган чучвара тұздым-да, құшниникига ўтдим. Меҳмон түрда, Тұлғон момо ёнда, бирғаликда ҳанғомани қызығандан-қызытиб, гурунглашиб ўтиришарди. Салом бериб, ҳол-аҳвол сұрашиб бўлишим билан эшиқдан катак-катак каттагина сумка кўтарған келинчак кириб келди. Саломдан сўнг у:

– Меҳмон хола, у-бу нарса харид қилинг, набираларингиз хурсанд бўлади, – деб сумкасидан анча-мунча буюм ва кийимлар чиқарип, уларни мақтай бошлади. Ким пайтоққа, ким жемперга ва яна кимдир калтачаларга харидор бўлиб, келинчак анча-мунча савдо қилиб қўйди. Орадан бироз вақт ўтгач, Тұлғон момо савдосини қилиб бўлган келинчакка юзланди:

– Танимадим, қизим, қўшни маҳалладанмисиз? – деди.
– Йў-ў-ўқ, хола, яқында тўй қилған Иқбол опанинг келиниман,
– деди нариги кўчанинг уй рақамини айтиб. – Дўкони бор-ку...

– Бўлди-бўлди... Иқбол-ойнинг келиниман, денг. Биласизми, келин, ўттиз беш йил бўлди қайнонамнинг бу оламдан ўтганига. Аммо ҳалигача “майдаканд”нинг асли номини айтолмайман, – деди дастурхондаги шакарли идишга ишора қилиб. Сотувчи келинчак гап нимадалигини, Тўлғон момонинг қайнонаси исми Шакарой бўлганини дарҳол тушунди ва қизарган юзларини яширишга уринди. Даврадаги бошқалар ҳам ўйланиб қолишли. Момо ибоби ўзбек аёлларининг азалий урф-одатларига ишора этганди. Ўтмишда момо ва оналаримиз келинлик пайтларидан бошлабоқ ҳурмат-иззат ифодаси сифатида эри, қайнота, қайнона, қайноға, қайнин, қайнинбека ва эрининг бошқа яқинлари исмини айтмаган. Эрига аввалига “ўзи”, “ўзлари” каби сўзлар билан мурожаат этса, кейинчалик фарзандли бўлгач, “дадаси”, “хўжайин” деб ёки тўнгичи ўғил бола бўлса, унинг исми билан мурожаат этган. Тўғри, ҳозир ҳам кўпгина келин ва келинчаклар бу удумга қисман риоя этишиб, эрини “хўжайин”, дадаси” деб мурожаат қилишади ва бу эркакка бўлган ҳурматни билдиради. Лекин баъзиларининг “Фалончи ака” деб чақириши жуда ғалати эшитилади. Ахир, ака бошқа, эр бошқа-ку?!

Тўлғон момо шунинг учун тўлиб гапиради-да!

Келинларнинг қайнота, қайнона, қайноға ва бошқалар исмини атамасликлари ҳам, энг аввало, уларга бўлган ҳурмат-эҳтиром ифодасидир.

Яқинда бир воқеанинг гувоҳи бўлдим. Таҳририя-тимизга ёш келин ва унинг қайнинбекаси кириб келишди.



Келин маҳаллага доир бир шикоят билан келганди.

– Фамилиянгиз ким? – деб сўрадим ундан, қўлимдаги аризага ҳам қарамай.

– Сиз айтинг, опа! – деди у қайнинбекасига юз буриб.

Қайнинбекаси мамнуният билан жилмайганича, оталирининг исм-фамилияси айтди. Негадир бу ҳолатдан кўнглимда аллақандай илиқлик пайдо бўлди. Улар билан яхшигина суҳбатлашиб, тегишли маслаҳатларимни бериб жўнатдим.

Тўғри, барча келинларнинг ўз эри ва унинг яқинлари ўртасидаги муносабати қатъий тарзда шу қоида асосида бўлиши керак, демоқчи эмасман. Ҳарҳолда, шунга яқин муомала ва муносабатлардан ўзаро ҳурмат-эътибор юксалади, шаддодроқ келинларни кўйинг, баъзи ёшларимиз орасидаги бетгачопарлик,

андишасизлик каби иллатлар ўрнида яхши хулқ-одоблар шакланади, деб ўйлайман.

Бу каби яхши удум ва одатларимиз жуда кўп. Уларни қўллаш билан маънавий бойлигимиз ортади. Бу бойликни боболар ва момолардан оламиз. Орамизда Тўлғон момо сингари улуғларимиз бор экан, билмаганимизни биламиз, ўрганмаганимизни ўрганамиз. Бугунги катта авлод ўрта, кичик ва кенжা авлодлар учун беқиёс мазмунли дорилфунундир. Бу дорилфунундан нафақат қадимий урф-одат ва қадриятларимизни, балки миллий маънавиятимизни, турмуш тарзимизни, инсонийлик, меҳр-оқибат, ҳалоллик, охиратни ўйлаб яашаш, яхшилик, меҳр-шафқат сингари эзгу фазилатларни ўрганишимиз мумкин. Уларни безавол сақлаш, бойитиш ва йиллар оша сайқаллаш барчамиз учун ҳам қарз, ҳам фарз.

Мутолаа зарқи

“Ёшлик”чилар янги руҳн ташкил этиб, аҳли адабиётнинг умри давомида суйиб мутолаа этган китобларидан тўққизтасини ажратиб, фикр айтиш ҳақидаги таклифлари менга маъқул келди. Зеро, ҳозирда китобхонлик билан боғлиқ жуда кўп фикрлар ўртага тушаётган бир замонда умумий гапларни қўйиб, шундай амалий иш қилиш – тўғри танланган йўл. Лекин камина бу амалиётни бироз таҳрирлаб, таҳририятга адабиётчиларимизнинг бори ҳаёти давомида эмас, балки сўнгги пайтларда ўқигани тўққизта китоби ҳақида фикр айтишни таклиф қиласган бўлар эдим. Чунки адабиётни қисмат билган одамки бор, унинг умри китоб билан ўтади. Шунинг учун бор-йўғи тўққизта китоб билан чекланиш сира мумкин эмас. Албатта, завқу ҳайратингни чандон ошириб, туйғуларингни жумбишга келтирадиган, ўзингдан чиқар ҳолатга соладиган асарлар кўп бўлавермайди, лекин умумжаҳон миқёсида олиб қаралса, башариятнинг китоб ила ўтган умри бўйича кўрилса, инсонда ҳайратлар ўйғотувчи,

дақиқ китоблар ниҳоятда кўп. У ёфи Фарб, бу ёғи Шарқ, қўйингки, бутун дунё кутубхонасининг саноғи миллиардларга етса, шундан бир неча минг ҳайрат боиси бўладиган асарлар чиқар. Демакки, сўнгги пайтларда ўқиганим тўққизта асар хусусида сўз кетар экан, мен кичик бир лирик чекиниш қилиб, ўзбекнинг катта шоири Зокиржон Фурқатнинг 1959 йили нашр этилган икки жилдлигининг иккинчи жилдидаги “Хўқандлик шоир Зокиржон Фурқатнинг аҳволоти, ўзи ёзгони” деб номланувчи бир битигига эътибор тортишни истардим.

Зокиржон етти ёшга етганида ота-онаси-нинг “машварати ила” мактабга олиб борилади. Мактаб ҳаётига оид жуда кўп тафсилотлардан кейин муҳтарам шоиримиз у ерда дастлаб олган сабоқлари ва китоблари хусусида сўз юритади. Маълум бўлишибча, Куръони Каримдан ўн беш-йигирма адад майдадурани ёд этиб ўрганади. Сўнг ҳафтиякка ўтиб, уни ҳам ўзлаштиргач, тўлиқ Қуръони шарифга берилади.



Муқаддас китобни хатм қилгач, “Чор китоб” ибтидо қилдим, деб ёзади. Шулар билан бир йилни ўтказиб, саккиз ёшга етганида Фариддин Атторнинг “Мантиқут тайр” асарини олти ой давомида ўрганади. Ундан сўнг Ҳофиз девони ва беш ой давомли Мирзо Абдулқодир Бедил девонини қунт билан “дилига дилбанд” этади. Ёши тўққизга етганида эса Амир Алишер Навоийнинг туркий девонлари мутолаасига берилади. Шу тариқа ўн ёшида Фузулий ғазалиёти ва “Маслакул муттақин” маснавиётини ўқиб туширади. Ўн икки ёшга етганида Кўқонда Подшоҳ Ҳўжа Эшон номли бир машхур мударисга шогирд тушади. “Аввали ҳол”, “Аввали илм”, “Муъзи Вазанжоний” рисолаларини ўқиб тамом қиласди ва ўн уч ёшга етганида “Авомил”, “Ҳаракот” рисолалари, “Кофия” китобини таҳсил қиласди. Бўлғуси шоир ўн тўрт ёшга етганида “Шарҳи Муллои Жомий” ва “Рисолаи шамсия”-ни уч йил давомида ўзлаштиради... Мана ўзбек мумтоз адабиётининг буюк намоёндасига айланган бир аждодимизнинг ўстиринлик ёшигача ўқиган, ўзлаштирган, ўрганганди киблари. Демак, на Ҳазрат Алишер Навоий ва на улардан кейинги қатор буюкларимиз ва на Фурқату Ҳазинийлар фақатгина илоҳий истеъдоднинг тажаллийлари эмас. Балки, мутолаа машаққатларининг ва саодатининг бори азобу завқини туйгач, истеъдодлари рӯёбга чиққан зотлардир. Агар шундай мутолаа эски давр мактабу мадрасаларининг кўрсаткичи бўлса, демак, шоиру адаб, олиму уламо бўлмаган, лекин мактабу мадрасада таълим олган боболаримизнинг билими, дунёқарashi қанчалар бўлганини тасаввур этиш қийин эмас. Биз-да аждодларга муносиб авлод бўлишимиз учун ўтмишдан керак хулоса чиқариб олишимиз зарур.

Энди бу чекинишлардан сўнг кейинги пайтларда мутолаа этилган тўққиз асар ҳақида тұхталаман.

Шұхрат РИЗАЕВ,
филология фанлари номзоди.

1958 йили туғилган. Тошкент давлат университети(ҳозирги ЎзМУ)нинг ўзбек филологияси факультетини тамомлаган. “Жадид драмаси”, “Жамият кўзгуси” (ҳаммуаллифликда), “Завқий ижодида фольклор мотивлари” (ҳаммуаллифликда), “Миллий уйғониш ва ўзбек филологияси масалалари”, “Миллий уйғониш даври ўзбек адабиёти” (ҳаммуаллифликда), “Саҳна маънавияти”, “Изтироб санъати”, “Баҳодир Йўлдошев театри”, “Маънавий ислоҳатлар йўлида” каби китоблари чоп этилган.

Исаи КАЛАШНИКОВ

“Жестокий ВЕК”

роман

Шу кунларда мутолаа этилган минг саҳифадан ортиқ – эпик кўламдаги роман машҳури жаҳон фотиҳ Чингизхон ҳақида ҳикоя қиласди. Унинг ота-боболаридан тортиб, ўзининг дунёга келиши, болалик, ёшлиқ дамлари, чеккан азоблари, машаққатли қисмати, сўнгра кувватланиб қанча-қанча элу элат, қабила, кейинроқ эса қанча шаҳар-мамлакатларни забт этиши, тақдир тақозоси билан тарих майдонига чиққан фурури баланд, ниятлари ёруғ йигитнинг қон кечиб, қирғинбаротлар қилиб, маънавий таназзулга юз тутиб бориши бағоят миқёсли, юксак бадиий тасвирлар, теран мушоҳада ва фалсафий ўйлар билан ифода этилади. Исаи Калашников деган бурятиялик романнавис ва унинг ўтган аср етмишинчи йиллар адогида ёзиб ёзған қилинган асаридан энди хабар топиб, жуда кеч ўқиганим учун, очиғи, афсусландим. Бу фақатгина тарих эмас, ёвузлик, ёвуз даҳо шаклланишининг, маънавий емирилишнинг бори синоатини батафсил тасвир этган соғ бадиий асар. Бу, шубҳасиз, жаҳон адабиётининг дурдоналаридан дейишга арзигулик роман.





Мо Янь

“Мусаллас мамлакати”

роман

Мазкур асар учун муаллиф бундан тўрт йил аввал Нобель мукофоти билан тақдирлангани кўпчиликка яхши маълум. Ўтган аср ўрталари атрофларида воқе бўлган ҳодиса ҳақида ҳикоя қилинган романда ниҳоятда даҳшатли ҳолатлар қаламга олинади. Гўдак болаларни аввал бошданоқ махсус туғиб, боқиб, сотиб, сўнг таом сифатида тайёрлаб, тановвул қилиш, ақл бовар қилмайдиган даҳшатли ҳодиса. Бироқ, қарангки, ҳеч бир замонда бўлмаган бундай мудҳиш ҳолат инсоният маданий тамаддунинг юксак босқичлари бошланган паллаларда Хитойда содир бўлади. Гап, балки, ҳикоя қилинган даҳшатли воқеада ҳам эмасдир. Лекин инсон табиатининг бу қадар ваҳшийлашиши мумкинлиги ва у ўз моҳиятини маданият деган ниқоб остига яшириб, кўнгли тусаган номаъқулчиликларни қила билиши, ҳатто мутлоқ мумкин бўлмаган разилликка журъат этиши бу – нафақат баңдасининг, аввало Яратганнинг олдидағи мудҳиш гуноҳ. Қиёмат ҳақида мислсиз азоблар ҳақида ўйлашга етаклайдиган жиноят. Даҳшатта тушиб фикр қиласан – инсон боласи маънавий такомил сари интилишдан кўра тубанлик чохига қулашни афзал биладиган замон бўлгандек гўё. Мо Яннинг мазкур асари унча-мунча мурдоқ тафаккурларни уйғотиб юборса, ажаб эмас.


Санъат ҳақида жуда кўп ёзилган. Унинг асл моҳияти, қандай эҳтиёж зарурати эканлиги, табиати, намояндалари борасида ниҳоятда кўп асарлар бор. Лекин Лев Николаевич Толстойнинг “Санъат нима?” номли қарийб иккى юз сахифали бадиҳа, рисола, илмий, фалсафий, ижтимоий трактат, бадиий публицистика каби назарий таърифлар билан жанр хусусиятини белгиласа мумкин бўлган асари мушоҳадаларнинг ниҳоятда теранлиги ва кенг қамровлилиги билан ҳайратларга солади. Мутафаккир зот санъат ҳодисалари минглаб одамларнинг йиллар давомида чекадиган азоблари, интилишлари ҳисобидан дунёга келишини мушоҳада объектига айлантиради. Санъатнинг турли табақа тоифаларида жараённинг қандай кечишини кузатади. Дирижёрнинг қўл остидаги мусиқачиларга зулм қилиши, ҳақоратлаши, гарчи жуда хунук кайфият пайдо қиласидиган манзара бўлса ҳам, лекин пиравардида инсонга баҳтиёр дақиқалар улашиши билан аҳамиятлидир. Рисолани хуносалар экан, Толстой бобо “Санъат зўравонликка барҳам бериши керак. Ва фақат санъатгина бунга қодир” деган фикрни илгари суради ҳамда инсонларни санъатгина биродарга айлантириши, кимлиги, қандайлигидан қатъи назар, бир-бирига муҳаббат уйфота олиши мумкин бўлган, инсонларга илоҳий туйғулар улашиб, унинг ўзини-да илоҳий дунёларга етаклаб кетувчи мўъжизавий бир ҳодиса дей таърифлайди. Толстойнинг санъат хусусидаги ҳайратлари ва мушоҳадалари, назаримизда, ҳар бир санъаткор учун ибратлидир.

Лев ТОЛСТОЙ

“Санъат нима?”


(Что такое искусство?)

фалсафий публицистик трактат




Рюноскэ АКУТАГАВА

“Дүзах азоблари” хикоя




Бу ҳам Толстойнинг санъат ҳақидаги қарашларига қай бир жиҳатдан ҳамоҳанг яратиқ. Лекин у фалсафий публицистик трактат бўлса, буниси соғ бадиий психологик ҳикоя. Ўзи ҳис қилмаган, ўз кўзи билан кўрмаган, ўз сезгилари орқали онги, тафаккури ва юрагига сингимаган ҳодисалар ҳақида ҳеч қачон ҳақиқий санъат асари яратиб бўлмайди. Ҳикояда айнан шу тушунчадаги раскомнинг мислсиз инсоний фожеаси орқали мазкур ҳақиқатга келиши ва ҳайратомуз ҳаққоний тасвирий санъат асарининг яралиши кўрсатиб берилади. Акутагава ижоди замон ва макон чекловларидан ташқаридаги ноёб туйгулар, ҳолатлар ҳақида ҳикоя қиласиди, унинг тафаккур ва ҳиссиёт олами шу қадар теранлигига тан бермасдан илож йўқ.



Марио ВАРГАС ЛЬОСА

“Шумтакалар” қисса

Перулик Нобель мукофоти совриндори Марио Варгас Льоса “Шумтакалар” қиссани ёзиб Лотин америкаси адабиётини яна бир дурдона асар билан бойитган. Бола пайтида кутилмаган баҳтсиз ҳодиса туфайли фалокатга учраган Куэльяр ҳаёти, унинг янги мактабда орттирган тўрт дўсти билан кечмишлари орқали инсон туйфуларининг турфа оламига кириб борасиз. Одамни тушуниш нақадар мураккаб, нақадар қийин вазифа эканини ботбот ҳис қиласиз. Ўзини инсоний амалга қодир тўлақонли шахс сифатида ҳис қила олмаган кишини тушуниб, унга ёрдам бера олмаганинг ҳолда, ҳеч бўлмагандан, ҳамиша хайриҳоҳлик туйфуси билан яшаш, хотираларга садоқат кўрсата билиш ҳар кимнинг ҳам қўлидан келаверадиган иш эмас экан. Куэльяр, Лало, Каллахум, Чиллак, Манъуколарда бўлгани каби беғубор болалик даврининг энг яқин тенгдош жўраларинг билан кечган ширин хотиралини ёдга солувчи бу асар ҳам гарчи муайян макону замонда бўлса-да, таниш оҳангу табиати, ҳазин мазмуни – хулослари билан ҳаммамизни қай бир маънода тафтиш этаётгандай туюлади.




Ян ПАРАНДОВСКИЙ
“Сўз кимёси”
 трактат

XX аср поляк адабиётининг атоқли адиби Ян Парандовскийнинг “Алхимия слова” – “Сўз кимёси” асари ёзувчи меҳнати, унинг ўзига хос ижодий ва машиий дунёси ҳақида ниҳоятда қизиқ маълумотларни хикоя қилади. Бу асарнинг жанр жиҳатидан аниқ таърифини бериш мушкул. Уни ёзувчилар ҳақидаги ҳаётий тафсилотлар ёки ёзувчилик санъати ҳақидаги трактат деб атаса ҳам бўлади. Китобда адаблик истеъоди, маҳорати, ижод хусусиятлари, илҳом дамлари, илҳомланиш жараёнининг фалат кўринишлари, кўйингчи, машҳур адабларнинг қандай ручка ва қоғоздан фойдаланишидан тортиб, нима еб ичганигача, муайян асарларга киришиш ва ёзиш палласидаги тўлғоқли ҳолатларгача, севгиси, кўнгилхушлари, қандай пайтда ижод қилишни маъқул кўриши, қандай столда ўтириб, не алпозда қалам тебратишигача – барчаси энг оддий, майда тафсилотларигача ифодасини топган. Ҳажман 700 саҳифага яқин бўлган мазкур китобни ўз вақтида устоз Озод Шарафиддинов таржима қилишга киришган эди. Афсуски, домла китобдан бир нечта бобнигина тилимизга ўгириб улгурди. Ҳозирда олмоншунос Мирзаали Акбаров китобнинг бошқа бир қатор бобларини таржима қилиб, “Жаҳон адабиёти” журналига тақдим этди. Назаримда, ёзувчилик ҳаваси билан ёнган ёшлар, албатта, бу китобни ўқиб чиқиши шарт.

Каминани том маънода ҳаяжонга солган мазкур роман буюк аждодимиз ҳақидаги дастлабки ва ҳозирча ягона роман. Бу асарнинг воқеалари асосан ёзувчининг бадиий хаёлоти маҳсули, айни пайтда, тарихий ҳужжатлар билан мантиқан далилланган, айтиш мумкинки, тарих ва бадиий хаёлот ажабтовор муштараклик кашф этган бақувват роман. Абдулла Қодирий миллатимизнинг армони бўлгани ҳолда, адабнинг ўзи ҳам ёзиб улгурмаган асарлари учун буюк армон билан ўтган ижодкордир. Ёзувчининг ўзи эътироф этганидек, “Амир Умархоннинг канизаги” номли бир роман яратиш ниятида жуда кўп тарихий асарларни ўрганган, канизакнинг қисмати билан боғлиқ маълумотларни излаган. Машҳур шоҳ ва шоир Амир Умархоннинг канизи бўлган Ойхон ниҳоятда аччиқ қисмати билан ўкувчини ўзига боғлаб қўяди. Бениҳоя гўзал қизнинг тақдир тақозоси билан у қўлдан бу қўлга ўтиб, мислсиз азоблар чекиши Абдулла Қодирийни қанчалар ҳазин ҳолатга солса, ўкувчидаги ҳам юрак-юракдан ачиниш ҳиссини уйғотади. Бора-бора азоблари туфайли ўз қаҳрамонини севиб қолган Абдулла Қодирий каби “Жинлар базми ёхуд катта ўйин” асарини ўқиб мутолаа қилган китобхон ҳам Ойхонни севиб қолиши мумкин. Дунёда муҳаббат қиссалари ниҳоятда кўп. Уларнинг ҳар бири ўзича бир дунё. Романдаги Абдулла Қодирийнинг кўнгил армонлари яна бир гўзал муҳаббат достони бўлиб китобхон қалбидан жой олиши аниқ.

Абдулҳамид ИСМОИЛ

“Жинлар базми ёхуд катта ўйин”
 роман



Темурхон наслидин султон Улуғбек,
Ки, олам қўрмади султон анингдек.

Ҳазрати Алишер Навоий шу қадар юксак таъриф берган буюк шоҳ ва мунахжим, аллома Мирзо Улуғбек ҳақида инжакўнгил шоиримиз Мақсуд Шайхзода 1959 йили катта драматик асар яратган эди. Асар ҳозирги Миллий театр саҳнасида эллик беш йил бурун саҳналаштирилиб, Шукур Бурхондай буюк санъаткорнинг ижроси билан ўзбек театр санъатининг олтин фондига кирган. Мазкур асарни бугунги кунда қайта ўқиб, Шайхзоданинг ҳеч муболагасиз, ҳақиқий мумтоз асар яратганини англаймиз. Уни сира иккиланмай Шекспир трагедиялари билан қиёсласак бўлади. Шоҳ ва аллома, ота ва ўғил, она ва ўғил, жамият ва адолат, инсон ва унинг ҳаётдаги вазифаси борасида теран мушоҳадаларга ундейдиган “Мирзо Улуғбек” пьесасини бугунги глобаллашган дунёning муаммоларига қарши ўзига хос бир бадиий қўлланма сифатида қабул қилиш мумкин. Мутаассиблик ва илму ирфон, жаҳолат ва маърифат, юксак инсоний туйғулар билан маънавий қашшоқлик ўртасидаги муросасиз кураш трагедиянинг марказий ғояси бўлгани билан бугунги кунларимизга ҳамоҳанглик касб этади. Шу боисдан ҳам асар жорий бир йил давомида ҳам Самарқанд театри, ҳам пойтахт Миллий театри саҳналарида қўйилди. Муҳими, Шайхзода илгари сурган ғоялар ва эҳтирослар қайта жонланиб, катта саҳналарда жаранглади ва Шайхзодани ҳам замондошимизга айлантириди. Ҳар қандай ижодкор ўз асари билан шундай тақдирга муносиб топилса, у барҳаёт бахтли ижодкордир.

Мақсуд ШАЙХЗОДА

“Мирзо Улуғбек” тарихий трагедия



Халима АҲМЕДОВА

шеърлари

Мен кунларни алдаяпман, ёмон кунларни,
Гоҳ кар бўлиб, гоҳ ўзимни солиб мастиликка.
Аммо ўздин қайга қочай, қаёққа қочай,
Ҳаққим борми юрагимни танимасликка.

Бу сатрлар замонамизнинг гўзал шоири Халима Аҳмад қаламига мансуб. У ҳеч шубҳасиз, ўзбекнинг Анна Ахматоваси, балки ундан-да миқёслироқ ва теранроқ ҳодисадир. Ҳалиманинг мени лол қолдидиган бетакрор хислати унинг фавқулодда ҳаяжонга соладиган метафоралар дунёси. Шоирнинг хаёлот дунёсида табиатан мутлақо чоғишмайдиган ҳодисалар чоғишиади, аксинча, бир-бирига ниҳоятда яқин нарсалар тамоман бошқа-бошқа қутбларда пайдо бўлади. Ҳалиманинг тахайюлини одатий тафаккурга ўрганган инсон мутлақо тушунмаслиги мумкин, лекин уни ўқиб тушунгувчи, идрок этувчи одамлар эса хушбахтлик туйиши аниқ. Нафақат хушбахтлик, балки тўлиб-тўлиб йиғлашга мойил ҳолда, тозариш – поэтик катарсис ҳолатини бошдан кечиришга муваффақ бўлади. Бундай ҳодисани фақатгина оламни ғалат муштаракликда кўрадиган, илоҳий басират кўзларига эга, катта шоирлар пайдо қила билади. Ҳалиманинг шеърларини ҳеч қачон шунчаки ўқиб бўлмайди. Фақат ва фақат соме кайфиятдагина бу шеърият сенга ўша катарсис – тозариш неъматини бахшида этади.

**Моҳинур ҚОДИРОВА**

1997 йили туғилган.
Ўзбекистон давлат жаҳон
тиллари университетининг
халқаро журналистика
факультети талабаси. “Юрт
келажаги 2014” кўрик-
танлови, “Истеъод мактаби”
ёш ижодкорлар семинари
республика босқичи
иштирокчisi. 2013 йили
“Бир фунча очилгунча”
шеърий тўплами чоп
этилган.

Савол

Яна бир кун ўтар ҳаёлингиз-ла,
Термулиб турман суратга қараб.
Менинг ҳаётимдан кетиб бўлгансиз,
Ўзим олисдаман, дил дийдор талаб.

Тақдир ҳам, ҳаёт ҳам – бари мураккаб,
Мен чиқиб бўлганман ёдингиздан ё.
Совиган кўнглингиз тафтини алқаб,
Кўзимда тескари айланар дунё.

Билолмайсиз менинг туйгуларимни,
Ҳеч недан бехабар хурсанд юрибсиз,
Кўлларимни қўйиб юборгансиз-у,
Нега юрагимни ушлаб турисиз!?

Кишлоғимниң нағис ифорин туйдим

Кишлоғим

Хаёлот дарчасин очсан оҳиста,
Бепоён қишлоқни қўради кўзим.
Кетарканман ўша оқ автобусда,
Юракда қандайдир согинчни сездим.

Эй, отамдай суюқ пурқивор тогим,
Болалигим ўтган, эй, она қишлоқ,
Ҳувилламай туриб юрагим боғи,
Онамнинг бағрига етсайдим тезроқ.

Ана, ҳув тогтерак ўсибди чунон,
Кўпайибди қирда сулув лолалар.
Қушларнинг ажойиб навоси шу он
Мен севган қўшиқни ёдимга солар.

Автобус тўхтади, таниш кўчада
Қишлоғимниң нағис ифорин туйдим,
Ўзгариб кетган бу азиз гўшада
Мен чиндан ўзимни йўқотиб қўйдим.

Чиқмогим керак-да ҳаёлдан тезроқ,
Ва ортга қайтаман энди кўнмасдан,
Мен учун суюкли, бу мўъжаз қишлоқ –
Мени меҳри билан улгайтган Ватан!

Болалари юлдузларни кўзлаган юрт



Маърифатпарвар халқимиз ҳамиша илмни юксак қадрлаган. Айниқса, мустақиллик туфайли бу эзгу анъана янгидан юз очиб, асл ўзанига қайтганини бугун юртимизда таълим-тарбия соҳасига қаратилаётган эътибор мисолида яқол кўриб, ишонч ҳосил қилиб турибмиз. Буни ҳатто нуфузли халқаро ташкилотлар, қатор хорижлик эксперклар ҳам алоҳида эътироф этиб, дунёнинг энг илғор мамлакатларида ҳар йили таълим учун сарфланаётган ҳарражатлар ялпи ички маҳсулотнинг 3–5 фоизидан ошмаётган бир шароитда Ўзбекистонда бу кўрсаткич 10–12 фоизни ташкил этаётгани ҳавас қилишга арзигулик натижа эканини бир овоздан таъкидлашмоқда.

Бу ютуқлар бугун вояга етаётган ёш авлод наздида гўё осмондан тушгандек ёки айнан шундай бўлиши керакдек туюлади. Аслида, таълимнинг бундан йигирма беш-ўтиз йил аввалги ҳолати билан таққосланса, ҳозирги муваффақиятлар ортида нечоғлик улкан заҳмат ва машққатлар ётганини англаш қийинмас. Ўқувчиларнинг биргина дарсликлар билан таъминланиши қанчалар ачинарли ахволда бўлганини, мавжуд қўлланмалар ҳам саҳифалари йиртилиб, аллақачон путурдан кетган, билим олишга яроқсиз ҳолатда бўлганини ҳар икки-уч йилда янги нашр этилган китоблардан фойдаланаётган фарзандларимиз билмаслиги табиий, албатта.



Алишер ПАРДАЕВ,
Сурхондарё вилояти халиқ
таълими бошқармаси
бошлиғи

Шунинг учун ҳам уларга қараб ҳаваси-миз келади. Кўнгли-миз fuуруга тўлади. Энг муҳими, бугун юртимизнинг барча ҳудудидаги ёшлар яратилаётган шарт-шароитлардан тенг фойдаланиш имко-нига эга. Жумладан, Сурхондарё вилояти халқ таълимни бошқар-масига қарашли 1197 та таълим муассасаси ҳам замонавий талаб-лар асосида фаолият кўрсатмоқда. Умумтаъ-лим мактабларида ўқиётган 373321 нафар ўқувчининг давлат таълим стандартларига мос билим олиши учун етарли қулайликлар мавжуд. Ёш авлодга қалб қўри ва кўз нурини бағишлаб сабоқ берадиган 33747 нафар педагогнинг 70,5 фоизи олий маълумотга эга мутахассис-лардир. Бу кўрсаткич, айниқса, бошланғич таълимда йил сайин ошмоқда. Ваҳоланки, мустақилликдан аввал бошланғич таълимга иккинчи даражали иш сифатида қаралиб, билими саёз мутахас-сислар ҳам 1-синф ўқувчиларига дарс бериб кетаверган. Эндилиқда вазият мутлақо бошқача. Таълим-тарбиянинг пойдевори бўлган бошланғич таълимга фақат олий маълумотли, юксак билим ва салоҳиятга эга ўқитувчилар жалб этилаяпти.

Таълим муасса-сасининг ободлиги, мустаҳкам моддий-тех-ник базага эгалиги замонавий ўқув жара-ёнининг муҳим шарт-ларидан саналади. Бу масалага ҳам давлати-миз томонидан юксак эътибор қаратилиб, ҳар йили Инвестиция дастури асосида ўнлаб мактаблар янгидан қурилаяпти. Жумладан, бу йил бизнинг вилоятимиздаги қатор ўқув-тарбия маскан-лари ҳам чирой очиб, кўркем қиёфа касб этди. Инвестиция дастурига асосан воҳадаги қирқта мак-табда кенг кўламли қурилиш-таъмирлаш ишлари амалга оши-рилиб, ўғил-қизлари-миз янги ўқув йилини шинам, нурафшон ва барча қулайликларга эга синфхоналарда бошлиди.

Ўқув йили даво-миди Инвестиция дастурига киритил-ган барча таълим муассасалари парта, стол-стул ва бошқа ўқув мебеллари, лаборатория жиҳоз-лари билан таъмин-ланади. Вилоядаги 259 та умумтаълим мактабини компьютер синфи, интерактив электрон доскалар ва совиткичлар билан жиҳозлаш бўйича буюртмалар шакл-лантирилиб, Халқ таълими вазирлигига тақдим этилди. Бу имкониятлар муста-



бид тузум даврида таълим олган авлод вакил-ларининг хаёлига ҳам келмагани шубҳасиз. Чунки ўша пайтда болаларни мактабда ўқитиши-дан мақсад мухтасаргина савод чиқартириш, юзаки таълим беришга қаратилган эди. Шунга монанд аксарият ўқувчиларнинг кўпроқ билим олишдан кўра танафусни мароқли ўтказиш, дарсдан кейин тўт тепишига қизиқиши баланд эди. Мустақиллик йилларида таълим-тарбия жараёнига мутлақо янгича ёндашув туфайли мактабда ўқитувчи ва ўқувчининг асосий мақсад ва вазифалари аниқ-равшан белгилаб берилди. Энг муҳими, бундан кўзланган эзгу мақсадни барча тўлақонли англаш етди. Илгари ота-она-лар дарсдан кейин болаларини уй юмушларига жалб этган бўлса, ҳозир фарзандларининг турли тўгаракларга, айниқса, чет тили машғулотларига муентазам қатнашиши учун барча имкониятларни муҳайё этишга интиляяпти. Чунки юртдошлари-миз хорижий тилларни пухта ўрганмай туриб, замонавий илм-фан ютуқларини ўзлаштириш, халқаро ахборот манбаларидан фойдаланиш қийинлигини англаш етаяпти.

Ўзбекистон Республикаси Президенти-нинг 2012 йил 10 декабрдаги “Чет тилларни ўрганиш тизимини янада такомиллаштириш чора-тадбирлари тўғрисида”ги қарорига асо-сан мактабларда 1-синфдан бошлаб хорижий тилларнинг ўргатилаётгани ота-оналарнинг кўнглидаги иш бўлди. Айни пайтда мазкур қарорга биноан вилоятимиздаги умумтаълим муассасаларида инглиз, немис ва француз тиллари чуқур ўқитилмоқда. Барча ўқув маскан-лари мутахассислар билан таъминланган бўлиб, 1384 нафар малакали чет тили ўқитув-чиси замонавий талаблар даражасида ёшларга билим беради.

Ўқувчиларнинг ilk кўнилмаларни эгаллаб, таълим даргоҳига тайёр ҳолатда қадам қўйишида мактабгача таълим муассасаларининг ўрни катта. Бофчанинг таълим-тарбиясими олган бола оилада улғайган тенгдошидан дунёқараши нисбатан кенглиги, мактаб муҳитига тез мослашувчанлиги билан фарқ қиласди. Шу боис кейинги йилларда отоналарнинг мактабгача таълим муассасасига интилиши ошди. Бу ҳам юртдошларимиз тафаккуридаги ижобий янгиланишлар билан бирга, бофчаларнинг энагалик қиласидаги маскан даражасидан илик ҳаётий қўнилма ва билимларни шакллантирадиган таълим-тарбия даргоҳи мақомига кўтарилгани маҳсулидир.

Айни пайтда бошқармамиз тасарру-фида 289 та мактабгача таълим муассасаси мавжуд бўлиб, уларга 26685 нафар бола жалб этилган. Мазкур бофчаларнинг аксариятида чет тили тўгараклари ташкил қилингани фарзандларимизнинг хорижий тилларни эрта ўрганишида муҳим аҳамият касб этади. Вилоятдаги 147 та мактабгача таълим муассасасида қисқа муддатли гурухларни ташкил этиш мақсадида хоналар тайёрланди. Мактабгача ва умумий

ўрта таълимни такомиллаштириш лойиҳаси асосида болалари мактабгача таълим муассасаларига қамраб олинмаган 23000 хонадоннинг манзилли рўйхати шакллантирилиб, бу оилаларга фарзандларини мактабга тайёрлашга кўмаклашиш мақсадида етти номдаги кўлланмаларни етказиб бериш учун Халқ таълими вазирлигига тегишли маълумотлар тақдим этилди.

Юртимизда болалар мусиқа ва санъат мактабларига қаратилаётган эътибор ва ғамхўрлик бир-биридан кўркам маданият масканларининг барпо этилишига сабаб бўлаётир. Ўзбекистон Республикаси Президентининг “Болалар мусиқа ва санъат мактабларининг моддий-техник базасини мустаҳкамлаш ва уларнинг фаолиятини янада яхшилаш бўйича 2009—2014 йилларга мўлжалланган Давлат дастури тўғрисида”ги қарорига асо-сан вилоятимизда ўн еттита болалар мусиқа ва санъат мактабининг ўн тўрттаси янгидан курилиб, учтаси капитал реконструкция қилингани кўплаб ёшларнинг ноёб истеъодини рўёбга чиқаришда муҳим аҳамият касб этапти.

Хозирги кунда мазкур муассасаларда болалар фортециано, торли, дамли ва зарбли чолгулар, анъянавий чолғу ижрочилиги, чолғу ижрочилиги, анъянавий хонандалик, академик хонандалик, эстрада хонандалиги, хореография, театр санъати, тасвирий санъати, амалий санъат каби йўналишларда таҳсил олиб, турли нуфузли таңлов ва беллашувларда фахрли ўринларни кўлга киритмоқда. Жумладан, шу йил Навоий вилоятида ўтказилган “Академик чолгулар ва эстрада ижрочилиги” кўрик-танловининг республика босқичида

уч нафар ўқувчимиз иккинчи, бир нафари учинчи ўринни кўлга киритди. Андижон вилоятида бўлиб ўтган “Ягонасан, муқаддас Ватан!” республика кўрик-танловининг саралаш босқичида ҳам вакилларимиздан иккиси нафари иккинчи ва бир нафари биринчи ўрин соҳиби бўлди.

Болаларнинг дарсдан бўш вақтини мазмунли ташкил этиш ёш авлоднинг соғлом маънавий-рухий камолотида алоҳида аҳамият касб этади. Айни пайтда вилоятимиздаги ўн бешта “Баркамол авлод” болалар марказида ўқувчиларнинг қизиқиши ва лаёқатига мос 285 та тўгарак фаолияти йўлга қўйилган.

Юртимизда фарзанди спортга ошно тутинмаган оилани топиш мушкул. Жисмоний тарбия машғулотлари тугаганидан кейин ҳам берилиб футбол ёки баскетбол ўйнаётган болаларни кўрганимизда кўнглиминдаги ифтихор туйғуси алангаланади. Вилоятимиздаги ўқувчиларнинг қарийб олтмиш фоизи мунтазам жисмоний тарбия ва спорт билан шуғуланаётгани ҳам халқимизнинг соғлом турмуш тарзига интилиши самарасидир.

Ҳозир вилоят халқ таълими тизимида йигирма еттита спорт тури бўйича 8743 та тўгарак фаолият олиб бормоқда. Уларнинг барчаси эртаю кеч ёшлар билан гавжум. Муҳташам спорт залларида шиддат билан машқ қилаётган фарзандларимизга қараб, улар тимсолида боболаримиз орзусидаги юлдузларни кўзлаган ёвқур йигит-қизларни кўрамиз.



Мулоҳимхунук



Акбар РУСТАМОВ

1983 йили туғилган.

Бухоро давлат университетининг ўзбек филологияси факультетини тамомлаган. “Истеъодод мактаби” ёш ижодкорлар семинари рестублика босқичи иштирокчиси.

Ҳажвиялари, илмий мақолалари рестублика матбуотида, адабий ва илмий тўпламларда нашр этилган.

Ү

ринов жойида ўтиrolмади. Гўёки оромкурсига тип практикан ташлаб қўйилган-у, билмай орқасини қўйгандек эди. Салдан сўнг ана шу жонивор унинг ичига киргандек аъзои баданига ниш санчишга ўтди. Юрагида аллақандай талотўп бошланди.

– Аблаҳ, – деди у ўзига ўзи пичирлаб, – ким сотди экан-а. Аслида, айб ўзимда, тўғриқўнгиллигимга бориб ходимлар орасида ҳар қандай гапни айтавераман-да..

Эрталаб ишга яхши кайфиятда келганди. Кадрлар бўлими бошлигининг хонасига кирди-да, ҳол-аҳвол сўрашгандан сўнг, эски одатига қўра, ҳамма ходимлар ҳаётини “вараклай” бошлади: “Эшмамат, машина олибди. Аслида-ку, маошига машина тугул эшак-арава ҳам бермайди. Бирор яширин даромади бор. Ойша ёлғиз боши билан данғиллама тўй қилди. Орқасида кимдир турибди-ёв”. Ўриновнинг “рўйхат”и тугашига анча бор эди-ю, аммо кадрлар бўлими бошлиги Фозиев унинг гапини бўлди:

– Гулом ака, бўлди, шу ҳақда сўзлашмайлик. Бунақа гаплар “катта”га ҳам етиб борибди, – деди бошлиқнинг хонасига ишора қилиб. – Кеча мени чақириб, роса изза қилдилар. “Кап-катта одамлар уялмайсизларми, фийбат, майда гап-сўзни кўтариб юришга”, дедилар. Ҳали бугун ўзингизга ҳам гапириб қолса керак.

Тамом, Ўриновнинг ичига қурт тушди. Тен-так қўйдек у ёқдан-бу ёққа юра бошлади: “Ким сотди экан-а, ким сотди?!”

“Дарвоқе, – ўйлади у. – Фозиев билан сұхбат чоғида кимлар бор эди? Ўша бўлимдаги “Опа” ҳамда янги ишга келган Толмасов деган йигит. Топдим! “Опа” сотган. Барибир аёл-да. Тили қулф-калитсиз. Энди “Катта” мен ҳақимда нима деб ўйлайди. Йўқ. Отни ўзим қамчилашим керак”.

Ана шу хаёллар оғушида Ўринов қўрқа-писа бошлиқнинг хонасига яқинлашди. Эшик олдида ҳам бироз каловланди-да, “таваккал” дея ичкарига кирди. Ўзини гўё саломлашгани киргандек кўрсатган ўринбосар бироздан сўнг муддаога кўчди:

– Жамоамизда ажойиб инсонлар бор-да, Музаффар Исҳоқович, – арқонни узун ташлади у. – Шу “Опа”ни айтяпман. Бутун ҳаётини шу ерда ўтказди. Ўзи яхши ходим-у, тилининг югуриклиги ёмон-да. Мана, кеча кўчада авария бўлиби. Шуни деразадан кўрибди-ю, ҳар бир хонага кириб, бирма-бир айтиб юрибди. Ҳай, дедим, халқнинг кўнглига фулфула солиш яхши эмас, дедим. Ундан кейин тилингизга бир фильтр ҳам ўрнатиб олинг. Ҳаёлингизга келган ҳар қандай сўзнинг керагини, чиройлисини чиқаринг, дедим. Ҳа, энди, Музаффар Исҳоқович, бари-бир бесуяк тил-да, сизнинг қабулингизда ҳам мен ёки бошқа ходимлар ҳақида ҳар хил сўзларни айтиши мумкин. Шунга эътибор бериб, муборак асабларингизни уринтирманг, демоқчидим.

“Хайрият, – елкасидан тоғ ағдарилгандек ҳис қилди ўзини Ўринов. – Режам шунчалик ўзини оқладики, бошлиқ кечаги гапдан сўз очишгаям ботинолмади. Шошма, агар бу гапни ҳалиги Толмасов етказган бўлса-чи? Ҳар ҳолда, ёш, “кўтарилиш” илинжида ўзини яхши кўрсатиш учун гап ташиган бўлиши мумкин-ку.

Ўринов дарҳол орқасига қайтди. Энди директор билан сұхбат Толмасовнинг аёлларга ўчилиги-ю, ўз бола-чақаси бўла туриб, тутуриқсизлик билан бошқаларга илакишгани ҳақида борди. Гап охирида ўринбосар тутуриқсиз кимсаларнинг оғиздан ҳар нарса чиқиши-ю, баъзан ўзи ҳақида тухмат гап айтиб қўйганда эътибор бермасликни илтимос қилди.

Аммо барибир Ўриновнинг кўнгли тинчимади. Бошлиқнинг хотиржамлиги, сир бой бермаётгани уни хавотирга солди.

“Мабодо Фозиевнинг ўзи сотдимикан, – яна ўз-ўзини сўроққа тутди ўринбосар. – Ҳа-ҳа, шундай. Ўзимам ўйловдим-а, нега бу охирги пайтларда бошлиқнинг хонасига серқатнов бўлиб қолди, деб”.

Ўринбосарнинг учинчи маротаба ҳам айб иш қилган боладай шалвираб кирганини кўрган Музаффар Исҳоқович охири ёрилди:

– Тинчликми, Гулом Ўсарович. Нима киндингизни йўқотдингизми?

– Тинчлик, Музаффар Исҳоқович, тинчлик, – деди ўринбосар каловланиб, – Шунчаки, анави Фозиев масаласида келгандим. Ўзи тажрибали ходим-у, аммо ўлгудек ичи қора. Тағин, ўзи қилган баъзи ишларни бирорларга тўнкашга ҳам устаси фаранг.

– Гапингизни тушунмадим, ўртоқ Ўринов?

– Ҳалиги, кечаги танбеҳингиз жуда ўринли эди. Асли ҳамма ишни қилган Фозиев. Аммо йўғимда ўзи тўқиган ёлғон-яшиқни менга тўнкагани бироз хижил...

– Қанақа танбех, қанақа Фозиев? – деди асабийлашаётган бошлиқ энсаси қотиб.

– Кеча Фозиевни чақирганингиз...

– Мен кеча Фозиевни чақиртирмадим! Умуман, уч кундан буён у менинг қабулимга кирган эмас!

– Ҳа, ҳа, шундайми, кечирасиз, – рангига қизиллик югурди Ўриновнинг. Фозиевнинг ўзига айтган сўзлари шунчаки “илмоқ” эканини билди. Лекин шундай бўлса-да, сув келмасдан бурун бандни боғламоқчи бўлди. – Ҳар ҳолда, жамоада ана шундай мулойимхунук, гап ташувчилар бор. Билдириб қўяй дедим-да.

– Раҳмат, – деди Музаффар Исҳоқович ўзини бироз босиб олиб. – Ҳар ҳолда, бугун бир мулойимхунукни таниб олдим.

Бошлиқнинг гапидаги шаъмани тушунмади чоғи, Ўринов қўлини кўксига қўяркан, илжайиб деди:

– Ҳа-ҳа, Музаффар Исҳоқович, кўрдингизми, мен сизга доимо яхши бўлишини истайман.

Директор хонасидан чиқаркан, ўринбосар хаёлини бошқа ташвиш чулғаб олди: “Бошлиқ айтган мулойимхунук ким экан? Опами? Ё Толмасовми? Эҳтимол, Фозиевдир? Ёки бошқа бирор бормикан? Тезда шуни аниқлашим керак! Кейин шунинг ёнида тилимни тий-ийиб гапираман”.



Мұхаббат ва құзёшлар


Француз масалчиси Жан Лафонтеннинг хотини бир куни әрини иш пайти хүнграб йиғлаётган ҳолда учратади. Гап нимадалигини сүрайди, Лафонтен жавоб үрнига асаридан парча ўқиб беради. Үнда қаҳрамон қийинчиликлар гирдобига тушиб, севганига етиша олмаётгани тасвирланған әди.

Ёзувчининг аёли ҳам парчадан ўткаси түлиб, йиғлаб олади ва эрига ялинишни бошлайды:

- Бечорани севганига етиштира қолинг. Құша қаришсин.
- Йўқ, сиräям иложи йўқ! – дейди Лафонтен. – Ахир, эндиғина биринчи жилдни ёзяпман-ку!

“Фауст” қанча давом этади?


Буюк олмон адаби Гётенинг “Фауст” драмаси биринчи ва иккинчи қисмларини бирлаштирганда жами 12111 та шеърий парчадан иборат. Адаби бу асари устида қарийб олмиш йил меҳнат қилған. Пьеса түлиқ шаклда Германиянинг Ҳанновер шаҳрида ўtkазилған Экспо-2000 фестивалида саңнага қўйилған. 21 соат давом этган спектаклда Фаустнинг монологлари ижросига олти соат, Мефистофелникига эса уч соат вақт кетган.



Сиз мени тушуняпсизми?

Атоқлы олмон файласуфи Артур Шопенхауэр әзма бир хотин билан бирга тушлик қилиб қолади. Тушлик давомида аёл эри ва ўзи ўртасидаги муносабатлар ҳақида майда-чуйдасигача гапириб, нолиди. Файласуф уни сабр-тоқат билан эшишиб ўтиради, лекин ҳеч нарса демайди. Бундан зардаланған хотин:

- Мени тушуняпсизми, ўзи? – деб сўрайди.
- Йўқ, – деб жавоб беради Шопенхауэр. – Лекин эрингизни жуда яхши тушуниб турибман.



Дўхтирга бормасликнинг сабаби

Машхур инглиз адаби Бернард Шоу врач қабулига бориб, оёғи оғриётганидан шикоят қиласди.

- Оёғингиз қанчадан бери бундай аҳволда? – деб сўрайди дўхтири.
- Икки ҳафтадан бери, – дейди Шоу.
- Икки ҳафтадан бери синган сужак билан қандай юрдингиз?! Нега илгарироқ келмадингиз? – дейди врач ҳайратланиб.
- Биласизми, доктор, – деб ўзини оқлаган бўлади ёзувчи, – қачон бир жойим оғриётганини айтсан, хотиним чекишни ташлашимни талаб қила бошлайди...





Биз бугун ҳам, келажакда ҳам ҳеч қачон, ҳеч
кимдан кам бўлмаймиз, ўз мақсад-муддаолари-
мизга албатта етамиз.



Мукофот ва гувоҳномалар топширилди

Ўзбекистон Ёзувчилар уюшмаси томонидан Ватанимиз мустақиллигининг 25 йиллигига бағишилаб ўтказилган “Ватанни мадҳ этиш бахти” танлови ғолиблари аниқланди. Ўзбекистон халқ ёзувчиси, марҳум Пиримкул Қодиров (оила аъзолари), Ўзбекистон халқ шоири Тўлан Низом, шоиралар Ҳалима Аҳмедова, Шарифа Салимова, Хосият Бобомуродова, ёзувчи Шарап Уснатдинов, таниқли болалар шоири Турсунбой Адашбоев, шоирлар Азим Суюн, Дилшод Ражаб ва Мирпўлат Мирзо, адабиётшунослар Ислом Ёқубов ва Абдусаттор Жуманазаров диплом ва мукофотлар билан тақдирланди.

Шунингдек, уюшма аъзолигига янги қабул қилинган Лайло Шарипова, Ойдин Темирова, Беҳзод Фазлиддин, Диором Исмоилова, Ривож Ўтарбоевга Ёзувчилар уюшмаси гувоҳномаси топширилди.



ҚАДРЛИ ЖУРНАЛХОН!

Ўзбек адабиётиning энг сара намуналарини,
жаҳон адабиётидан янги таржималарни
мунтазам ўқиб боришни истайсизми?






Янги авлод овозини туйиб, туйғуларингиз, фикрларингиз
янгиланишини хоҳлайсизми?

Унда “Ёшлик” журналига 2017 йилда ҳам обуна бўлинг!
Обуна индекси: 822



Китоб миллатнинг ақл кўзини ёритувчи офтобдир!

ҒАФУР ҒУЛОМ НОМИДАГИ НАШРИЁТ-МАТБАА ИЖОДИЙ УЙИ





*Сизга тақдим этилаётган ўзбек
ва жаҳон адабиётининг энг сифа намуналаридан
даҳфраманд бўминг.*

Мурожат учун манзил: 100128, Тошкент ш., Лабзак кўчаси, 86 уй.

Телефонлар: (+99871) 241-83-29. Моб.: (+99895) 144-41-82, (+99893) 791-00-70, (+99895) 195-42-42
www.gglit.uz E-mail: info@gglit.uz

Махсулотлар сертификатланган. Хизматлар лицензияланган.



YOSHLIK

9
2016

Ўзи бир
чинор
эди

Замон руҳи,
хаёт фалсафаси

Шому
саҳарларда
юртимни
кездим

Булук
матонат